

فيها
لا مؤاخذه

حاجة حلوة

بقلم
خالد بيومي فهمي



ليليث للنشر
والتوزيع

فيها لامؤاخذة حاجة حلوة

رقم الايداع / 2013 / 1758 ط ١1

ترقيم دولى / ١ - ٢٢ - ٥٣١١ - ٩٧٧ - ٩٧٨

مدقق لغوى / أ / أحمد عبد العظيم

غلاف / دينا سليمان

حقوق الطبع محفوظة لدى الناشر

ليليت للنشر والتوزيع

الإشراف العام / إيمان سعيد

المراسلات: 17 ش محمد أمين شهيبي

مصطفى كامل إسكندرية

من ش أبوقير - أمام كلية رياض أطفال

ت : 035232044

موبايل : 01206301212

lileteepublishing@gmail.com

هيئة تحرير الدار

د/ محمد داوود

محمد الشماع

ميسرة صلاح الدين

الله يرحمك يا أبويا ..

كنت لما تشوفني جايب آخري من البلد تقولي معلى ..
استحمل .. هي بلدنا كده .. زي ما فيها حاجات وحشة بتضايقك
هتلاقى حاجات تانية بتفرحك ..
واحشني يا أبويا قوي وواحشني كلامك ..
بقالي 30 سنه عايش بحمكتك وراضى ..
ولو إني كان نفسي قبل ما تمشي تقولي ..
هي الحاجات الحلوة دي ..
هتيجي امتي بقى بالصلاة عالنبى ؟!!!!

أحفادنا الذين سيأتون بعد مائة وخمسين عاماً .. انبوكس بليز

تخيل جداً أنه بعد مائة وخمسين عاماً من الآن - أي في عام 2160 - وبعد أن تكون أنت - أطال الله عمرك - قد رحلت عن العالم .. أن أحد أحفاد أحفادك - الذين لم ولن يروك - يقوم فجأةً عن اللاب توب الخاص به و يركض إلى والدته ويشدها من أكمامها في قوةٍ مخبراً إياها عن مفاجأةٍ غريبة .. وهي أنه في أثناء البحث الذي يقوم بإعداده في مادة التاريخ عن الثورة المصرية التي قامت منذ مائة وخمسين عاماً، قد عثر في الفيس بوك على صورةٍ نادرة من أيام الثورة بها تاج (Tag) لجده الأكبر، الذي هو أنت، وقد بدت حينها شاباً جذاباً في العشرينات أو الثلاثينات من العمر، وربما أقل من ذلك أو أكبر بقليل، فائز الحوية والطاقة، يقف في اعتدادٍ مع الثوار الرابضين في ميدان التحرير، تعلو وجهك ابتسامةٌ تحاول ألا تبدو ساذجة .. بيدك اليمنى علم مصر يرفرف في السماء عالياً وباليد الأخرى لوحةً كتبته أنت بخط يدك ترجو فيها مبارك الرحيل لأن ابنك (الذي هو أحد أجداد الصبي) على وشك القدوم للعالم ومش عايز يشوفه بأصابع حفيدك الدقيقة، و بضغطة ماويس واحدةٍ على (التاج)، سيظهر بروفائلك له .. بروفائلك التائه الذي تركته أنت منذ عشرات الأعوام بعد رحيلك عن هذا العالم ولم يعثر عليه أحد .. سيبدو قديماً وكأنما يعلوه الغبار .

تتتابع ضغطات الماوس في فضول ليتصفح حفيدك في سرعة تاريخك وعاداتك واهتماماتك وأدق خصوصياتك .. كل الصفحات والجروبات والايقتات التي انضمت أنت إليها منذ مائة عام خلت أو تزيد .. سيضحك لـ ستاتس ساخرة قلت فيها أن البلد بايظة ومش نافعة لأن هناك من لا يزال يريد ترشيح المرحوم طنطاوي للرئاسة .. سيرى الوقت الذي قمت فيه بتغيير صورة بروفائلك إلى (نعم) أثناء التعديلات الدستورية ومشاجراتك في الكومنات مع من قالوا (تؤ) .. سيعثر على صورة عمرها أكثر من مائة عام بها إصبعك البنفسجي ومشاركتك الإيجابية في انتخابات الرئاسة ..

و سيكتشف مزيداً من (الفوتوز) لك مرابطاً في ميدان التحرير و معتصماً أمام مجلس الوزراء و مطالباً بالإفراج عن المدنيين الذين يُحاكَمون من قبل المجلس العسكري .. وهو المجلس الذي لم تستطع كتب التاريخ أن تكذب بشأنه أو تجمل صورته .. وقد كان هذا هو السبب الأول لبحث الحفيد العزيز عن معلوماتٍ على الفيس بوك قبل أن يعثر صدفةً على بروفایل جده الأثري .. فالصغار بعد سنواتٍ طويلةٍ من اليوم لن يستمعوا عمياني كده لما قام بتاريخه المؤرخون، هم لن يقعوا في ذلك (الحيص بيص) الذي وقعنا فيه نحن - الأجداد - بخصوص الحكم على أشياء كثيرة من ماضي البلاد لم نرها ولم نعش أحداثها، فبيلنا عندما كان يقرأ كتاباً يُمجّد عبد الناصر كان يقف حائراً أمام عشرٍ كتبٍ تهاجمه، وجيلنا الذي كان يسعد بمقالةٍ تؤيد السادات يغدو تعيساً أمام مائة مقالةٍ تلعنه .. وما بين المؤيد والمعارض، والمداح والذام، اعتباراتٌ لا نعلمها، وتصفية حسابات، وأهواء كتابٍ ومؤرخين .. على أن

هذا لن يكون هو الحال في السنوات القادمة .. إذ يكفي لأحفادنا بدلاً من الاستماع لآراء مشوشة أن يلجوا إلى الفيس بوك و (يسكروا) الماوس ساحبين (بار البراوزر) إلى أسفل ليعودوا عشرات الأعوام للوراء، إلى حيث يستقر في قاع الفيس بوك مئات من الفيديوهات والأخبار والصُور التي أرسلت منذ أعوام طويلة وبتواريخها الموثقة لتكشف كيف كان حال البلاد "على الطبيعة" آنذاك .. وأونلاين .. فلا حاجة إلى التصديق التام لكُتب كتبها أشخاص يلمعون فيها أشخاصاً آخرين، أو يفترون عليهم، أو يحون أحداثاً من التاريخ، أو يضيفون أخرى، أو حتى يحملون ثلاثة ..

فكل شيء موثق ويحكي عن هذا الزمان .. بل وعنك و عتّا نحن الأجداد أنفسنا .. ولذا لن تجدي نفعاً تلك الحكايات التي يقصها أبنائك لأحفادك عن بطولاتك الثورية إذا ما عثر هؤلاء الأحفاد على بروفايلك الشخصي ووجدوا أنك لم تكن ذلك البطل الشائر أبداً كما في الحكايات التي يسمعونها، بل يبدو من بوستاتك وتعليقاتك أنك كنت وغداً فلولياً، أو مندساً خائئاً، أو بلطجياً لا دين له، أو حتى أحد أفراد حزب الكنبه .. و ما هي الفائدة عندما يجمع أحد المسؤولين مثقفي البلاد جميعهم لتلميع سيرته المشوّبة بالقيـل والقال إذا ما عثر أحفاده على صفحةٍ عمرها أكثر من مائة عام تحاول أن تجمع مليون توقيع للعن سلسفيل أبوه !! .. ولن يكون هناك ما هو (أنيل وأفضح) من أن تفق ذريته حائرة - بعد السنين الطويلة من رحيله - أمام فيديو يصنع فيه مواطناً أو يُعذب ثائراً أو أن عدالته التي يعرفها هي وضع خازوق ساخن في مؤخرات معارضيهِ .. ولذا لا أجد من هو أكثر سذاجة من مبارك ومعاوينه

الذي يسعون جاهدين لكتابة مذكراتهم قبل مماتهم لتلميع ما شابه الزمان من سيرتهم، فالتاريخ لم يعد مطاطًا ليستوعب المزيد من كذبهم، إذ يكفي لأحفادنا - وأحفاد مبارك أنفسهم - أن يصدقوا أن مبارك ليس هو الأب الفاضل والبطل المظلوم كما يقول المشرف على كتابة المذكرات في إحدى الصحف، يكفي لهؤلاء الأحفاد فقط أن ينبشوا في مقبرة الفيس بوك وأن (يسكروا) الماوس) عائدین أعوامًا للوراء ليجدوا عشرات الصفحات والفيديوهات والإحصائيات والأخبار تلعن مبارك وأولاده ومعاونيه ووزراءه و زبانيته لعنة أبدية لا تفارقهم أبدًا بل و ليعودوا هؤلاء الأحفاد (بالماس) أيضًا إلى يوم ٢٤ يناير ٢٠١١ في كل الصفحات المعارضة ليعرفوا لماذا قامت الثورة ..

سنرحل جميعًا وستبقى أخبارنا وأخبار ثورتنا وأخبار جلا دينا (نتشير عالفيس بوك) إلى أبد الآبدين، ولك الحق في أن تبدو كما تريد أن تكون لأحفادك الذي سيعثرون على بروفايلك الأثري بعد عشرات السنين، إن كنت حسن السمعة فليكن، وإن كنت سيئها فتأكد أنك قمت بإيقاف الأكونت الخاص بك قبل رحيلك، وحذفت كل التاج (الي اتعملك) و انتزعت كل ما يمت لك بصلة بعالم الفيس بوك وبالإترنت، ولكن ثق أنك ستكون سعيدًا في عالمك الآخر إذا ما قام أحد أحفادك بطباعة صورة لك عمرها أكثر من مائة عام وأنت بميدان التحرير ليتفاخر بها أمام أقرانه اللذين قد يشككون في تقاعسك أيام الثورة زاعمين أنك كنت في الحمام ساعها .. أو كنت بس نازل تتصور جنب الدبابة .. وثق أنك ستصير أسعد وأسعد

إذا ما جعلت بروفايلك - بابلليك public - كي يتسنى لحفيدك إن عثر عليه أن يعرف أدق التفاصيل عنك وعن حياتك وعن أماكن ذهبت إليها و لم يعد لها وجودٌ في زمانه هذا، و ربما بقليلٍ من الجهد قد يعثر حفيدك على

البوست الذي أعلنت فيه زواجك من جدته فيضغط Like ويبارك لكما زواجكما بعد أكثر من مائة عامٍ من رحيلكما .. ولربما ساقته فطرته النقيّة لأن يرسل إليك عن طيب خاطر وصفاء نية (فريند ريكوسيت) وهو يعلم تمام العلم أنك كنت تتمنى لو أن تكون موجودًا هذه اللحظة - فقط - لتقبل طلبه هذا ..

في بلاد الحُصْن والبُوس

لاحظت منذ فترة أن بعضًا من زملائي في العمل، و جيراني في المنطقة، و أصدقائي في الطفولة و أقاربي بالعائلة، وبعض من رفاق الدرب و جلساء المقهى وبعض من الناس اللي ماشية في الشارع، وبعض من البقالين، والحلاقين والسباكين، والصنایعية، و الشحاتين، و السفاحين يصابون بحالة من التشنج والتوتر والترقب والانفعال الهستيري فور مشاهدتهم برنامجًا تليفزيونيًا شهيرًا يأتي في صيف كل عام يسمى ”ستار أكاديمي“ .. وهذه الحالة من التشنج والترقب والانفعال اصطلاح عليها الجميع باسم ”متلازمة ستار أكاديمي“ .. وعلى هذا فكل من أجده حولي به هذه العلامات الغريبة من الشرود والتوهان والترقب والتبول اللاإرادي أدرك على الفور أنه يشاهد هذا المدعوق الأسود ..

وفي الواقع لم أكن أعرف ما هو ستار أكاديمي ولا ما فكرته! .. قالوا لي هو برنامج اكتشاف مواهب مشهور .. الولاد والبنات بيحضنوا ويوسوا بعض فيه طول الاسبوع .. وييجوا يوم الجمعة يغنوا !!! .. صُغقت .. حصن وبوس؟؟ .. قالوا لي نعم .. وأحيانًا يصل الامر أنهم يقعدوا فوق ”حجر“ بعض كمان .. فالأكاديمية ضيقة جدًا .. وهذا الأسلوب من ”القعاد فوق الحجر“ يربي بداخل المتسابقين روح التعاون والحمية ويربي عضلات

الفخزين والصدر للي عايز تبقى بنشاته بلاطه وبطنه شوكلاته .. يا إلهي الرحيم .. شاهدت حلقتين من البرنامج .. لا أنكر أن هناك دروساً للموسيقى والغناء والرقص .. ولكن لحظات النجمة والغيبة والكلام التافه والحممية كثيرة بشكل رهيب .. كثيرة بشكل تشعر معه أن برنامجاً بهذه الجاذبية وهذا العدد من المعجبين والفائز وصفحات الفيسبوك واليوتيوب هو وباء يهدد أخلاقيات المجتمع العربي ..

وكان لي جار ندعوه بالشيخ محمود .. وهو شاب في منتصف العقد الثالث من العمر ، متدين ومحبذ وملتزم .. يعمل خطيباً بوزارة الأوقاف .. ويخطب لصلاة الجمعة في ذلك المسجد الصغير أسفل المنزل .. لم تكن علاقتي به قوية .. ولكنني وجدت أن إخباره بهذه المهزلة المساة ستار أكاديمي هو واجب قومي كي يتخذ إجراءً مناسباً .. وعندما ذكرت له اسم البرنامج قال لي أنه يعرفه جيداً .. لأن زوجته تتابعه باستمرار .. صُغت .. لكنه أدركني قائلاً لي أنه قام بتطبيقها بعد أن ضبطها ترسل رساله (اس ام اس) لواحد من ”النوميني لها الاسبوع“ .. وأن سبب الطلاق الحقيقي ليس لأنها أرسلت الرسالة .. بل لأنها كانت من هاتفه الذي يحتاج رصيده بشدة ..

صرخت فيه بأن يا شيخ إن هذا البرنامج يهدد الأسرة المصرية والعربية بهذه السلوكيات الشاذة .. قال لي نعم .. إنه يهددها بالفعل .. ولكنه لا يعلم ما يفعل .. ولم يعد بيده حيلة لأنه منذ فترة حدث شيء عجيب .. فهو يعطي درساً كل جمعة بعد صلاة العشاء .. وهذا الدرس يحضره أكثر من مائتي شخص .. وقد خصص الشيخ إحدى الجُمع للحديث عن فساد مثل هذه

البرامج التي تنشر الأخلاقيات الفاسدة في مجتمعاتنا العربية .. وأن عليهم أن يُحصّنوا أولادهم منها .. ويغلقوا القنوات التي تبثها .. وقد انصرف الناس بعد الدرس وكلهم قناعة بفساد هذه البرامج .. وفي الجمعة التالية انتظرهم الشيخ كي يلقي عليهم درسًا جديدًا .. ولكن لم يأت أحد .. تعجب الشيخ .. وعندما بحث عنهم .. وجدهم في بيوتهم يتابعون ”حفلة البرايم“ ..

وينتشر ستار أكاديمي انتشار النار في الهشيم .. يتزايد مشاهدوه وينمو معجبهه يومًا بعد يوم .. وبالنسبة لي فقد أتعبني البحث عن أنتي ستار أكاديمي (مضاد) كي أحصّن به منزلي .. ولكن يبدو أن باب النجار مخلع .. فقد بدأت أشك في أن زوجتي تتابع البرنامج دون علمي .. فأعرض المتلازمة تبدو عليها واضحة .. التشنج والترقب وكوايس رهيبة تفرعها بأن ”النوميني“ المفضل لها هيفلسعوه من الأكاديمية هذا الاسبوع .. ورغم أنني قمت بتشفير كل القنوات التي تبث البرنامج إلا أن متابعة زوجتي للسلسلات البوليسية الأمريكية جعلها تفك الشفرة وتشاهد البرنامج في غيابي .. وكلما ابتكرت أنا شفرة توصلت هي إليها على الفور

وعندما زادت تشنجات زوجتي قمت بفك الدش تمامًا ورميه من الشباك .. ولأنها تتابع البرامج العلمية فقد توصلت إلى طريقة جلب تلك القنوات على التلفزيون الأرضي بدون دِش .. وعندما استشعرت أنا الخطر أكثر وأكثر قمت برمي التلفزيون من البلكونة للتخلص من هذا الكابوس .. ولأنها تشاهد أفلام الخيال العلمي والفضاء الخارجي استطاعت مشاهدة البرنامج على

البوتاجاز بعد توصيله بشفاط المطبخ .. دعوت الشيخ محمود إلى فنجان من الشاي في منزلي شاكيا له ما حدث من شكي في أن زوجتي تشاهد هذا البرنامج المنحل .. قال لي : إن بعض الظن إثم ، فكيف لي أن أتأكد وأنا لم أرها بأمر عيني وهي تشاهده .. قلت له يا شيخ أنا متابع جيد لمسلسل C S I البوليسي الأمريكي .. وقد بحثت عن دليل الإدانة في زوجتي .. فوجدت أظافرها تالفة تمامًا .. ما يعني أنها تجلس الساعات الطوال في خربشة كروت الشحن لإرسال رسائل (إس ام إس) للتوميني لها الأسبوع .. صُقع الشيخ .. وقال لي يجب أن أفصل عنها كما فعل هو مع زوجته .. قلت له لا داعي للانفصال .. فهي ترسل الرسائل من هاتفها الجوال وليس من هاتفي .. كما أنني لا أجيد عمل مكرونة اللحمية المفرومة مع جبن الموتزاريلا .. إنني احتاج زوجتي بشدة ..

قال لي الشيخ محمود يجب أن نقوم بحملة ضد ستار أكاديمي لمنع بثه في الوطن العربي .. ولكنه لا يدرك إلى أي درجة من درجات الانحلال وصل البرنامج .. فهو لا يعرف عنه شيئاً منذ سنوات حين كان الرقص والغناء هما الطابع الرئيسي له .. قلت له يا شيبسيخ لقد تغير الحال .. الآن صار الحضن والبوس والمرقعة هم الطبق الرئيسي له .. اندهش الشيخ قائلاً .. بووووس وحضنننن؟؟؟؟ .. للدرجة دي!!! .. طب وريبييني كده ...

فتحت التلفاز على القناة .. ولترتيب الأقدار وقعت عينانا على فتاة تحتضن شاباً في قوة .. قلت له : شوفت يا شيخ!! ..شوفت المهزلة!! .. شوفت القذارة!! .. بنت بتحضن ولد!! .. قال لي الشيخ إن بعض الظن إثم .. مش

يمكن تكون أمه ؟ .. قلت له مندهشاً : أمه ؟ ! .. وهي في أم في الدنيا بتلبس
”هوت شورت“ .. قالي مش يمكن حرّانه وعازرة تطري على قلبها شوية ..
قلت له جاز يا شيخ .. كل شيء جاز .. بس يا ترى ليه كل الأهمّات في
الأكاديمية حرّانين كده .. وليه مكتشفوش إن عندهم ولاد عاززين يتحضنوا
غير دلوقتي .. هه ؟ .. ليه ؟ ؟ .. ليه ؟ ؟ ..

جلسنا أكثر من ساعة نحاول وضع خطة عمل منمقة لسحق البرنامج الملعون
.. وضعنا بعض الأفكار ثم انصرف بعدها الشيخ محمود ليقوم بتنقيتها وتنقيحها
والخروج بخطة حقيقية تقضي بها على ستار أكاديمي .. سنسحق (هيلدا)
مقدمة البرنامج .. المرأة ذات السيقان التي لا ترى الظلام أبداً لقصر
فساينها .. ومن ثم نتجه لمدام (رولا) مديرة الأكاديمية .. وهي المرأة التي
تجاوزت سن السبعين بخمسين عاماً على الأقل .. المرأة التي لا تموت أبداً
والتي تؤكد لي في كل أسبوع أن ”النوميني“ يرحلون بينما هي باقية أبد الدهر
متشبثة بالبرنامج وبالبرامج ..

فتحت التليفزيون .. أريد نمر تليفونات هؤلاء الأوغاد كي أقوم بتزييقهم وتطليع
ترباتيتهم .. وأريد كتابة تقرير مفصل عن المهازل التي تحدث داخل الأكاديمية
لتوصيلها للجهات الرقابية لكي يقوموا باللازم في حماية أولادنا من هذه الفتن
حسناً .. هذه قناة ستار أكاديمي .. فلنبداً .. وجدت شيئاً عجيباً .. فرغم
مرور ساعة ونصف على انصراف الشيخ إلا أن ”الحضن“ لا يزال شغال ..
الشاب والفتاة .. يا لقرفها .. ولكن محلاً .. ظلمت الفتاة .. إنه لم يكن نفس
الشاب .. بل إنها تحتضن شاباً آخر غير الأول .. ثم اتجهت لتحتضن ثالث

و رابع .. يا لروعتها صلة الرحم تلك .. إنها حقًا أمٌ رائعة تلك التي تساوي بين أولادها في المليطة .. ثم وجدت فتاة أخرى تتجه لتجلس على ”حجر“ واحد من الأشخاص .. يبدو أنه أيها .. ثم انطلقا يتكلمان عن مدى جفاء ”سارة“ مع ”جلبرت“ .. وأن ”جلبرت“ يفضل عليها ”مارجريت“، ولكن ”مارجريت“ تعشق ”رفعت“ .. و ”رفعت“ يموت في ”صفوت“ .. و ”صفوت“ منفض له و مصاحب ”مدحت“ .. و ”مدحت“ ييلمح ”لشوكت“ أنه يبعشق ”حكمت“ .. و ”حكمت“ مرتبطة بعلاقة سرية مع ”هزلت“ وده واحد من بره الاكاديمية بعثلها صورته على ورق كلينيكس فاخر .. عشان كل ما تنف تفكره ..

لاحظت أن هناك مكلمة تليفونية واحدة يقوم بها كل فرد في الأكاديمية يوميًا للحديث مع أهله وغالبًا تنتهي ببكاء مسعور .. و هناك شخص يغادر المكان كل يوم الجمعة .. وقبل أن يغادر تقوم الأكاديمية بعمل حفلة كبيرة – كنت أظنها في بادئ الأمر لتوديعه –، ولكنني طلعت عبيط .. دي حفلة إثبات المواهب وملهاش علاقة بيه .. لأنه ليس من المعقول أن كل واحد هميشي هنجيله رامي عياش وأنغام ومساري و نوال الزغبى والشاب خالد عشان يودعوه .. ميغور ولا يولع ..

في نهاية الحفلة يغادر ”النوميني لها الاسبوع“ المكان وسط بكاء الأصدقاء لأنهم سيفتقدونه بشدة ووسط بكاءه هو شخصيًا لأنه لن يحضن ولن يبوس بعد اليوم .. لا يزال هناك تلك الأم الحنون، الرؤوم، ذات الهوت شورت، والتي تعتبر الأحضان وصلة الرحم هما غذائها الأساسي في الحياة .. فهي قد

تموت محروقة ومتفحمة إن لم تحتضن السناشر واحد اللي في الاكاديمية مرتين أو ثلاثه في اليوم الواحد .. وكنت يومياً أدون ما أراه من سلبيات .. وأنتظر البرنامج بفارغ الصبر وأدون .. وأشاهد خلسة حلقات البرايم والنوميز وهو يرحلون وييكون ..

ويوماً بعد يوم كنت أقرب من البرنامج أكثر وأكثر .
ويوماً بعد يوم كنت أتابع الأحاديث الجانبية والقبل والقال ..
ويوماً بعد يوم أحسست بشعور عجيب ..
قيء وإسهال .. ورعشة في المفاصل كلما غاب البرنامج ..
وتشنجات في حفلات البرايم .. وكوايس رهيبه قبل مغادرة النومي ليها
الأسبوع ..
أعتقد أنني ..

أصبحت بمتلازمة ستار أكاديمي ..وجدتني شغوفاً بمتابعة البرنامج ولا أعلم كيف !! ووجدتني أشعر بالوحدة كلما غاب أبطاله وغابت عني نعيمهم وتفاهاتهم وهذيانهم وبالتأكيد أحضانهم وبوسهم وهوت شورتاتهم ..
تمكن مني المرض .. وصرت أبحث عن جرعة يومية من البرنامج ..
وقد اعترفت لزوجتي بهذا .. فربتت على كتفي أن هذا هو المتوقع .. فهذا البرنامج بالذات يفعل ذلك مع الجميع .. قلت ليها لقد وصل تعلقي به أنني أفكر جدياً في التقديم للأكاديمية الموسم القادم .. لم تجب زوجتي وإنما نظرت نظرة غير حمية لأنني الضخم وكركشي المتهدل وغادرت وكأنني لم أقل شيئاً، أرسلت للشيخ محمود رسالة على هاتفه بأننا كنا ظالمين البرنامج .. البرنامج مفيد ..

البوس والحضن يبقوي الحميمة والقرابة بين الشباب .. أما الأحاديث العاطفية الجانبية فما هي الا كوميونيكشن سكيلز .. يا لنا من أوغاد ملاعين، وانتظرت الموسم الجديد .. وتابعت حفلة انطلاق النسخة المش عارف كام من البرنامج بشغفٍ شديد .. لا يزال الحضن بتاع الموسم اللي فات موجود .. و نفس الأم بالهوت شورت وابنها الحساس الذي يعاني من الوحدة .. هناك وجوه جديدة .. أرسلت رسالة للشيخ محمود لأثنيه عما يفعله وأنا أتابع الحفلة الاولى وهيلدا الرائعة تقوم بتقديم المتسابقين .. أحمد من مصر .. كاظم الساهر من العراق .. كتالون من لبنان .. سنكليج من سوريا .. عفركوش من السودان حنكوش من اليمن .. مقلتلوش من البحرين .. مشوفتوش من الشباك

تابعت المتسابقين واحدًا تلو الآخر .. بوس وأحضان وهوت شورتات وناس بتقعد فوق حجر بعض .. أنفي ينزف .. ورأسي سينفجر .. وعيناي متورمتان ولحم جلدي يقع وكأني مصاب بالجذام .. نظرت إلى زوجتي بعينين باكيتين أطلب منها النجدة من هذا الوباء .. أما هي فكانت لامبالية بحالتي المتقدمة من هذا المرض وكانت تزلط الفشار جوه بؤها باستمتاع شديد .. وبطرف عيني كنت أُلح اتصالات الشيخ محمود المتتالية على الموبايل .. ولكنه لم يكن ليذكر أنني وصلت في المتلازمة لمرحلة ميئوس منها .. مرحلة الالعودة .. وأني - أبداً - لا أستطيع الرد .. لا أستطيع الرد ..

إنت عيل تمانيناتي

أعتقد أن جيلي - جيل الثمانينات - هو أكثر جيل مظلوم في الدنيا كلها فنحن لم نشهد فترة السبعينات حيث فرحة النصر بحرب أكتوبر وعودة سيناء، ولم نُولد في التسعينات حيث ضربة جزاء مجدي عبد الغني في مرمى هولندا .. نحن جيل وُلد مع تولى مبارك مقاليد الحكم .. وانتصف عمرنا مع رحيل مبارك عن الحكم .. تبقى الشعوب للأبد ويتوالى عليها الحكام .. ومبارك يبقى لتتوالى عليه الشعوب .. ولأننا لم نر غير مبارك .. ولم نعرف غير مبارك .. ولم نشهد غير مبارك .. فهتلاقينا كلنا طالعين شبه بعض .. نفس السحنة التامة .. ونفس الضحكة الحزينة .. ونفس الملامح المتشابهة .. ونفس الحنين لمفردات الحياة التي كانت تميزنا فيما سبق .. إنه يا عزيزي جيل الثمانينات المغلوب على أمره ..

التمانيناتي مثقف بعض الشيء .. فهو لم ينزلق لهوة الفيديو جيم و الننتدو كالتسعيناتي، ولم تلحس البلاي ستيشن والفيس بوك والانترنت دماغه كالألفيناتي .. إنه محدثٌ لبق .. وقد تسبب التصاق مبارك في قفا التمانيناتي بعقدة نفسية .. جعلته أفضل من يتحدث عن تاريخ الحكام الذين لم يرههم .. فإن كان الخمسيناتي والستيناتي هو أفضل من يحدثك عن فترات مصر السابقة من أحداث وحكام وثورات - ومرجعيته في ذلك ما رآه بعينه وما

سمعه بأذنه - فإن التمانيناتي هو أفضل من يحدثك عن تفاصيل التفاصيل والتي قد لا يعرفها الخمسيناتي أو الستيناتي نفسه .. ومرجعيته في ذلك برنامج اختراق لعمر الليثي، و فيلم أيام السادات للراحل أحمد زكي، و أيضًا مكتبته المليئة بكتب محمد حسنين هيكل وأنيس منصور .. يمكن للتمانيناتي أن يحدثك بطلاقة عن غموض مقتل عبد الحكيم عامر أكثر من عبد الحكيم نفسه .. ويمكنه أن يناقشك في بنود اتفاقية كامب دايفيد أكثر من وقعوها بأيديهم .. يمكنه أن يُغرق آذانك بأسرار حرب أكتوبر ، وثغرة الدفرسوار، و خط بارليف وغيرها .. إنه أكثر من قرأ عن الفترات السابقة لأنه لم يعيشها .. إنه كمن يرى صور والده الذي رحل قبل ميلاده ليحكي عنه للآخرين .. إن كنت تمانيناتي فستعرف ما أقول .. أما إن لم تكن تمانيناتي فبال تأكيد ستجد لديك تمانيناتي بهذه المواصفات .. أما إن لم تكن تمانيناتي وليس لديك صديق تمانيناتي فاقن واحدًا منهم لأنهم أوفياء وفي طريقهم للانقراض ..

والتمانيناتي أيضًا هو الوحيد من بين الأجيال السابقة الذي يحن لماضيه دومًا .. هناك صفحة شهيرة عالميسبوك بها إعلانات وذكريات لتقليب المواقع على من وُلدوا في هذه الفترة .. ستجد بالصفحة إعلانات شوكولاته كورونا أم خمسة وسبعين قرش وكنا بنقول غالية ومش هنجيبها .. الشوكولاته الجميلة والتي ترمد عليها مواليد التسعينات والألفينات حتى ابتلاهم الله بالكادبوري أم بندق ومكسرات و بأربعة جنيه ومش طاييلنها .. بالفيديو أيضًا إعلانات عن كولونيا خمس خمسات .. ومنتجات الشبراويشي .. وبسكوت ماري اللي بيتسقى في الشاي .. وشريط هشام عباس أيام ما كانت دماغه شبه

الكورة وجسمه زي المربع .. وشريط (علي الضحكاية) لهاني شاكر، وأغاني مصطفى قمر أيام ما كان يفتح قميصه للآخر لكن من غير شعر صدر عشان معندوش .. هناك أيضًا إعلانات اللبان السحري أبو ألوان ألوان يا نهار أبيض .. وشوكولاته جيرسي اللي بتاكل الجو (مش عارف ازاي) .. وشوكولاته كروكيت اللي جواها مادة كده بتشد معاك و بتلرز في حلق البؤ ومتطلعش ولا بسلك المواعين ..

و التمانيناتي سهل إرضاءه .. فهو لا يملك طموح التسعيناتي ولا نمرة الألفيناتي على كل شيء .. لا كان على أيامه فيه بلاي ستيشن، ولا ديش، ولا آي فون، ولا نت، ولا غادة عبد الرزاق .. كانت حلقة أجنبية طويلة في نهاية برنامج اخترنالك كفيفة بإدخال السرور إلى قلبه .. ماتش كورة في نهائي كأس أوروبا على القناة الثانية تجعله يسجد لله شكرًا .. حلقة مازنجر أو غرانديز أو أي انسان آلي بيكسر أي حاجه حواليه كانت كفيفة بعلاجه من جميع الأمراض النفسية التي يشعر فيها أنه ضعيف ومسحول ومبلول في هذا الزمان العجيب .. إنه يا عزيزي جيل التمانينات الحزين ..

وأخيرًا .. و مع انتصاف عمري كتمانيناتي مخضرم أجديني حالم .. هائم .. موكوس .. متنيل على عيني .. وتختلط عليّ المشاعر أيًا اختلاط .. فرح بأن ثمة عهد جديد سأشاهده .. و أن نصف عمري القادم سيمتلئ بقصص وحكايات لفترة جديدة في بلادي يمكن أن أقصها لأولادي، وثمة ذكريات أخرى ستصنعها الأجيال القادمة وسأضمنها إلى مقتنياتي من أغلفة الكورونا والشمعدان (اللي عمري ما كسبت فيه) والكادبوري والكروكيت اللي بتشد

وحتى يأتي هذا الوقت يمكنني أن أتمص حكمة الستيناتي و السبعيناتي
في ارتدائي بدلة فاخرة، وأن أتمص روشنة الألفيناتي بتسقيطي للبنطلون
وسأكون مختلفًا في تسقيطي عن الألفيناتي .. أصلها بتفرق من تسقيطة
لتسقيطة .. ويكفيني فخراً أيضاً أن جيلي مثابر ومكافح - فهو من أكبر الشرائح
التي شاركت في الثورة - وأن جيلي أيضاً مع كفاحه ومثابرته فهو جيل المزاج
الدافي .. فهو الوحيد من بين الأجيال السابقة الذي يمكنه لعب البلاي
ستيشن بمهارة دون أن يخشى - في دماغه المتكلفة - لومة لائم..
حقاً .. لو لم أكن تمانيناتياً .. لوددت أن أكون تمانيناتياً .

مسلم و مسيحي ايد واحده .. ! بتدي باللُّكية

في أحداث ماسبيرو هتف البعض أن ”الفتنة نائمة لعن الله من أيقظها“ ..
وفي عز الضرب والدم لما كان للركب كتب الكثيرون أن ” الفتنة نائمة لعن
الله من أيقظها“ ..

وفي كل احتقان ومشادة ما بين المسلمين والمسيحيين يصرخ الجميع بأن
”الفتنة نائمة لعن الله من أيقظها“..وأنا مش عارف بصراحه ليه الناس
مصممة إن ”الفتنة نائمة“ رغم إني من ساعة ما وعيت ع الدنيا و أنا شايفها
صاحبة ومفجأة عينها ٢٤ ساعه قدام التلفزيون والنت و عماله تهري في
المسيحي، وتُنكت في المسلم، وتضايق في العسكري ، وتسخر في أقباط
المهجر، و تبعت صور متفبركة و كلام يحرق الدم عشان تولع الدنيا و
تشعللها وهي تبقى مزأططه ومتمزجه آخر مزاج ..

وأنا أعتقد أن سيناريو الفتنة يكرر نفسه، وهيفضل يتكرر، لأنه للأسف
مفيش حل موضوعي للمشكلة .. أحزمة الدولة لا تملك الترياق السحري
لتصفية القلوب و الإعلام بيخدرنا بكلام إنشا عن الوحدة الوطنية والتعايش
و فيديوهات التسامح عن اسحق اللي أنقذ محمد من الموت، و عمرو اللي
خلا الكهرا بتاعت عمود النور تمسك في جتته بدل مايكل و عن زيارة

عمرو موسى الساذجة - والتي ليست على مستوى الحدث - لكاتدرائية العباسية وكأنه رايح ملجأ أيتام، و عن حلقة مني الشاذلي اللي متخيلة أن كوباية العصير هي اللي هتحتل المشكله ما بين القس سمعان والشيخ محمدين، واللي بيتقسموا بعد ما يشربوها بـ ميت أيمان إنه كله بيس يا ست الكل وتنام ومفيش مشاكل خالص .. ولكن ..

ولكن اللي في القلب في القلب .. والكلام بدل ما يبقى في صميم المشكله بقى حوالها .. ونتايجه للأسف عكسية .. فكر معايا هتلاقي أنه كتر الكلام عن ”التعايش“ بقي بيحسس اللي قدامك أنه فيه فعلاً مشكلة عندك في التعايش (على طريقة اللي على راسه بطحه) .. وكتر الأغاني و الرموز والشعارات بقى بيعكس من الناحية الثانية إن الدنيا والعه أساساً وأن أغانيك ورموزك وشعاراتك ما هي إلا تغطية منمقة للي بيحصل دون حل حقيقي لها .. كل مشكلة بقى قصاها أوبريت رخيص يفكر الناس بدل ما ينسبها .. وكل جته لازم يداريها رمز جديد وشعار ظريف يزغل عين اللي شايفها ويجاوط عالم الساييل من كل حته .. لكن مفيش حل موضوعي ولا نقاش جاد على أي مستوى ..

و أنيس منصور – كاتبتنا العظيم - قالك ”ايد لوحدها متسقفش .. لكن ممكن تدي باللكمية“ .. ومن هذا المنطلق أعتقد أنه علينا التفكير في شعار ”مسلم ومسيحي ايد واحده“ .. لأن اللكميات كترت قوي والدم بقى للركب .. ومش عارف احنا ليه وصلنا لهذه الدرجة من صعوبة تقبل بعضنا الآخر؟! .. أنا أعرف أن الهند فيها أكثر من ١٠٠٠ ديانة وطائفة .

هندوس يقدسوا البقر، ووثنيين يعبدوا النار، وبوذيين يعبدوا بوذا
وكوفوشيوسيون يقدسوا الفيلسوف كوفوشيوس إلى جانب الديانات
الإبراهيمية الثلاث، اليهودية والمسيحية والإسلام .. محصلتش في الهند مرة
كمية الدم اللي بنشوفها كل كام شهر عندنا دي .. يمكن مرة واحدة في سنة
من السنين حصلت مذبحة بين المسلمين والهندوس وسالت أنهار من الدم
.. و لكن الناس العاقلة قعدت ولحقت الموضوع .. ليه ؟؟ .. مش عشان دي
الهند يا جماعة (أم الدنيا) .. ومش عشان دي الهند (يعني الصبح بدري) ..
ومش عشان دي الهند يعني جدو ماسك في ايدو حفيدو رايحين يشوفوا
فيلم اميتاب تشان الجديد .. لأ .. عشان حاجة واحدة .. عشان دي بلدنا
و أرواح بتتوت ولو معشناش مع بعض بالرضا هنعيش بالغصب واحنا
الحسرانين ..

و لما قعدت أفكر شويه - وأنا تفكيري عمومًا في المشاكل الاجتماعية
والسياسية ضعيف بعض الشيء، لكن بحب أقرف اللي قدامي طالما عندي
صفحة عالفيس بوك - لقيت أنه السبب الأوحدها مشاكلنا والفتن اللي
بنعاني منها هو أننا - مكصريين - مبقاش نحب بعض زي زمان .. جوانا
طول الوقت كراهية و غضب ومقت واحتقان ولا توجد قناة شرعية لتفريغ
هذه الشحنات الرهيبة .. ولو مش مصدقني انزل الشارع .. أهو الشارع
ده ماكيت صغير لأي فتنة من الفتن اللي أنت بتشوفها .. اتفرج على لهاث
الناس الجنوبي والتشليت اللي يشلتوه لبعض وكأن كل واحد فيهم بيزايد
على الثاني في أهمية وقديسية ما يفعله .. اتفرج على ”الأنا“ اللي بقت عند

كل واحد عايز مصلحته تبقى هي الأهم والأسرع من مصلحة الآخر .. ولو حصل أن ”الأنا“ بتاعتي تتفق رؤيتها مع ”الأنا“ بتاعتك ممكن نتجمع سوا ونعمل احتجاج أو اعتصام ننول بيه المراد ونزود المرتبات والصلاحيات ومفيش مانع اتخلي عنك في النص طالما حد هيقول لي مرادي بمخافيره دون تقديم تنازلات لزوم اعتصام سعادتك .. طب اتفرج على التحرش والمعاكسات .. وهاتلي بنت عارفة تمشي في حالها من غير ما تلاقي محافظة ماشية وراها .. اتفرج على سب الدين، و النفسنة، والحق، و جر الشكل اللي بقى في كل مكان .. هتعرف أنا بقول آيه .. طب الكبت والغضب ده كله بيطلع فين ؟؟ .. اتفرج على مائشات الكوره وقولي كده كام مرة في الشهور الاخرانية للجمهور ساب المدرجات، ونزل أرض الملعب وحذف ازايز وحجارة ومولوتوف وقد آيه عدد الاصابات .. ده كان بيحصل زمان ؟؟

الغضب والكره والمقت اللي جوه النفوس محتاج بس شرارة .. ومفيش أحلى ولا ”أسرع“ من شرارة الدين .. دي أسرع من الكورة و أكثر قدسية من اللهاث ورا الميكروباصات .. هو الواحد بس يستني خبر صغير .. خبر كده عن مسيحي عدى من جنب جامع .. أو كنيسة مش عايزة يتبني ليها دور خدمات ... أو دار مناسبات ملحقة بمسجد حصل فيها أضرار وأنا أشيط ولا حدش يعرف يوقفني .. وطبعاً بقيت السيناريو معروف .. وأخيراً أذكر إنه من يمكن من سبع سنين وقبل طوفان الفتن الحاصل ده اتصل بيا أحد الأصدقاء من امبابة وقالي احنا عاملين اعتصام قدام الحي وعازينك معانا .. سألتة ليه ... قالي عشان مش عازين يدونا قرار بتوسعة المسجد .. قلت له يمكن للحج أسبابه .. قالي مفيش حاجه اسمها أسباب

هنوسع المسجد يعني هنوسع المسجد غضب عن المسيحيين .. طبعًا معرفتش ايه دخل المسيحيين بالموضوع !! و رحت بالفعل أشوف بس ايه اللي بيحصل ولقيت اعتصام رهيب جدًا .. وبعد أيام صدر قرار من الحجي - أو من المحافظة مش عارف - بتوسعة المسجد .. الغريب أنه مطلعش فيه مسيحيين في الموضوع ولا حاجه .. دي مجرد اشاعات لجمع أكبر عدد من المسلمين للاعتصام قدام الحجي .. مھو لو قلتلك تعالي اعتصم عشان توسعة مسجد مش هتيجي .. انما لما قلتلك ده فيه مسيحي بيعند معانا ومش عايزنا نوسع المسجد اكيد هتيجي وتجب عيلتك كلها .. واللي أكد لي الكلام ده أنه بعد ما المسجد اتعمل ملاقتش ولا حد من المعتصمين بيصلي فيه ...
بيتهألي من القصة الصغيرة دي تعرف أنا عايز أقول ايه ...

بيقولك معنديش برنامج انتخابي

وهو عنده جooooooooooooووه

لا أفقه شيئًا في السياسة ولا أحبها على الإطلاق .. وأقصى علاقتي بها لا تتعدى تغيير صورة بروفيلي عالفيس بوك - كل فترة - لتتماشى مع أحداث الساعة .. فأبدو أمام الناس وكأني من المتابعين والثائرين والسياسيين المخضرمين .. فقبل الثورة كتبت أني ”معارض وخلص“ ثم وضعت صورة ”خالد سعيد“ .. و في أثناء الثورة كتبت أني ”ثائر وخلص“ ثم وضعت ”علم مصر و ٢٥ يناير“ .. أما الآن فككتبت أني لم أعد أفقه أي شيء في أي شيء على الإطلاق ثم قمت بإغلاق الأكونت الخاص بي نهائيًا ..

وهكذا كنت سياسيًا فيسبوكيا مخضرمًا .. وهكذا كانت آرائي السياسية .. لا تدوم فترةً أطول من فترة الأبلود لصورة الحدث، ولا تعيش قدر ما تعيش هذه الصور على البروفایل، ولا أذكرها - أي هذه الآراء - إلا بقدر تذكري لفولدر مجهول تائه في غياهب الوندوز ..

وأذكر أن خيبتني السياسية قد آلمتني للمرة الأولى عندما قرأت أن المجلس العسكري كان قد قرر تحديد شهر نوفمبر من عام ٢٠١١ موعدًا لانتخابات مجلسي الشعب والشورى .. فأنا في حياتي كلها لم أنتخب أحدًا في مجلس الشعب هذا .. ومعرفتي بأسماء مرشحي دائرتي طوال السنوات الماضية لم

تتجاوز معرفتي بأسماء طاقم العلاج الطبيعي لمنتخب كرة القدم
لتنشيكوسلوفاكيا في كأس عالم سنة ٦٦ قبل أن تنفصل هذه الدولة إلى
(تنشيك) و(سلوفاكيا) فيزداد الطين بلّة .. على أنه في الواقع لم يكن هذا أكثر
ما يخيفني .. فالمصيبة الأكبر هي فيمن سأختاره لرئاسة بلادي !! .. وعلى أي
أساس ؟! .. فالمرشحون أكثر .. وآراهم متشابهة .. وكلهم يعدّون و يقسمون
بالوفاء .. وليس لي إلا الاستماع والإنصات ..

و أذكر أنه في الأشهر الأولى للثورة - وعندما لم تكن الساحة عامرة بعد
سوى بالقليل من المرشحين - سألت أحد أصدقائي المخضرمين ممن يفردون
قلوعه كلما وجدوا فرصة لا بأس بها للتحدث في شئون الوطن - عمن ينوي
انتخابه رئيساً للبلاد .. فرد بلا تردد : الفريق أحمد شفيق .. سألته لماذا وهو
من النظام السابق !! قال لي أن الفريق أحمد شفيق (راجل محترم وبسيط
ومن طينتنا .. فهو لا يتأنق كأولئك الأوغاد ذوي الكرافات والبذل ..
فلتأمله !! .. انظر كيف يتكلم ؟! .. انظر لهدوء صوته و رزاقته .. إنه كأبيك
تماماً ولتحل بك اللعنه إن لم يصلك هذا الإحساس .. بل انظر كيف يفتح
زرار القميص الفوقاني من تحت البلوفر .. إنها الحركة التي لم يجرؤ أن يفعلها
سابقوه .. لا تقل لي إن الكرافات تمنعهم .. إن هذه الحركة وحدها - أي فتحة
القميص تلك - كفيّلة بأن تجعله منافساً شرساً على الرئاسة إن لم يفز بها)
اندهشت .. ولكن وجدت أن منطق هذا الصديق مكرر مع أصدقاء آخرين
مع اختلاف صورة البروفایل .. فقد خسرت منذ فترة صديقاً آخر لبعض
الوقت لمجرد أنني كسياسي محنك لم أبدأ حماسي للشيخ حازم صلاح أبو
اسماعيل كمرشح لرئاسة الجمهورية، ولم أضع صورته كبروفایل بكتشر لبعض

الوقت .. أخبرت هذا الصديق أي أقدر الشيخ صلاح، و أتابع بعض برامجهم بالفصائيات وأحبه كرجل دين، ولكن أن أُنخبه كرئيس جمهورية فهذا له اعتبار آخر .. وهذا حتي .. قال لي : أولا تحب الدين ؟! .. أو لا تريد مصر اسلامية ؟! .. عاجبك اللي البنات عاملينه ؟؟ عاجبك الكباريات ؟؟ عاجبك الانحلال اللي وصلنا له .. أخبرته أي أثق بنيتي، ولكن ما أدراك بقدرته ؟! .. فضلاً عن أن حبي للدين يجعلني أفكر ألف مرة قبل انتخاب رجل دين كرئيس جمهورية .. فخطأ الشيخ هيكون في وش الدين .. فالناس في بلادنا لا تفرق بين الدين وأتباعه .. إنه نفس منطق : (انظر انه يشرب الخمر ويلعب الميسر .. هذا هو الاسلام) .. ناهيك عن أي بعد لا أعرف للشيخ صلاح - أو غيره - برامج انتخابية واضحة .. الكل يتكلم حالياً بلا خطة حتي إن كان لديه هدف ..

الغريب ... أنه مع كثرة الأحاديث مع أصدقاء آخرين وتبادل وجهات النظر اكتشفت شيئاً عجيباً .. وهو أن قناعات الكثيرين في اختيارهم لرئيس الجمهورية لا تعتمد على إيمانهم ”بمهنية“ المرشح بقدر ما تعتمد على احساسهم بأن ”شكله“ ينفع .. و أن ”كلامه حلو“ .. وأنه ”مننا وهيحس بينا“ .. وأنه ”لمس وتر جوانا“ - وما أكثر أوتارنا التي تحتاج للمس .. إن سطحية الكثيرين منا في اختيار الرئيس هي نتيجة محتومة للفراغ المنطقي والعاطفي الذي نشأ بين الشعب وبين رئيسه السابق الذي لم يكن هو، ولا حاشيته، يشعرون بنا وبآلامنا .. إذن فلنختر من يشعر بنا ؟ .. ومن يا ترى سيشعر بنا سوى الأقرب لنا ؟ و من يشبهنا ؟ .. و من هو من طينتنا ؟ .. و لا تحدثني عن المهنية .. فلتذهب بها إلى الجحيم ..

ولذا فلا عجب أن ينهر الكثيرون في البداية فقط بالفريق أحمد شفيق لارتدائه بلوفر وقميص ونظاره طبية بسيطة تغلب بها على الصورة الذهنية التي حُفرت بعقولنا بأن الأعداء من النظام السابق هم أولئك المترفين الأغنياء ذووا الكرافات والبذلات الراقية .. وأكد أجزم أنه لو ارتدى شفيق بذلة في لقاءاته بالفضائيات لُقُبض عليه قبل دخوله الاستوديو .. إنه نفس المنطق الذي جعل شعبية رئيس الوزراء السابق عصام شرف ترتفع للسماء بعد أن رصدته الكاميرات و هو يتناول فطوره بمطعم التابعي وحوله المؤيدين يطالبونه بالترشح لرئاسة الجمهورية ... أيه ده ؟ .. ده زينا!! .. بياكل فول وطعميه!! .. وييدي بقشيش كمان!! .. يبقى أكيد هيحس بينا لو انتخابه رئيس جمهورية .. و أيضًا هو نفس المنطق الذي يجعل شابًا ملتزمًا يؤيد الشيخ حازم صلاح أبو اسماعيل حتى لو كان الشاب مقتنعًا بأن الشيخ حازم ليس لديه من الخبرة أو حيثيات الإدارة أو القيادة لأن يقود بلدًا بحجم مصر هو احساسه فقط بأنه قريب منه كقربه من إمام الجامع الذي يصلي خلفه ويخطب به الجمعة و أنه بالتأكد سيتواصل معه ويشعر به لأن لكليها نفس ولكنه الكلامية ونفس القنوات و نفس الأهداف (وحتى إن لم يكن لكليها القدرة على تنفيذها . هو فقط الاحساس بوجود شيء مشترك بينهما)

و لعل هذا المنطق أيضًا يفسر لم كان يتخوف الكثيرون البرادعي قبل انسحابه من سباق الرئاسة ... فالرجل رغم ثقله السياسي لم يعرف من أين تَوَكَّل الكنف .. فقد أحاط نفسه دون قصد بطبقة هائلة من المثقفين والفنانين والإعلاميين، و مضى يتكلم في الفضائيات عن إعادة العلاقات مع الغرب و الاقتصاد العالمي والتحالف الاقليمي فأنشأ دون أن يدري حاجزًا وهميًا بينه

وبين الطبقة الفقيرة و المتوسطة والتي شعرت أن هذا الرجل "مش مننا" و "مش من طينتنا" وأنه "من امتي وهو بيعبر مصر" .. وأعتقد أنه لو كان بادرنا البرادعي بارتداء جلباب بسيط واصطحب كاميراته إلى العشوائيات و حدث قاطنيتها عن أن كيلو الرز سينزل جنبيين مع إضافة بند السمن البلدي على بطاقة التموين لبدا للفقراء أكثر جاذبية و لأكتسب قلوبهم قبل أصواتهم.. أنا مؤمن بأنني لن أأنتخب رئيسًا لمجرد الاحساس وبأنه "شبيهي وهيحبي" .. أخشى أن أأنتخب الدبة التي تحبني فتقتلني دوغما قصد .. و أعتقد أنه حتى يأتي يوم الانتخابات* - إن جاء - فإنني سأعزل العمل السياسي - أي كثرة تغيير صور البروفایل تبعًا للأحداث .. فقد أصبحت السياسة مرهقة لي ولأصابعي التي ترتعش عند تغيير صورة البروفایل أو للدفاع عن قناعاتي باختيارها .. فليس ثمة ما هو أسوأ من أن أستيقظ كل يوم لأجد حربًا جديدة بانتظاري على الفيس بوك مع الأصدقاء الذين قد تحولوا بقدرة قادر إلى ٢٤٠ برادعي و ١٠٠ أيمن نور و ٧٠ أبو الفتوح و ١٣٤ حازم أبو اسماعيل و ١٢ إليسا .. و ١٠ آخرين يتركونها سوداء لأنهم يمتنعون عن التصويت ..

* كُتب المقال قبل انتخابات الرئاسة ٢٠١٢

عمي .. ممكن أعض أيد بنتك

يقول الأستاذ روبرت فروست - وأنا قلت أستاذ لأنني بصراحة معرفش هو أساسا دكتور ولا مهندس ولا خريج معهد سنتين ولا ايه بالضبط :

”تنفق الأم عشرين عامًا لتجعل من ابنها رجلاً، ثم تأتي امرأة أخرى وتجعل منه أحمقًا في عشرين دقيقة”

والأخ فروست عنده حق .. مكذبش الصراحة .. ده فيه ما تجعله أحمق و همه لسه يلبسوا الدبل .. ويمكن قبل كده كان .. بيتقي فعلاً أحمق أو ابتدى يحرق شويه عن الأول ولونه يروح .. ولما قلت المقوله دي لزوجتي العزيزة اعترضت .. قالت لي طب هاتلي كده ساعة رولكس بفصوص كريستال ومعاها ستوب ووتش وهنشوف هتبقى أحمق بعد عشرين دقيقة فعلاً ولا لأ !! .. فروست ده كذاب ومعتقد نفسيًا .. ده كان رأيها ..

ولو كنت مع الأخ فروست لاقتحرت عليه إضافة بطعم المايونيز لحكمته الذهبية .. فاذا كانت المرأة هتتحول الرجل لأحمق في عشرين دقيقة .. فأبو المرأة وأمها - الحموين - ممكن يجننوه ويقطعوا خلفه في لمح البصر .. واللي خلاني أقول كده أنه اتصل بيا أحد الاصدقاء وهو منهار تمامًا بعد ما اترفض في الجواز الأخرانية .. قبل كده كان بيترفض عشان مناخيره شكلها مش عاطفي و إنه بيعجب شعره على جنب .. لكن المرة دي الرفض كان خارج

عن إرادته .. كان سببه الشبكة .. الأب طالب ٥٠ ألف جنيه .. ويقول
ان بنته مدلهه و أصلي وبالورق بتاعها .. الولد قاله كثير .. أبوها قاله خلاص
يا ابني ولا تزعل نفسك .. خد اختها الصغيرة .. بـ ٢٥ الف بس .. بس
من غير ورقها .. صاحبي حس بقلق وانه داخل بيت غلط وان ده مش أب
يجوز بناته .. لأ .. ده واحد يفاصل على كبوت عربية .. قام الصديق واخذ
الازارتين زبادو الخوخ اللي كان جايبهم معاه هدية ومشى بعد ما شتمهم
شتايم ايحه جداً يعف مقالتي العظيم عن ذكرها ..
ومش دي أول جوازة لصديق تتفشك بسبب الشبكة .. جوازات تانيه
كثير اتفشكت بسبب موضوع الشبكة وموضوع الشباب اللي بتجيب
شعرها على جنب ..

وأنا مش عارف ليه الدنيا كلكت في الجواز كده؟! .. زمان كانت الشبكة
هي هدية العريس للعروسة وكانت بسيطة لأن معناها أكبر و هو : ”
بحبك يا قلبي ” .. انما دلوقتي الشبكة بقت كبيرة قوي وغالية فبقى معناها ”
آآآه يا قلبي ” .. و حديثاً جداً بقى العريس ييقدّم الشبكة لعروسته وعينيه
بتقول: ” بحبك يا قلبي .. بس لما اتزنق في يوم واعوز قلبي ده يا ريت
تديهوني بدل ما اعلم عليكى وعلى أبوكي .. قشطة؟ ” ..

واللي بيحصل فعلاً إن الزوج بعد يوم واحد من الجواز بيتزنق في الفلوس
.. زمان كانت الزوجة عظيمة ومتعاونة .. كانت من غير ولا كلمه تقوم فاتحة
الدولاب جايبه الذهب وقالعه الغوايش والكردان والحلقان والحركات وحاطاهم
في حجر الزوج وهي في تمام الرضا والسعادة .. انما دلوقتي موضوع تضحية

الزوجة بشبكها انعدم تمامًا .. فيه أسباب بتقول لأن الدولار اللي الزوجة بتجيب منه الشبكة معادش موجود أساسًا .. وفيه ناس بتقول ان الحجر بتاع الزوج اللي بتتري فيه الشبكة هو اللي مش موجود .. الزوج بتاع الايام دي معندوش حجر .. لأنك بتلاقي بطنه لازقه في فخده عدل لأنه صحته باظت ومبقاش يلعب رياضة من كتر الاكتئاب .. و لو اتوجد الدولار والحجر فالزوج في هذا الزمن ميقدرش يقرب من شبكة مراته اللي بتبقى حاطاها في أكياس بلاستيك بدل الدولار — مش صدفة طبعًا لكن عشان تفكره باللي ممكن يتعمل فيه لو قرب منها .. عشان كده الزوج دلوقتي بقى ياخذها من قاصرها ويقوم بايع كليته .. أو حتة من كبده وشوية قواص .. واحتمال بيع أعضائه التناسليه لان ملهمش لزمه بعد ما قطع الخلف من يوم ما اتجوز .. وذلك فأنا رأيي الشخصي إن احنا نستغل الثورة اللي فيها البلد ونساعد الشباب تتجوز بتغيير مفهوم الشبكة ده .. محو يا نوفر الشبكة .. يا نلغي الجواز .. يا نعمل لنفسنا سندوتشات حلوة بالقشطة .. ولو الناس معترضة ع الإلغاء ممكن نستبدل الشبكة بحاجه تانيه مفيدة .. فيها ايه لما العريس يخش على أهل العروسة بلاب توب معاه شنطة هدية .. أو فلاش ميموري ٢ جيجا .. أو طقم حلل من قناة الناس .. او حتى جركن مانجه مشبر من فرغلي ؟!! .. أو يحبيلها سيلف ديفنس أو الكتريك شوك عشان القلق اللي البلد فيه .. ولو البت بيئه وبتشم حاجات مش كويسه ممكن يحبيلها مطواة قرن غزال أو سيفين وكركل ..

والله يا جماعة اقتراح عظيم جدًا .. بس احنا نفكر فيه .. الغوا الشبكة خالص .. ويمكن قدام نلغي دبلتين الخطوبة اللي ملهمش أي ثلاثين لزمه

دول .. و نستبدلهم بحظاظات جلد على شكل قلب من البوتيكاات اللي
بتبقى واقفة فيها عيال بتسقط بنطلوناتا وبتحط جل في شعرها اللي أكيد
مبتجيشوش على جنب ..
شكرا مستر فروست ...

ملحوظة : هذه المقالة لا تمت للواقع بصلة وليس بها إسقاط على الحياة
الزوجية للكاتب اللي عايش عيشة زي الفل .. وحسبي الله ونعم الوكيل ..

الفلول الذي بداخلي

أُصِبتُ منذ فترة بحالة من ”الأتخة“ و ”تكبير الدماغ“ عما يحدث حولنا في أرض الواقع .. لم أعد متابعًا جيدًا للأحداث الجارية كما كنت في الشهور الأولى للثورة ، ووجدتني شيئًا فشيئًا انفصل تمامًا عن البرامج التحليلية والحوارية وقراءة الأخبار والجرائد وأتجه لمشاهدة مسلسلات الرسوم المتحركة وبرامج الأطفال وعالم سمس .. و يصاحب هذا ”الانسلاخ“ و ”تكبير الدماغ“ شعور بالقيء من كل اعتصام جديد و بالغثيان كلما فتحت برنامج من برامج التوك شو..

وعندما أعملت التفكير وجدت أن السبب الحقيقي، في حالة الفتور التي أصابتي تلك، هو أنني كشاب لم أتجاوز بعد الثلاثين من العمر لم أعد أستوعب كل هذه الأحداث المتلاحقة .. و أن قلبي النونو لم يعد يحتمل هذا الكم من المصائب المتتالية .. وأن بداخلي صوتٌ خفي يتمنى العودة إلى الماضي حيث زمن المصائب الجميل .. إلى الزمن الذي كانت تحدث فيه في البلاد كل عام مصيبة واحدة كبيرة وجنبا شوية مصايب ثانية صغنططين - مش طوفان الكوارث اللي حاصل دلوقتي ده .. وكان حينها - أي قلبي النونو - بيبوس ايده وش وظهر .. و يقول رضا ..

صارحت أحد الأصدقاء بهذه المخاوف فقال لي أن هذه الأعراض بدأت تدهام الكثيرين بالفعل .. حتى ممن نزلوا إلى التحرير أنفسهم .. إنها أعراض تتمثل في ”الإحباط“ و ”التخوين“ و أن ” ليس هذا ما ثرنا من أجله أيها الأوغاد“ .. وبعض من الذين يشعرون بتلك الأشياء يتمنى العودة للماضي .. هذه الأعراض يا عزيزي – كما قال الصديق – هي أعراض مرض ”الشيزوفرانيا الفلولية ..“ فالـ ”الفلولي“ الصغير الذي بداخلك يستيقظ وينتعش مع هذه المصائب ويتمتع ليحاول التغلب على الشئ الذي انتزع حقه من براثن القلة المندسة .. إنه نوع من الحيرة وعدم التيقن من حقيقة ما يحدث حولنا .. فإذا ما باغتنك هذه الأعراض يا عزيزي فتذكر شعور التحرير والحالة الوجدانية التي كنا فيها .. تذكر وجوه المتظاهرين .. حرب أكتوبر .. و جون عمرو زكي في نهائي أفريقيا ..

أمنت على كلام الصديق و ولو أي لم أزل بعد في حيرة .. فكيف مع صغر سني أراني لا أطيق سماع المزيد من المصائب والكوارث في حين يتحدث عنها محاورو الفضائيات وضيوفهم – والذين قد يبلغ بعضهم من العمر الستين والسبعين من العمر – يومياً بكل هذا الحماس وكأنهم يروجوا لإعلان شامبو أو مسحوق غسيل فعال الرغبة .. لدرجة أنني أشعر أن اليوم الذي لا يجد فيه هؤلاء المحاورون كارثة، أو احتجاج، أو اعتصام، أو أن لا يجدون من يُذِل، أو يسحق، أو يُحَاكِم، أو يشهد زوراً هو يوم نكد عليهم وعلى اللي جابوهم وأسود من قرن الخروب، و لن أتعجب إن علمت أن بعضهم – إن لم يكن كلهم – يدعون الله بأن يرزق البلاد بمصيبة جديدة

كل يوم لتترجم فوراً إلى حلقات مثيرة و ضيوف مكنزون، و مداخلات تليفونية مفاجئة، وإعلانات تُضخ أموالها في الجيوب، بل و ربما يتسابقون فيما بينهم في اختلاق المصائب واستضافة شخصيات مغمورة تقلب الماء الراكد وتأتي بحكايات ما أنزل الله بها من سلطان لتمنح هؤلاء المحاورين كسباً مهنياً وسبقاً صحفياً على حساب أعصاب المشاهدين..

لا أنكر حبي للوطن وأني مستعدٌ للتضحية من أجله .. ولكن ليس بالضرورة كوني مع ثورة الشعب أن أكون دائماً مع شعب الثورة .. فالمضحي من أجل وطنه يجب أن يوقن أن هناك أرواحاً ستعيش من ثمرة تضحيته .. ولكن ماذا إن كانت هذه الأرواح التي سيضحي من أجلها لا تستحق الحياة من الأساس .. فشهد التحرير يجب أن يعيش تحت راية مبادئه التي ضحى من أجلها الملايين المملينه .. و أنا لفترة طويلة و في تجولي وفي تفحصي في وجوه الناس لا أجد سوى الأفاقين والفتاين والمتشددين ومثيري الشغب و سواقين المكروباص و شباب البوكسرات ومتعصبي الكرة والمجلس العسكري ودينا الرقاصة وسعد الصغير وجمهور تامر حسني والبنات اللي بتلبس مايوهات في شرم الشيخ .. وهو ما يؤكد لي يوماً بعد يوم أن هؤلاء الذين ماتوا في التحرير ضحوا من أجل بلدٍ أخرى وأنهم - وحدهم - كانوا هم الأحق بالحياة .. لا أعلم بالضبط متى حدث لي هذا الانسلاخ عن واقع الثورة وعن الأحداث - ولا أعلم إن كنت سأعود - ولكن بالتأكيد هناك فترة ما .. ساعة فاصلة .. أو هي لحظة حاسمة أدركت فيها أن كل ما حولي

ليس على ما يرام ويجب تصحيحه بأي ثمن .. وعلى الرغم من ذلك فأنا أقاوم ذلك الفلول الناشيء الصغير بداخلي و الذي يرجوني العودة للماضي .. فأنا أفضل حاضِر البلاد مع كثرة المصائب وبعض من التفاؤل عن ماضي البلاد مع قلة المصائب وكثير من التشاؤم .. وإن حدث يوماً و عدت للوراء فالماضي الوحيد الذي قد أتمنى العودة إليه هو الطفولة التي لم يكن يورقني فيها خوفاً على الوطن ، ولم يكن يكدر صفوي فيها تقلب ذلك الفلولي بداخلي .. أن أعود إلى تلك العوالم المسلية الملونة التي انسلخت منها يوماً ما أيضاً دون أن أشعر ليصبح عالمي كله هو جريدةٌ مخيفةٌ ملاءى بالأحداث والكوارث وبلونين فقط .. الأبيض والأسود..

الأيادي الخفية التي تعبت بنبطوناتنا

بعيداً عن الاعتصامات والاحتجاجات و السحل و التدمير بقيت حاسس إنه فيه أيدي خفية أخرى يملكها طرف ثالث تنبثق منه أصابع مندسة تعمل على العبث بمفاتيح كل زوجين سعيدين في مصر - إن وُجدا - و خرب كل بيتين هادئين في الوطن العربي عمومًا - إن وجدا برضه ... ففي الفترة الأخيرة عكف مسئولونا الإعلاميون على حقننا بحقن حارقة من مسلسلات الحب التركية والمكسيكية واللبنانية و اللي ييفط منها اللامور من الشاشة فط ويطلعك لسانه ويقولك يا اللي معندكش لامور في بيتك أنا بقى عندي جوه .. فهذه المسلسلات تسببت في خرب البيوت في كل أنحاء مصر بدءاً من الإسكندرية شمالاً حتى أسوان جنوباً ومن بني سويف غرباً حتى آخر فيصل شرقاً .. ولا علم لي كيف استطاعت هذه المسلسلات النفاذ إلى قلوب الزوجات المصريات والعربيات بهذه الطريقة الناعمة .. فتحت وطأة العاطفة الجياشة والحب الملائكي بين (مهند و نور) وبين (اليخاندرو و ماريا) و بين (فرناندو و روزاليندا) صارت الزوجة المصرية حائرة وتائهة وضائعة فمع كل مشهد رومانسي تتحسس تلك الزوجة قلبها باحثة عن الحب فلا تجده بينما يتحسس الزوج بطنه باحثاً عن الأكل فيجده في الثلاجة، و مع كل تهيدة من الزوجة تقابلها تشخيره من الزوج ومع كل دمعه منها تقابلها سبة منه، و كلما نظرت الزوجة إلى زوجها بعيون دامعه كي تستحثة على احتوائها و ضمها إليه يختلس الزوج النظر بألم إلى كرشه ليذكرها بأن هذا

الكرش هو الحائل الذي يحول بينه وبين احتضانها مسيرة عامين وأنت نازل كده من البطن وطالع على السرة ومنها إلى كرش الزوجة نفسه .. وبأنه – أي كرش الزوج – هو الذي قتل العاطفة قتلاً بعد أن استمر في التضخم وفضل يقب لفوووق (بعد ان استنفذ مساحته من القبان لقدام) حتى وصل للقلب نفسه ففحص مركز الحب فيه فعص السنين لموت اللامور بداخل صدر الزوج التخين و بحيث لم يعد مجدياً إحياءه من جديد و لنتهي الرومانسية بين هذين الزوجين تماماً مع انتهاء المسلسل التركي بنصف مليون حالة طلاق في مصر منهم ٢ مليون زوجة انفصلوا فعلاً والباقي سابوا بيوتهم وباتوا عند أهاليهم في بولاق أبو العلا ..

و لم يكتف الإعلام و أصابعه الحبيثة بذلك .. فلهؤلاء اللي محوqش معاهم الحب الهاديء ومخرش بيوتهم اللامور التركي بنقدم لهم نوع آخر من الحب المشطشط .. اللامور السبايسي .. الحب المكسيكي يا عيوني .. فال(ليخاندرو) الشاب الوسيم واللي ”مفيهوش غلطة“ (وهي الكلمة اللي أي قالتها قبل ما أبويا يرمي عليها يمين الطلاق) أصبح معشوق الفتيات والسيدات والمطلقات والمنحرفات بل و أيضاً من فرط وسامته أصبح معشوق العيال اللي مش تمام و اللي من نوعية (راجل يا حسام) ... و أذكر أني كنت مرة واقف في المترو وسمعت حوار ما بين بنتين في ثانوي ..بت يا سارة!! .. شوفتي امبارح الواد الليخاندرو يا بت ؟! .. يا لهوي يا لهوي يا لهوي .. ده عايز يتباس بوووس .. ايووااااه على حلاوة أمه .. والله يا هبه الحاجات دي مش بتشتغل عندنا في البيت .. أي بتخاف على

أبويا لينحرف من الستات اللي فيها ..
مهي أي برضه كانت بتخاف على أبويا من الانحراف .. بس في الآخر
شغلناها ..

وأقع أمك ازاي ؟؟

ما أقنعهاش .. طلقها .. وقعد يتفرج معايا زي البرنس ..
بصراحه كان نفسي أسمع بقيت الحوار لكن بنتين الثانوي المولعتين
باليخاندرو وحلاوته نزلوا محطة المعصرة .. بينا ظللت أنا أبحث عن ميهتم
بوسامتي وحلاوتي فلم أجد إلا عامل المترو داخل عليا .. وبينهني أنا
وصلنا لآخر محطة في الخط !!!

ونعود للسلسل المكسيكي لنجد أنه يتميز بميزتين مهمين جداً لخراب البيوت
.. أول حاجة إن حلقاته بتوصل إلى ٢٠٠ أو ٣٠٠ حلقة .. وفي ذلك حكمة
.. فالزوجة المصرية اللي انشغلت يومين في عمل عكاوي لجوزها وراح عليها
الحضن الساخن ما بين (اليخاندرو) و (ماريا) في الحلقة رقم ١٠٠ مش
هيفوتها كثير لأنها هتلاقي نفس الحضن مستمر في الحلقة رقم ١٥٠ .. ولكن
مش شرط يكون ما بين (اليخاندرو) و (ماريا) .. ممكن ما بين (اليخاندرو)
وأم (ماريا) أو أختها .. أو أبوها .. أو صاحبه الأنتيخ (فرناندو) .. ميجراش
يا عم عادي .. ودي الميزة الثانية في المسلسلات المكسيكية .. وهي إن صلة
الرحم عندهم عالية جداً .. أي والله .. كله الناس بتحضن كل الناس بطريقة
تضايق كل الناس .. وعشان كده بيحتوي المسلسل المكسيكي على عدد لا
بأس به من الأبناء غير الشرعيين اللي مش عارفين تبع مين دول ..

تبع انخاندرو و لا ماريا ولا محمد ولا المخرج ولا المنتج ولا أنهي مدعوق اللي عمل عملته المهيبة دي و هرب .. والأنيل إن الأب ممكن يكون هو نفسه عم الولد ابن الخطيئة ده .. وممكن يكون برضه أخوه أو أمه أو بنت خالته .. وارد جدًا .. وعمومًا بتخلص معظم المسلسلات المكسيكية إما بالزواج العرفي أو بانتحار كل الممثلين .. أما الأبناء غير الشرعيين فيبدوروا على عقود عمل في مسلسلات مكسيكية أخرى من نفس القطعية .. وعشان منبعدش كثير أنا بصراحه مش عارف ليه الرومانسية ماتت ما بين الرجل المصري والمرأة المصرية؟! .. وليه لجأت الزوجة للحصول على الحب من المسلسلات التركية والمكسيكية .. وراح فين أصلاً الحب البريء والإعجاب بين الشاب والفتاة في مصر .. أنا أذكر زمان لما كان الواحد بيعجب بواحد كان بيتقوم مقرب منها و يقولها الكلام الجميل اللي كنا بنسمعه ونشوفه في الأفلام: "أنا معجب بيكي و عندي كلام كثير عايز اقولهولك يا ريت نقعد في حتة هادية عشان اقدر اصارحك بمشاعري" ..

مش عارف ليه دلوقتي معادش فيه كده ؟؟ هل عشان مبقاش فيه إعجاب أساسًا .. ولا عشان لما يقرب منها وهيبتدي يكلمها بيلاقيا مطلع السيلف ديفنس وباخاه في وشه جايباله عاهة مستديمة في مناخيره في ظل الظروف المتعدلة اللي احنا فيها .. ولا عشان الحتت الهادية اللي عايز يصارحها فيها بمشاعره بقى المينيم تشارج بتاعها غالي السنين فيختصر ويكتب عليها عرفي حيث لا مينيم تشارج و لا دياولو وانما ورقة بتتكتب ووراها موال أزرق .. ورغم كده كثير من اللي أعرفهم قالولي إن العاطفة بتتوت عند الرجل؛ لأنه بيكتشف إن الجواز كان العائق الأكبر لطموحه فبتحصله صدمة عصبية ..

واللي أثبت لي الكلام ده إن أحد الاصدقاء قال لي إنه طموحه قبل الجواز كان بيتلخص في إنه يترقى في الشغل ويحيب فلوس ويكمل دراساته العليا في أوروبا أو أمريكا .. لكن من ساعة ما اتجوز راحت الحاجات دي كلها وبقى غاية طموحه إنه يلاقي عيش من أبو سمس في القرن اللي تحت بيته .. وفي النهاية أتمنى من الله أنه يهدي سر الجميع ويرجع الرومانسية للأزواج والزوجات بعد ما يكسبهم مناعة ضد كل المخططات .. حيث إن إعلامنا الحثيث لا يهدأ ولا يكل ولا يمل .. فلهؤلاء الأزواج الحلايف اللي محوقش معاهم (الحب التركي) أو (اللامور المكسيكي) بيقدم لهم الإعلام حالياً ما يسمى بـ : (الفقع المصري) و المتمثل في توفيق عكاشة و عمرو مصطفى و أحمد زبايدر و ده لي عشان متخريش بيته أهو على الأقل يتقطع خلفه بعد ما يحيله القولون العصبي و الشلل النصفي .. رينا يهدي سر الجميع .. و يبعد الأيدي الخفية .. عن بنطلوناتنا .. وبنطلوناتكو ...قولوا آمين .. وكل عام وأتم بخير ..

الفرق بين بروفایل الشاب الخاطب والشاب المتجوز

(مقال خفيف عن الفيس بوك)

قال أجدادنا القدماء أن الرجل من غير ست زي البوست من غير
كومت، والفيس بوك ده مراية الرجل والست، و دي مش مقالة ساخرة
بقدر ما هي رصد لشوية ملاحظات فعلا شوفتها لاختلافات في البروفايل
الخاص بالشاب الخاطب والذي يتحول بعد ذلك - بقدر الله وحكمته - إلى
شاب متزوج لا حول له ولا قوه ..

صورة البروفايل

- في فترة الخطوبة

ييحط صورته هو و خطيبته، النظرة الحاملة و الابتسامه عريضة، وشهم
قريب قوي من بعض قاعدين في جنيته أو في مناسبة اجتماعية أو في
مطعم شيك وتقريبًا صورة البروفايل بتتبدل كل ٥ ثواني ولو انت
بطيء كل عشر ثواني

- بعد الجواز

أي منظر طبيعي مهديء للأعصاب
والصورة مبتدبلش خالص .. يعني ممكن فريندز عنده يموتوا وبروفايلاتهم

تتحلل والمنظر لسه محطوط مفيش أي مشاكل ..

أنواع البیدجات المشتركة فيها

- فترة الخطوبة

مفاجآت الفالاتين

أفكار عصرية لعش الزوجية

أفراح الفنانين والفنانات

٥٠ طريقة مبتكرة تفاجيء بيها خطيبتك

- بعد الجواز

ابتسم يا ابن الكئيبة

فضايح الفنانين والفنانات !!

٥٠ طريقة مبتكرة تتخلص بيها من مراتك

أغاني عمرو دياب اللي يبشيرها عالفيس

- فترة الخطوبة

يبشير خد قلبي معاه

و يبشير عودوني عليك أحبك

و يبشير قمرين دول ولا عينيك

و يبشير آه بعد الليالي

و يبشير ليلى نهاري

- بعد ٥ سنين جواز

يبشير صفحة كارهي عمرو دياب

أنواع الموسيقى اللي بيعتها عالفيس

- فترة الخطوبة

موسيقى كلاسيكية متركة على فيديو رومانسي لمشاهد من مسلسل نور
ومحمد موسيقى فيلم تيتانيك ده أساسي (والا مبيقاش مخطوبين) .. و
موسيقى Yanny و Era

- بعد الجواز

تتر المال والبنون .. وليالي الحلمية .. وأغاني علي الحجار اللي اتعاون فيها
مع الشاعر سيد حجاب

أنواع الجروبات الدينية اللي بيخش عليها

- فترة الخطوبة

الجنة في بيوتنا لـ (عمرو خالد)
أسعد الأزواج (مصطفى حسني)
- عد الجواز

كتاب (لا تحزن) للشيخ عائض القرني
وصف الجنة للشيخ عمر عبد الكافي
اصبر ولك الحور العين . للشيخ محمود المصري

أنواع الأفلام العربي اللي بيعمل لايك عليها

- فترة الخطوبة

عمر وسلمي ١

عمر وسلمي ٢

عمر وسلمي ٣

عمر وسلمي ٤ (اللي لسه منزلش)

عمر وسلمي ٥ (اللي عمره ما هينزل)

كل أفلام مصطفى قمر ومحمد فؤاد وياسمين عبد العزيز وأحمد حلمي وأحمد عيد

- فترة الجواز

مبقاش يتفرج على أفلام

الجميز اللي بيلعبها

- فترة الخطوبة

Farm Ville

- فترة الجواز

Farm Ville

City Ville

Treasure Island

Mafia

Empire and Allies

Adventure Puzzels

و عامل اكوتات وهمية كثير عشان بيعت لنفسه مقشات وجواميس وطاقه
وييلعب كمان لزمايله وواصل لمستويات خيالية

أنواع الكومنتات

فترة الخطوبة بتلاقيه باعت كومنتات فيها قلوب كثير وكلها فرانكو
وبالانجليزي وضحك ولعب ..
بعد سنة جواز ، مبقاش يعمل كومنت ، بيكتفي باللايك
بعد خمس سنين جواز بيقل الأكونت خالص
أنواع الحاجات اللي بيعتها عالفيس
فترة الخطوبة : أغانينكت....صور.... فيديوهات مضحكه.... وعامل تاج
لخطيبته
بعد الجواز : أغاني....نكت... صور.... فيديوهات مضحكه...وعامل بلوك
لمراته

الحالة الاجتماعية

- قبل الخطوبة
In relationship
في الخطوبة نفسها
Engaged
- بعد الجواز
Hidden

أنواع الألبومات والصور اللي عنده

- فترة الخطوبة

Me and my fiancée

ده ألبوم ليه مع خطيبته في مناسبات عديدة (٥٠٠ صورة أو أكثر)

ad'el aw³ Me ma³

ده ألبوم ليه مع شلة الساحل والعين السخنه (٢٠٠ صورة أو أكثر)

Me with el ma²ateee³

ده ألبوم ليه مع صحابه أيام الكلية (٤٠٠ صورة أو أكثر)

- فترة الجواز

مفيش ألبومات .. هي صورة واحد لو شه وعامل كروب للكرش و باقي

الصور مناظر طبيعيه وصور حيوانات ..

أنواع الإيفنتات اللي بيحضرها

- في الخطوبة

Is Attending

حفلة عمر خيرت بدار الأوبرا

Is Attending

رحلة العين السخنه لفردين (فطار + غداء) ١٠٠ جنيه

Is Attending

محاضرة معز مسعود (كيف نختار أزواجنا ونعيش حياة سعيدة)

- بعد الجواز

Is Attending

رحلة العين سخنة لفردين (بس هيطلع لوحده)

Is Attending

محاضرة الدكتور ابراهيم الفقي .. كيف تتغلب على ضغوط الحياة .. فن الإيحاء والتنويم المغناطيسي الاسترخاء بالأعشاب .. فكر مرة أخيرة قبل أن تتخلص من حياتك

صورة البروفایل لما بيعي عيد ميلاد حبيبته

لوجه عيد ميلاد حبيبته في الخطوبة

يحط صورتهم مع بعض جوه قلب وعليها كلام بالفوتوشوب

لوجه عيد ميلاد حبيبته في الجواز

يحط صورة محمد أبو تريكة

صورة البروفایل في عيد جوازهم

- لوجه في فترة الخطوبة

هو فيه عيد جواز بيعي في الخطوبة يا ناصح .. انزل انزل كسفتنا

- لوجه في فترة الجواز

أول عيد بتبقى صورة الفرح .. (يحطها دقيقتين ويشيلها)

- كل الأعياد اللي بعد كده بتبقى الخلفية سودا (وبتفضل لعيد الجواز اللي

بعده)

أنواع الفريندز الي بيعملهم آدد

- في فترة الخطوبة

فریندز عادیین جدا

Is friend with Mohamed

Is friend with Yasser.

Is friend with Yara.

مفیش آي مشاڪل يعنى

- في فترة الجواز


♥♥ ° * ° ♡ ° ° ° * ♥♥

Is friend with ... NeEd love

♥♥ ° * ° ♡ ° ° ° * ♥♥

$$\left[\begin{array}{c} \bullet \\ \circ \end{array} \right] * \sim \sim * \left[\begin{array}{c} \bullet \\ \circ \end{array} \right] \cdot_s \left[\begin{array}{c} \bullet \\ \circ \end{array} \right] , \left[\begin{array}{c} \bullet \\ \circ \end{array} \right] * \sim \sim * \left[\begin{array}{c} \bullet \\ \circ \end{array} \right] \cdot_s \left[\begin{array}{c} \bullet \\ \circ \end{array} \right] ,$$

أنتي ولكن غير عادية ... Is friend with

$$\left[\begin{array}{c} \bullet \\ \circ \end{array} \right] \bullet \circ * \sim \sim * \circ \bullet \cdot_s \left[\begin{array}{c} \bullet \\ \circ \end{array} \right] , \left[\begin{array}{c} \bullet \\ \circ \end{array} \right] \bullet \circ * \sim \sim * \circ \bullet \cdot_s \left[\begin{array}{c} \bullet \\ \circ \end{array} \right] ,$$


Is friend with ...Ana_Moza_awy

أنواع البيدجات السياسية اللي يبخش عليها

في الخطوبة -

كلنا خالد سعيد

أنا من جيل الثورة

نعم لتسليم السلطة للشعب

لا للمجلس العسكري

بعد الجواز

منحرفات تحت العشرين للتعارف والزواج

أكواد سرية عشان تشحن ببلاش

شاهد فضيحة هيفاء وهبي ونانسي بالصور والفيديو

مقاطع بلوووتوووث ساخنة

بس خلاص

ودي باختصار كانت الفروق ما بين بروفایل الشاب الخاطب و الشاب المتجوز و أكيد فيه فروق ثانية أكثر من كده، ولكن لم يسعنا الوقت لذكرها

.. و حيث يظهر هنا دورنا التنويري إن احنا نوضح الحقائق ونهدي النفوس

ونلبس التعيس في المتعوس .. وكان الله بالسر عليمًا .. والسلام عليكم

ورحمة الله وبركاته..

أشوف لايكاتك أصدقك .. أشوف كومنتاتك استعجب

(مقال ثاني خفيف عن الفيس بوك .. استحملونا)

من أكثر الحاجات اللي كانت بتضايقني عالفيس بوك همه الناس اللي يتعاملوا مع (الستاتس) على أساس انها قاعدة تيواليت .. يخش يرجع النكد والقرف اللي جواه في وشنا ويكتب حاجات قمة في الكآبة و الإحباط بعدين يطلع يمارس حياته الطبيعيه ولا كان اللي في التيواليت دول بني آدميين ..

وأنا عمري ما كتبت (ستاتس) نكد عالفيس لأني مؤمن دايماً أن الفريندز اللي عندي ملهمش أي ذنب في أن أبويا طلق أمي، أو أني مش لاقى شغل لحد دلوقتي، أو أن بوكسر قطونيل اللي جبته مطلعش مقاسي ومش ماسك عليا كويس ويبدل من البنطلون .. عمري ما أعمل كده .. ولكن مؤخراً ومن كثر القرف اللي الواحد شايفه كتبت من يومين (ستاتس) فيها احباط شويه وكثيية حبتين .. وهنا اتفاجئت بحاجة عجيبه .. تعليقات من ناس بعزهم جداً يسألوني مالك ؟! .. و أيه اللي حصل ؟ .. وساعتها بدأت أرد و وأتكلم .. ومن هنا - من هنا بس - حسيت إحساس جميل .. ان الهم بينزاح شويه بشويه .. ومع كل لايك متين وكل كومنت ظريف بحس أن دماغي بتروق و قلبي بيصفي .. و كل ما تزيد الكومنتات بعرف أني مش لوحدي وفيه ناس

مشاركاني همي .. وأنا كان تعليق البنت عندي بـ ١٠٠ ولد بصراحة ..
يعني لما ألاقى واحد صاحبي كاتبلي (يا عم روق) .. (تعالى يا بومبو عالقهوة
أغلبك زي امبارح) ، و (تعالى نشرب حلبسه على كوبري عباس) ومرة
واحدة الاقي بنت كاتبالي : (مالك يا baby فيك ايه بس احكيلى عالشات)
ومع الكومنت بتاعها قلوب كتبيير .. بحس أنه الدنيا مش سايغاني واني
اتولدت من جديد، وأن أبويا رجع لأبي، وأن بوكسر قطونيل بقى ماسك عليا
أكثر من الأول وأن الدنيا مليانه شغل بس انا مش بدور .. فعلطول بعمل
بلوك للعيال السيس دي وأفصح الشات مع البنت الجميله عشان احكيها همي
وافضفضلها عن اللي جوايا وأقدم لها بالمره عرض زواج عالشات كده بدل
ما أعرضه عليها في التليفونات وأضيع وقت ودقايق ممكن أخليها لبنات تانيه
كثير ..

ومن هذا المنطلق بدأت أعتبر أن الفيس بوك هو قعدة التيواليت الخاصة
بتاعتي .. أفتحه أنكد على الخلق بعدين أخرج ثاني فريش وجميل .. وقلت
ساعتها لنفسى .. ليه أنكد على ١٠٠ فريند بس لما ممكن أنكد على ألف
وألفين فريند .. وبدل ما يشاركني في الهم واحد ولا اتنين ممكن أعمل طلبات
إضافه تخلي المئات من البشر يومهم مش معدي وأسود من قرن الخروب لو
قبلوا طلب الصداقة ده .. ومن هنا بدأت طلبات الصداقة تهال على اللي
حظهم تيعس من كل أنحاء الكرة الأرضية ..

وفي صفحتي عالفيس بوك كنت بكتب مقالات ساخرة .. وكانت الناس
اللي بتنضم للصفحة دي على حس المقالات قليلين أوي ... يمكن واحد او
اتنين كل يوم .. لكن لما بدأت أكتب خواطر حزينه ورومانسيات بتعبر

عن القهر، والحرمان، والفراق، والزمنقة، و الجواز العرفي، لقيت حاجة عجيبه جدًا .. كمية بشر رهيبه بتنضم للصفحة .. تقريبا ٥٠٠ شخص كل يوم يبخشوا عليها .. ال ٥٠٠ دول بقى تقسمتهم كالتالي .. منهم ٤٩٩ بنت، وولد واحد من نوعية (راجل يا حسام) .. فده أكد لي نظريتي في أن الناس بتتوت في اللي يقلب عليها المواضيع .. البنات اللي كانت بتخش الصفحة في الفترة دي على حس الرومانسيات الحزينه كانوا مميزين قوي .. صور بروفائلاتهم كلها على نمط واحد .. واحده حاطة صورة البروفايل بتاعتها بنت ماسكه خنجر وراشقاه في ظهر حبيبها وهو تقريبًا مش مركز معاها وبيأزأز ترمس وواحده تانيه حاطة صورة بنت خالعة قلب واحد من قصصه الصدري وماشيه بيه وعمال يدلوق دم والراجل (عايش عادي جدًا) و بيترجاها ترجع قلبه اللي اتخلع عشان الدورة الدموية ترجع زي الأول .. والتالته حاطه صورة اتنين بيحضنوا في بعض على شريط القطر والقطر فوووووحي من بعيد هيدهس ابوهم وهمه مكملين الحزن عادي جدًا .. الحلو أن البنات اللي انضموا للصفحة كانوا نشيطين قوي .. بيعلموا لايك .. ويكتبوا كومنتات غريبه محطوطة سندوتش ما بين رموز معرفش بيحبوها منين ..

حاجه زي : ♥♥♥ (-`•. _ . •. _ . • -) ♥♥ Like awyyy
bmooot fe kda (-`•. _ . •. _ . • -) مش عارف بيحبوا القلوب
والحركات والرموز دي منين .. قلبت الكيبورد والمآذر بورد و الماوس
ومولات الكمبيوتر عليها ملقتهاش .. الأحلى ان البنات دول مجتهدين جدًا ..
بعد ما بيعلقوا بيعملوا شير للحاجات الكتيبة دي .. وبعدين لما يخلصوا الشير
ييعملوا لي (آدد) عطلول، على أساس إنهم فاكرين إني رومانسي ويتاع تامر

وشعر صدر وحركات وكده .. ولكن سرعان ما بيعلمولي (ديليت) بعد ما بيتفاجئوا أنه مش أنا الدنجوان اللي عايزينه و أن صورة بروفائلي مكنتش بالجاذبية المتوقعة .. اكتساب الاصدقاء عشان يشاركوك الأحزان عالفيس بوك شيء رائع .. وكل ما عدد الأصدقاء في بروفائلك أو صفحتك بيكثر كل ما صفحتك النفسيه تتحسن .. و أعرف انه اللي بيكتسب أصدقاء عمال على بطلال ده واحد عنده إحباط محتاج يوزعه على الخاليق دي .. وده اللي أكد لي أنه وائل غنيم – ادمن صفحة كلنا خالد سعيد - كان عنده اكتئاب حاد لما شوفت صفحته اللي فيها مليون ونص بني ادم .. يعني لو صحي من النوم وقال (عماص عيني مضايقي) هيلقي محافظه كامله عامله لايك و ٣ دول وقارة معلقين عليه .. ده غير اللي عاملين شير لعماصه .. و يمكن وائل من كتر اكتتابه مكفاهوش المليون ونص في صفحته فقالك ايه ... أعمل ثورة يمكن الناس تحس بيا شويه .. وتوته توته فرغت الحدوته .. حلوة ولا ملتوته ..

مطلوب عدد ١ رئيس جمهورية

مضايق ؟؟ ..

حاسس بكرشة نفس ؟؟ ..

من ساعة ما وقع النظام و الناس كلها بترشح نفسها لرياسة الجمهورية وانت
قاعد زي البرطه مش عارف تعمل إيه ؟؟ ..

معانا الحل ..

إليك عزيزي القاريء الوصايا العشر الذهبية كي تصبح مرشحًا قويًا لرئاسة
الجمهورية ..

اقرأها بتمعن وادعيلي ..

١ - في البداية لازم تعرف أن مهنة رئيس الجمهورية هي المهنة الوحيدة الأكثر
غموضًا في مصر .. يعني من المعروف أنه عشان تبقى طيب لازم يكون
معك بكالوريوس طب .. وعشان تبقى محامي لازم يكون معاك ليسانس
محاماة .. أما رئاسة الجمهورية فدي الوظيفة الوحيدة اللي متعرفلهاش راس
من رجلين .. لا ليها كورسات ولا مجموعات تقوية .. ولا ليها طابع في التنسيق
.. ولا أي مؤهلات .. النجاح فيها بيعتمد على الستر والتوفيق والضربات
الجوية .. كل ما ضرباتك الجوية بتكثر .. كل ما فرصتك في الرياسة تكون
أكبر .. حاول قبل ما تترشح تكون ضاربلك ضربتين في أي حته .. انشالله في
القصر الجمهوري ذات نفسه .. و لازم تفكك من قصة المؤهلات دي خالص
وامشي معايا واحدة واحدة ..

٢ - البداية هي الإعلام .. اعمل المستحيل عشان تطلع في التلفزيون
اعمل قرد .. اعمل شقرباظ في هوا .. بات في التحرير .. هدد بعودة مبارك
اعتصم قدام ماسيرو .. احقن سيليكون في ودانك .. اقلع ملط احتج قدام
السفارة الاسرائيلية .. اعمل كل اللي ما يُعمل عشان تظهر في التلفزيون ..
ولو حصل وطلعت .. يبقى أنت كده قطعت نص الشوط .. اسعى بقى بكل
جهدك إنك تطلع في كل القنوات .. الاولى .. والثانية .. والثالثة .. والسابعة
اطلع في المحور .. والمنور .. والدفر .. اطلع في كل البرامج الحوارية وخصوصاً
البرامج اللي اسمها يحمل سمة التوقيت الزمني لأنها ناجحه جداً .. زي ٤٨
ساعة .. العاشرة مساءً .. برنامج بعد منتصف الليل .. وبرنامج ٣٥ دقيقة
وبرنامج (لسه بدري) .. وبرنامج (اصبر عليا عشان بلبش الكوتش) .. كل
البرامج دي ..

اطلع في بداية الارسل وفي وسط الارسل وبعد نهاية الارسل .. اطلع في
(التششش) الاخبارية دي لما التلفزيون يشطب .. لو عايز تفوز لازم تخلى
الناس تحفظ وشك يا فوووووزي ..

٣ - ابعد عن منى الشاذلي .. كل اللي بيطلعوا معاها بيخشوا السجن ثاني
يوم ..

٤ - ابعد عن عمرو أديب .. عشان هيحسك أنك عربي .. مش
مرشح رئاسة ..

٥ - لو طلعت في التلفزيون "خليك حلو" .. بلاش كلام مجلس .. والله
العظيم هتاكل ملبن .. اطلع في البرنامج و اتكلم كلمتين معقولين من اللي
بيكلموهم عالقوه .. الكلام الشعبي السلس اللذيذ ده .. مش مهم عن

ايه .. المهم تقوله بطريقة تحسس اللي قدامك قد أيه أنت همك ع البلد ..
ابتسم ابتسامة حزينة تخلي الناس تعرف أن وراها معاناة وكفاح .. احك
عن المجاري اللي طاحنة في اشمون .. احك عن العيال اللي مش لاقيه (كله)
تشمها تحت الكوبري .. احك عن أسى أطفال الشوارع ومعاناة شباب
الديلفري في الوصول للمنازل مع تزايد الوقفات الاحتجاجية .. لازم كلامك
يكون من القلب .. و مع دمعيتين من عينيك هتبص تلاقي اللي قاعدين
ينتفرجوا عليك بيشاوروا عليك بكل وحاس وبيقولوا لوحدهم :
” والله العظيم يا جماعه الراجل ده لو رشح نفسه أنا هنتخبه ..

٦ – ابعد عن الرسميات .. اوعى تلبس بدل وكرافتات والحاجات دي لأ قلنا
خليك حلو .. البس قميص وبنطلون .. وافتح الزراز اللي فوق (مهم قوي
الزراز اللي فوق ده لو عايز تفوز بالرئاسة) .. ويا ريت لو تقلد رئيس الوزراء
السابق أحمد شفيق .. الناس حبه عشان البلوفر والبنطلون .. ورغم انه راح
لحال سبيله لكن يظل بلوفر أحمد شفيق عالقًا بالأذهان .. ولو مش مصدقي
افتح الفيس بوك .. هتلاقي كمية الصفحات اللي طلعت على البلوفر بتاعة
أكثر من محلات البلوفرات نفسها و أكثر من الصفحات اللي طلعت على
أحمد شفيق نفسه ..

لما تلبس لبس بسيط كده يبقى أنت ضمنت في جييك الطبقة (المتوسطة)
وهي الأغلبية من الشعب .. لو عايز تضمن الطبقة اللي بعدها في الترتيب
وهي طبقة (الشباب السيس) مفيش مانع تظهر مرة أو مرتين وانت لابس
بنطلون متسقط ومبين البوكسر من تحتيه .. و حاول تخلي البوكسر بألوان

علم مصر .. الأصفر والأخضر والمشمشي .. هتفرق كثير .. و متحطش
النسر ع البوكسر .. لانك لو حطيته هتلاقه لازق بالظبط على المؤخرة ..
وده بيدي ايجاء مش حلو ..
ممكن تقرب من لبس الطبقة اللي بعد كده وهي الطبقة الفقيرة المعدمة .. بس
بيتهيلي إنه صعب قوي تطلع في التلفزيون وأنت ملط ... ملط يا بكوغتي
ملط ..

٧ - خلي فيه ٣ جمل في بؤك علطول ..
(احنا) عايزين حرية ..
(احنا) عايزين ديمقراطية ..
(احنا) عايزين عدالة اجتماعية ..
مين (احنا) ؟ .. مش مهم .. المهم أن فيه (احنا) وانهم موجودين و عايزين ..
وطالما بقى فيه (احنا) .. يبقى أكيد فيه (هم) .. والشعب المصري طول عمره
بيخاف من (هم) دي .. (هم) بيثيروا الفتن .. (هم) بيحاولو يبوظوا الدنيا ..
(هم) فلول النظام .. مين (هم) دول بقى ؟؟ .. مش مهم برضه .. المهم أنهم
موجودين ومتربصين .. ووحشين قوي.

٨ - اللي يسألك أيه هو برنامجك الإنتخابي اتهمه بالإرهاب والعمالة
والماسونية .. برنامج أيه يا أبو برنامج .. البرامج ماتت في الحرب يا خويا ..
ولو ضغطوا عليك عشان تقول برنامجك .. قولهم معنديش .. حتى لو عندك
جووووه .

٩ - لتاني مرة بقولك منى الشاذلي لأ .. لأ .. لأ ..

١٠ - حاول تهرب من الأسئلة الاختيارية بدبلوماسية عشان متخسرش حد .. لو حد سألك أنت اشتراكي ولا رأسمالي .. قوله أنا اشتراكي الصبح .. رأسمالي بعد الظهر .. وفي الوقت اللي ما بينهم يكون نايم مبحسش بحاجه .. لو حد سألك أنت علماني ولا ماسوني .. قولهم أنا علماني في الاساس .. ولكن لما الجزمة بتضيق على رجلي بكفر آخر كُفر وبتحول للماسونية في لحظة .. السؤال الوحيد اللي تجاوب فيه إجابة صريحة :

أنت اهلاوي ولا زملكاوي ؟ .. قول اهلاوي وأنت مطمئن .. كده أنت ضمنت الرئاسة .. وعشان ميحصلش انقلابات خلى وزير الرياضة زملكاوي والنائب بتاعه اسماعيلي .. عشان يطقشوا في بعض ويخلالك الجوع مع دينا ومزارعها ..

١١ - لازم ولا بد يكون ليك صفحة رسمية عالفيس بوك .. واعمل آدد للشعب كله .. التمانين مليون .. و لازم يبقى فيه تواصل .. اعمل معاهم شات ساعتين كده كل يوم قبل ما تنام .. الشعب كله بجميع طوائفه .. مش تعمل شات مع المزز وتسبب بقيت الناس .. ومتكدش وتقول إنك دخلت الشات و ملقتش حد من الشعب اونلاين .. لان الشعب كله عنده الاكسبلورر الجديد اللي الشات بتاعه منه فيه ومش بيعلق ..

١٢ - لو قررت تعمل يافطات انتخاوية في الشوارع .. حاول الله يكرمك
أن الياطة متبقاش كلها شنبك .. ولو هتكتب آيه قرانية اكتبها صح .. ولو
هتكتب حديث متكتبش في أوله بسم الله الرحمن الرحيم .. ولو الياطة دي
إهداء من حد بلاش يحط صورته معاك .. وخد مني النصيحة دي :
”الأموات لا ينتخبون“ .. ودي كانت خطوات بسيطة جد لو عايز تنافس
كمرشح لرئاسة الجمهورية

وإن شاء الله المقالة الجاية نقولك فيها ازاي تتغلب على الانقلابات اللي
هتحصل تاني يوم لما تمسك الرئاسة بعون الله لأن واحد زيك هينفذ الكلام
اللي فوق ده مش هيعمر أكيد.. هنقولك ازاي تتغلب على الانقلابات
وتوظف البلطجية توظيف مزبورووط .. وازاي تبقى انت و الشرطة والجيش
ايد واحده .. والشعب يبقى مع نفسه ..

فانتظرونا ..

فيها - لا مؤاخذه - حاجة حلوة

الشعب اللي لسه فيه ناس بتقولك: (اخطفها) عكس .. و (لّبسه) الخمسة جنية المقطعة .. و (نفسن) عليه وزهقه في عيشته .. و (ارقعوا) إسفين .. و (زembقه) في الشغل .. و (عَلَم) عليه متسيبوش .. و "الشاي" بتاعي ييجي قبل ما تخلص مصلحتك ؟ ..

و الشعب اللي الإبداع عنده وصل إلى حد تغيير الوظيفة الأساسية لكلاكس العربية من أداة تنبيه إلى أداة موسيقية بتصف نشاطات أمك الجنسية ..

والشعب اللي جنب كل يافطة بتقول : (حافظوا على نظافة الحيّ) بتلاقي فيه ثلاثه أو أربعة شباب زي الورد بيعملوا حمام ع اليافطة نفسها .. و بيعتبر أن كل حيطتين لازقين في بعض هو أنسب مكان لقضاء الحاجة .. وعشان تبقى الريحة تحت كل كوبري، وفي كل نفق، وجنب كل عمارة وكل مكان بتجيبلك تلبك معوي وتسمم بدرجة تؤكد لك بما لا يدع مجالاً للشك إن عدد اللي بيعملوا حمام بره البيوت بقا أكثر بكتيشيليبير من اللي بيعملوه جوه البيوت ..

و الشعب اللي كل ما تسأل شاب فيه: مواصفات فتاة أحلامك أيه يا ابني !! فيضرب بعرض الحائط كل معاني الزواج والارتباط الإنساني وليختصر كل ذلك في كلمة واحدة : (عايزها محجبه) .. من غير ما يعرف الموكوس أن

نصف فتيات الليل في مصر ”محجبات“ .. و الشعب اللي لسه فيه (تيتو الدونجوان) بيكتب لـ (مرمر العسولة) كلام حب و يرسم لها شفايف على كراسي الأتوبيس، و بنشات المدرجات، و حيطان الجامعة، و على ورق الجنية والخمسة جنيه و بيتصور أنه ده من أسمى معاني التضحية من غير ما يعرف أن الكتابة على الكراسي والحيطان والبنشات هو أخط مظهر من مظاهر الجهل وتقليل للقيمة و أن الجنية اللي بيكتب عليه هتضحى بيه (مرمر العسولة) أول لما تترنق في الفكّة .. و الدليل أنه وصلني في الآخر .. الشعب اللي فيه توفيق عكاشة ..

و الشعب اللي لسه فيه ناس ممكن تطلع ترباتيت عيالهم ويوصلوهم للانتحار عشان مجموعهم في الثانوي مجابش (يا طب يا هندسه) و ذلك ليس حبًا وتقديرًا لهذه الكليات العظيمة وإنما عشان (البريستيج) و (الوجاهة الاجتماعية) و (عشان تبقى محترم يا ابني) وكأن اللي داخلين الكليات الثانية هم أوغاد ورمم .. و دون أن يعلموا أن المحروس ابنهم سيفقد هذا (الاحترام المزيّف) في كل المصالح الحكومية و مع أول مرتب هيقبضه، و هيخسر بريستيجه مع أول سواق ميكروباص هيكسر عليه ويسب له الدين ويبقى رن لي يا حبيبي على الوجاهة الاجتماعية ..

والشعب اللي لسه فيه برضه ناس ممكن يحيلهم سكنه قلبيه لو الواد مجموعه جاب طب وهندسه بس (الفاجر ابن الفاجرة) عايز يخش فنون جميله .. أو حقوق .. أو آداب مسرح .. و الشعب اللي فيه ناس طول السنة بتتكلم عن التعايش وبتصرخ بالوحدة الوطنية و قالبين صور بروفايلاتهم لحداد في

أحداث ماسبيرو، و مشيرين صور ”مينا دانيال“ و فيديوهات تعاطف مع الإخوه المسيحيين .. لكن قبل نهاية السنة بكام يوم ميناموش الليل ولا يخطوش في يؤهم لقمة لحد لما يعرفوا كل الناس أن اللي هيهني المسيحي بعيد ميلاده هيبقى زنديق وزاني وابن حرام ومن كفار قريش..

و الشعب اللي لسه فيه ناس بتكون وجهة نظر مسبقة عنك ”قبل ما تتكلم معاك“ لمجرد أنه شاف أنه عندك لحية، أو دافق صليب، أو حتى منتمي للجماعة الإيموز أو عبدة الشيطان ..

والشعب اللي فيه الناس ممكن تهملك بالكفر والزندقة لو قريت كتاب في الفلسفة أو رواية لنجيب محفوظ أو حضرت محاضرة عن استخراج الزوائد العفنة من الغدة الكظرية للخرفان .. والشعب اللي مسئولو الإعلام فيه بيعتبروا أن عمرو مصطفى ليه وجهة نظر تستحق مناقشتها في أكثر ١٢ برنامج توك شو لحد دلوقتي .. و اللي فضائياته - في عز أحداث ماسبيرو وشارع محمد محمود ومجلس الشعب - بتجيب سمير صبري وهو بيتمايل وبيغني (سوووكر حيلولة الدنيا سوووكر) وأمينه شلبايه وهي بتعمل ماسكات المهلبية بالخيار ..

والشعب اللي نصره الدين عند معظم شبابه بتمثل في أنك تجمع مليون توقيع ”للتحليل“ على جوجل لوضع شعار رمضان و ”بتنوسل“ للفيس بوك بوضع مواقيت الصلاة، مع وضع كل الرسل والأنبياء والكتب السماوية في مزاد علني ع الفيس بوك : (مين أفضل شخص في البشرية) النبي محمد (ص) ولا المسيح ؟.. طب الإنجيل ولا القران ؟ .. طب عيسى ولا موسى ؟..

وليتم اختصار كل المقدسات في كليك ماوس و ضغطة الكيبورد مع توعذك بنار جهنم وبأن الشيطان وأبالسة الجحيم ومصاصين الدماء وانسان الغاب والسلعوة بتاعت فودافون هتلبس بروفابلك لو معملتش شير..
و الشعب اللي فيه ناس عالفيسبوك زي ”Sexy_Boy“ و ”Ana moza awy“ بقوا بيتكلموا في الليبراليه والعلمانية أكثر من حملة ماجيستير اقتصاد العلوم السياسية ..

و الشعب اللي عنده عدد الأغاني المهداه للشهداء بقت أكثر من عدد الشهداء نفسهم واللي بقت عنده تقنيات تخلي تصوير أغاني الثورة أسرع من الإسعاف اللي بتوصل لمصابي الثورة ..

و الشعب اللي نصه مرابط في (ميدان التحرير) و (مجلس الوزراء) و (محمد محمود) .. بينما نصفه الآخر - اللي مانتخ عالكنبه - يوم ما فكر ينزل قام ساب كل الأماكن دي و راح فيلم (شارع الهرم) ..

هذا الشعب، بهذه المواصفات، ليس شعباً كاملاً .. إنما نصف شعب، بنصف عقل، بنصف وعي، بنصف فكر، بنصف رأي، مع كثير من التناقضات .. ولذلك لم يحن ثورة كاملة وإنما ظَفَرَ بنصف ثورة .. و لا علم لي بما يمكن أن نجنيه من تغيير إن لم تتغير أنفسنا بواقع يلائم ثورتنا .. فما أبشع أن تكون ثمار الثورة هي شوية فلوس هترجع و مرتبات هتزيد ووظايف هتتوفر بينما تظل الموروثات الاجتماعية وثقافة الفهلوة و”الأنوية“ كما هي متعمقه ومتأصلة في النفوس دونما تغيير .. ولربما ده كان السبب الأدعى انك تسمع واحد بيميل عالتاني ويقوله باستغراب :

”يا أخي رغم أنه فيه ثورة .. بس مش عارف كده حاسس أنه مفيش أي حاجة اتغيرت في الناس“ ..
وأخشى أن يكون الحل لكل ما نعانیه من حَبَثٍ متأصل في النفوس وعاصٍ على التغير هو ذلك الذي اقترحه محفوظ زلطه في مسلسل باب الخلق بعد ديباجة طويلة من مآسي الوطن عندما قال بكل ثقة : ” الحل هو قنبلة .. قنبلة تنسف البلد دي كلها، وتجيّب عاليها واطيها، وتساوياها بالأرض عشان نبتدي من أول وجديد بقي و نينها على نضافه ” ..
أُتفق معاك قلبًا وقالبًا يا عم زلطه .. ربنا يرحمك ويشبش الطوبه الي تحت راسك ..

١٧٥ قرش

من يومين جبت خط موبايل جديد و اتحال خطي القديم إلى المعاش بعد ١٢ سنة خدمة في فودافون .. الخط القديم كان معايا من سنة "٩٩" ومحفور عليه كلمة "كليك" قبل ما تبقى فودافون .. ليا معاه قصص و ذكريات وحكايات .. لسه فاكّر فرحتي بمكالمات العيد و رسائل رمضان وشم النسيم و الهابي نيو بير وبرضه فاكّر حسرتي بالفالاتين اللي موبايلي فيه ييبقى جثة هامدة مبتستقبلش ولا رساله ولا اتصال ولا رنه من أيتها مزة على ظهر الكوكب. ويبقى محطوط زي مريض البنكرياس عالكومودينو عشان يفكرني كل ما أبص له إني عمري ما عرفت أنثى في حياتي غير أمي الغالية، و أم رضا الشغالة، و مرات البواب لما يتمسح السلم، كنت ساعتها بدعي وأقول اوعدنا يا رب، وأفتكر بعدها إن الدعوة اتحققت في أول قصة حب عشتها بالخط ده لما واحدة بعثت لي SMS و قالت لي إنها تعرفني من فترة و معجبة بيا عشان أنا "محترم وكيوت و محط برفان تركيب بيدوخ الستات اسمه ليالي الحليمية"، فرحت قوي وفضلت عايش معاها أحلى لامور بالمسجات لمدة ٦ شهور تقريبًا لحد ما قررت في يوم إني أكلّمها وأصارحها بمشاعري فاكتشفت في الآخر إنها واحد صاحبي حيوان بيشغلني .. ساعتها هزأته تهزئ السنين و حمدت ربنا إنه كشفته في آخر لحظة؛ وإلا كان الخداع هيستمر و الحب هيستمر ويمكن ألاقيني متجوزه ومخلفين سوا ست

عيال من غير ما آخذ بالي .. الحمد لله ربنا بيستر برضه .. وفأكر برضه إنه زمان كانت الدقيقة بـ ١٧٥ قرش .. وده كان سعر عالي قوي ولا يناسب متطلبات المواطن المصري الرغاي .. عشان كده نادرًا ما كنت تلاقي حد بيكلم حد .. كله حاطط موبايله في جيبه ومبیطلعوش إلا عشان يغير نفقات تبهوف و موتسارت أو يلعب سنك أو يحطه عالطرايزة ويشوفه بيتحرك تحت تأثير الفيراشن .. الناس كانت ناشفة قوي قوي – ولا تزال بصراحة - وأنا كنت من الناشفين دول منكرش .. وافتكرك إني لما كنت بقتي في ميكروباس وموبايل حد من الركاب يرن كان يصمم إنه يخليه يرن يومين؛ عشان المكروباس كله يسمع أم النغمة قبل ما يتعطف علينا و يرد على أم الموبايل .. ومع رده بنلاقي صوته بيعلي بالسلام .. ”وأنت فين“ و”عامل ايه“ و ”سامح اللي نهب الفلوس“ و ”تامر اللي اتجوز محمود“ و ”سلوى اللي خانت فايزة“ و ”فايزة اللي مبقتش عايزة“ و ”فاضلي نص ساعه وأبقى عندك“ .. والصوت لازم يبقى عالي قوي قوي عشان يخلي كل الميكروباصات اللي جنبينا تسمع فتعرف قد أيه أنه راجل مميز لدرجة إنه فيه واحد ضحى بـ ١٧٥ قرش عشان يكلمه، وده إن دل على شيء فإنما يدل على مكانته في المجتمع بصفه عامة و في ميكروباس (الطالبة – بولاق) بصفه خاصة ..

وأفتكر إنه عشان الـ ١٧٥ قرش كانوا كتير كانت الناس مقضياها ميسدات و الميسد ساعتها كان له معني كبير قوي و بمقام مكاملة .. الميسد كان معناه صباح الخير، ومساء الخير، وتصبح على خير، ووحشتني، وأنت في بالي، وبحبك قوي، وهات بوسه ياض، ولازم تصلح غلظتك، وكل المعاني الجميلة

اللي بتخليك تفضل محافظ على علاقتك بالآخرين في قلبك ومحافظ على الـ ١٧٥ قرش في رصيدك من غير ما تخسر حد فيهم .. وعشان كده كان التحدي الأبدي للشخص الرانز إنه يرن قبل ما المرنون عليه يتهور ويلبسه الدقيقة .. و أنا بالنسبة لي كان أصعب شعور لما أرن لحد وأقفل وبعدين آجي ابص عالشاشة ألقيا .. (٠١ : ٠٠ : ٠٠)

ساعتها بعرف إنه البأف اللي بديله ميسد فتح عليا ولبسني ١٧٥ قرش وغالبًا بكلمه بعدها لمدة ١٠ دقائق أهزأ اللي جابوه إنه ازاي يفتح عليا .. بالنسبة لي محدش كان يستاهل إني أضيع شوية دقائق عشان اسمع صوته و رغيه .. حتى البنت اللي كنت معجب بيها معرضتش عليها الجواز إلا بعد ٨ سنين لما الدقيقة نزلت لـ ٢٠ قرش ومفاتحتهاش في تفاصيل الجواز إلا لما فودافون نزلت الخمسين رسالة هدية عشان آخذ راحتني في الكلام، ولكن للأسف كل شيء اتفشكّل لأن الرسائل خلصت قبل ما نحدد معاد قراية الفاتحة وتلبيس الشبكة والذي منه .. وأفنكر إني لما كنت بتصل بجد للأسف مكنتش بركز في المكالمة قوي لأنني كل خمس ثواني كنت برفع الموبايل من على وديني وأبص في الوقت عالشاشة واشوف دخلت في الدقيقة الثانية ولا لأ .. وفي الثانية ٥٠ كنت بـ أكرّوت الكلام بسرعة زي الديك الشركي عشان المكالمة تخلص بالضبط على الثانية ٥٩

ولو دخلت في الدقيقة الثانية كنت بهدل اللي بكلمه شتيمه. بعدين بقوله يرغي اي رغي عشان نملا بيه الدقيقة الثانية اللي حرام نضيعها ونرمي ١٧٥ قرش في الأرض .. والله كانت أيام جميلة وحلوة وكلها بركه وخير و رصيد

.. وبشكركم إنكم سمحتولي إني أشارككم خواطري العابرة عن خط موبايلي
القديم أكيد مقدرين حالتي النفسية .. هحط رقم موبايلي في نهاية الكتاب و
عالبيدج والبروفایل بتوعي للتواصل وأنا عمومًا برد على كل الثمر اللي بتجيلي
.. وده بالنسبة للبنات .. أما الولاد فممكن يضيفوني في الفيس بوك عشان
مبردش على نمر غريبة .. وفي انتظاركم

يا عزيزي كلنا مرشحون

كنت بتابع في التلفزيون خبر تقدم (مئات المرشحين لمنصب رئاسة الجمهورية ٢٠١٢) .. قلت لأمي وأنا بدب كبشة الفشار في بؤي :

تصدي بالله يا أما .. أنا مكنتش مصدق إن مبارك كان قاسي القلب قوي كده وكان كابت آمال الشعب العريضة للدرجة دي .. لدرجة إن الكل كان عايز يترشح لرياسه الجمهورية وهو فاعص طموحاتهم دي جوا قلوبهم النونو .. وعلى الرغم من إني مؤمن بحق كل مواطن في ترشيح نفسه طالما عنده شيشب وجلايه .. إلا إني متخيلتش إنه العدد يتقى كبير قوي كده .. طب بالله عليك قولي لي .. ازاي هيستضيفوا المرشحين دول كلهم في الفضائيات عشان يعرفونا بيهم ؟ .. يعني هل مثلاً هيدخلوهم الاستوديو كبشه كده كل عشر رؤسا مع بعض ؟ ؟ .. ولا هيدخلوهم خماشر خماشر ؟ ؟ .. ده لو كل رئيس خد دقيقة و عرفنا بنفسه علبال ما يوصل لاسمه الثلاثي هتكون انتخابات ٢٠١٦ فتحت أبوابها خلاص !! .. وهل تفتكري إن كل واحد من دول ليه برنامجة الانتخابي الخاص بيه ؟ ولا كل عشرين عاملين جمعيه في برنامج واحد ؟ ؟ .. و السؤال الأهم بالنسبة ليا كشاب فيسبوكوي هألش على كل المرشحين دول ازاي بالفوتوشوب ؟ .. ده البرنامج هيهنج مني و “ذا -روك” في كومكيس الفيسبوك ممكن يحيله صرع لما كل مرة يلف يلاقي مرشح شكل في الكنبه اللي ورا ؟ ؟

خطفت أُمي مني حلة الفشار و دبت كبشه في بؤها و لقيتها بتقولي : يا
خويا بدل مانت عمال تتريق على مرشحين رياسة الجمهورية متبرز طولك وتنزل
ترشح نفسك أنت كمان ، يعني همه اللي اترشحوا دول احسن منك في ايه
؟ طب ده انت حتى كلامك حلو ويخش القلب وطلتك موز (تخيلوا أم
بتقول لابنها موز)، و عندك صفحة عالفيس بوك فيها ثلاثين ألف بني آدم ..
يعني نص شعب مصر في جيبك .. ولو عملتلها شير مرتين ثلاثه هتجيب
النص الثاني .. والعيال فيها بتحبك وبتعملك كومنتات ولايكات .. يعني الود
والعشم موجود .. و أنت أحسن واحد يتقال عليه المرشح ”المحتمل“ .. عشان
أنت الناس كلها بتقدرك وتحترمك .. إنما المرشحين التانيين دول غير ”مُحتملين“
علا إطلاق ووشهم يقطع الحميرة من البيت .. هي بس المشكله الوحيدة
اللي هتقابلك انهم طالبين إن اللي يرشح نفسه ده يكون سنه ميقلش عن
أربعين سنه .. وأنت لسه يا حبة عين امك مكملتش الثلاثين .. بس ده
ميمنعش إنك تقدم برضه .. أصل طابور الرياسه طويل واللي مقدمين فيه
كثير .. وعلبال ما الطابور يخلص و توصل للكشك اللي بيبيعوا فيه أبلكيشن
الرياسه تكون عدت العشر سنين دول هوا .. يا واد نفسي اتباهي بيك
واقول .. أنا .. أنا أم المرشح بق
ديت أنا راخر كبشه فشار في بؤي و قتلها : والله نفسي يا أُمي .. وعارف
إن الترشيح علينا حق ، وصدقيني لولا الشد العضلي اللي في رجلي وإني
مش لاقى شبشب ارواح بيه لكنك روحت .. ده غير إني مش عارف اذا
كانوا طالبين مؤهلات عليا في الرياسة ولا لأ ؟ أنا عشمي في ربنا كبير
ومتفائل خير في السبععاشر ألف زميل اللي رشحوا نفسهم لحد دلوقتي ..

أكيد هينجح منهم ألف أو ألفين و يبقوا رؤسا .. محي بلاوي البلد يا أي
ميشلهاش رئيس واحد .. وأكيد همه هيلعبوا مع بعض ميتخافقوش .. ساحيني
يا أي .. ساحيني يا أي .. وذرفت من عيني دموع الندم وأنا بدعك حبات
الفشار بين أنياني في استمتاع. فبصيت لي أي بنظرة استهزاء و مصمست
شفافيتها و قالت لي : عجيب .. أبوك الله يرحمه لو كان عايش مكنش فوت
مناسبه زي دي .. اهو كان طلع له بقرشين ولا حاجه وبروز الابلكيشن
بتاع الرياسة واتباهي بيه قدام الحته .. بعدين يا موكوس أنا عايزة مصلحتك
مانت ليل ونهار واقف على طواير الشركات وبتقدم المدعوقه دي الي اسمها
(سي في) ولا فيه حد بيعبرك .. خلاص جت يعني على طابور الرياسة
وحرقت ؟ ؟ .. أنا بقولك كده عشان بجبك ومتوسمة فيك خير .. العيار الي
ميصبشي يدوش .. وانت لو مبقتش رئيس ممكن تطلع بحاجه تانية

محو مش معقولة من العشرين الف الي رشخوا نفسهم دول هياخدوا واحد
بس ويرموا الباقيين في الزباله ؟ على الأقل هيحلوا بؤهم و يجبروا بخاطر
وقفتهم في الطابور والفكة الي قعدوا يدوروا عليها تمن ابلكيشن الرياسة
فيعينوا منهم وزراء داخلية وخارجية وتعليم ورياضه ومذيعين فضائيات
والباقيين هياخدوهم كمعارضين سياسيين .. محو مفيش نظام يا ابني بيعكم
ملوش معارضين .. الناس مش هتصدقو .. وأنا أمنية حياتي يا ابني اشوفك
مسجون قد الدنيا ..(تضحك امي ومن ضحكها تتناثر فرايت الفشار على
وشي) .. بعدين يا واد انت لو بقيت رئيس هتبقى حاجه تانية خالص اهو
كل يومين تلاته هتروح امريكا على حس انك بتقابل ساركوزي، و تتفسح

هناك وتروح بقى المطاعم الأصلية بتاعت بلدها مكدونالدز وكنتاكي والشبراوي .. ومنه برضه يا حبيبي تعالج أمك على نفقة الدولة بدل ما المعاش ضايع على أدوية القلب والسكر .. وأنا كمان يا ابني بصراحة نفسي اتبسط لي يومين في آخر عمري كده (تدمع عينا أمي وتكمل) نفسي أشوف ديزني لاند اللي يحكوا عنها دي قبل ما أموت .. حلمت امبارح بأبوك الله يرحمه راكب الصاروخ بتاع ملاهي السندباد ويشارولي فقلت في عقل بالي دي أكيد بشرة خير ورسالة للواد أنه هيبقى رئيس مصر الجاي وهيفسحنا في ملاهي ديزني لاند ونيويورك ميد تاون وياخدنا بعريّة الرياسه عالصحراوي بتاع فيلادلفيا نشم حبة هوا ندديف ونسمع علي حميدة وهاني شاكر .. نفسي قوي يا ابني أشم هوا ندديف بدل العفرة دي .. و نفسي أغير المطرح اللي أنا فيه ده ويبقى عندي خدم وحشم بدل أم حمادة اللي وشها يقطع الحميرة من البيت.. هو أنا يا واد أقل من سوزان ولا ايه ؟؟؟ مترد .. (تنفعل أي) .. سيب الفشار ده ورد على أمك بلاش تلامه ..

مصدقتش نفسي .. دبيت كبشه فشار تانيه في بؤي يمكن أنسى الكلام اللي سمعته .. لأول مرة أشوف أم كانت بتربي ابنها ”مصلحة“ عشان يبقى رئيس ويفسحها .. بصيت لها بحزن وقلت: حسبي الله ونعم الوكيل فيكي أي .. حسبي الله ونعم الوكيل .. مكدونالدز؟ .. كنتاكي ؟ الشبراوي ؟ .. هو ندديف؟ .. و عايزة تتعالجي على نفقة الدولة ؟ .. هي دي الرباية اللي ربتالي هو ده العلام اللي انتي علمتيهولي ؟ .. مش بعيد تكون كل أم بتفهم ابنها الحمار الكلمتين دول عشان كده وصل المرشحين لمية ألف بني آدم في يومين

بس أنا عمري ما هخالف ضميري يا أمي .. ولا وطني .. حتى لو البيدج
بتاعتي وصلت مليون فانز .. و لو أنا شايف نفسي كفؤ هرشح نفسي لرياسة
الجمهورية .. ولو مش كفؤ هكتفي إني أخش البرلمان .
ومع نهاية عبارتي لقيت موسيقا اعدام ميت بتشتغل في التلفزيون .. لفيت
الكوفيه حوالين رقبتى .. ولبست الجاكت و خطفت منها حلة الفشار و قمت
ماشي وسط دموعها وتوسلاتها إني ارجعلها الحلة عشان تعمل فيها المحشي ..
ولكن هيات .. دي الحلة اللي بتروح مبرجعشي ..

عجلة وليد

من يومين كده نزلت لقيت عربيتي المكسحة الغلبانة اللي على قد حالها معجونة تراب .. كسلت أمسحها ومشيت بيها وهي كده .. توكلت على الله وشغلت برنامج ظريف يبيجي الصبح على إذاعة إف إم لقيتهم مستضيفين فيه مرشح الرئاسة السابق ”أبو الفتوح“ واللي قعد يقول يا جماعة مصر دي بلدنا وغاليه علينا ولازم نشغل ونهض بيها وكفاية بقى احتجاجات واعتصامات عشان عجلة الانتاج تتحرك والبلد تشد حيلها .. بصراحه كلامه عجني و كنت عايز أعمل مداخلة وأقول فيها مع احترامي لكلامك يا أستاذ حمدين ولكن عجلة الانتاج مش واقفه بس عشان الاحتجاجات والاعتصامات دي واقفه عشان الناس سايبة شغلها وقاعدة عالفيس بوك وبتلعب (فارم فايل) و (مافيا) و (سيتي اوف امباير) لحد ما عجلة الإنتاج وقفت خالص و كان - لا مؤاخذة - فسّت في وش الوطن .. أنا فعلاً كنت عايز أتصل وأقول كل الكلام ده .. ولكن اللي منعني هو أنني وأنا سابق لقيت سلوك عجيب جداً من العربيات اللي حواليا .. لقيت ناس راكبين عربيات و ميكروباصات بيقرّبوا مني ويكلّكسوا جامد قوي .. وناس تانية بتزق عليا بعرياتها و يلاعبولي حواجبهم .. ولقيت ست عندها ستين سنة راكبه بيتلز بتقرب وتقولي ”يا جميل انت يا طعم“ وقامت بعتالي بوسة في الهوا بس أنا معرفتش ألقفها عشان كنت سابق .. استغربت .. قلت هو

فيه ايه ؟؟؟ .. معقولة كل المعاكسات الجميلة دي ليا أنا وأنا لسه صاحي كده من النوم والعربية مبهدة آخر مبهدة ..أمال بقى لو لابس الحتة اللي على الحبل و مدي العربية وش بوليش لميع وغاسلها كيماوي وبخار هيعملوا ايه ؟!! .. ولما زادت الإشارات والمعاكسات وأنا مش فاهم أي حاجة في أي حاجة قررت أركن العربية وأشوف فيه أيه .. ركنت ونزلت .. و بص .. لقيت واحد حيوان مستغل التراب اللي العربية وكاتب بخط كبير على الإزاز :”وليبسيد التعباااااان ” .. وسايب نمرة تليفونه ..

بكم القميص - و من غير مناديل ومن غير مساحه ومن غير فوطه - قومت زي المصعوق ماسح الكتابة من عالربية وأنا بتلفت حواليا زي المحنون ليكون فيه ذئب بشري مراقبني كده ولا كده ومستني اللحظة اللي أقف فيها عشان يهجم على فريسته .. برطمت بكلام كثير عن القذرة في البلد وعن حال التعبانين اللي بقوا يمارسوا دعارتهم على ممتلكات الغير وعن سوء الحظ وعن سوء الأدب وانحذار الأخلاق .. اتحسبنت ساعة و ضربت كف بكف ساعة كان .. وبعد ما هديت شويه وتماكت أعصابي، وأتأكدت إنه مفيش حد مترص بيا هنا ولا هنا، روحت بالربية على أقرب بنزينة و غسلتها غسيل كليّ وفحصتها فحص شامل؛ عشان ميكونش فيه ناس تانية تعبانه كاتبة حاجة كده ولا كده أو يكون وليد نفسه مستخبيلي في الشنطة الورانية أو تحت الدواسة ..

ركبت العربية و كملت طريقى ولاحظت أن العربيات اللي حواليا بطلت تكلكس والناس - سبحن الله - بطلت تلاعبي حواجبها .. دعيت لوليد

بالهدايه ودعيت للشعب - اللي اكتشفت إنه أكثر من نصه طلع وليد -
بصلاح الحال .. انتهت القصة .. و المغزى اللي عايز أقوله منها حاجتين ..
أول حاجه هي نصيحه أخويه ليك أنك قبل ما تتحرك بعريبتك لازم تتأكد
أنه مفيش وليد هنا ولا هنا كاتب لك حاجه كده ولا كده، وسايب نمرة
تليفونه .. و ثاني حاجه أنك تكون خلاص اقتنعت وعرفت أن سبب توقف
عجلة الإنتاج مش الاحتجاجات ولا الاعتصامات ولا المطالب الفئوية زي
ما بيقول أبو الفتوح .. وبرضه مش الفيس بوك والجميز زي ما أنا كنت فأكر
وإنما بسبب أن فيه ناس كتيرة حوالينا تعبانة ..
تعبانة قوي ..
تعبانة خالص ..
تعبانة جدّا ..
ومش قادره يا عيني تشتغل من كتر التعب ..

الفابريكاتور ٥

إيمانًا من الشركة المنتجة لبرنامج (الفوتوشوب) باحتياج الكثيرين من أبناء هذا الشعب العظيم لهذا البرنامج الخطير طوال الوقت، وأنهم أكثر شعب عمل داوولوود للبرنامج ده في الفترة اللي فاتت دي، وتقديرًا لإبداعاتهم، قررت الشركة أنها تعمل إصدار خاص جدًا جدًا من هذا البرنامج - للمصريين فقط - وأطلقت عليه اسم فوتوشوب (شوهني وافشخ سمعتي) والمعروف تجاريًا باسم (الفابريكاتور ٥) لفبركة الصور وتطليع سلسفيل اللي أمه داعيه عليه وهيتلعب في خلقتة جوه البرنامج ده .. وحيث أكدت الشركة إن (الفابريكاتور ٥) سيتوافر بموقعها قريبًا و هيكون مجاني تمامًا حيث لن يتعدي ثمنه ٢٥٠٠ دولار فقط ..

و (الفابريكاتور ٥ - شوهني وافشخ سمعتي) بيمكثك من أنك تعمل البدع بصور الانتخابات وخلق المرشحين وتقدر تقلب الثورة دي من فوقها لتحتها، وعاليها واطيها، وتجيها على جنبها وضرها، وتشويها عاجريل وتعملها سندوتشات بخطوات سريعة جدًا، فبضغطة ماوس ممكن تخلي التحرير مكان العباسية و العباسية مكان التحرير و(تلزق) تامر بتاع غمرة في كل محطات المترو فيبقى عندك تامر بتاع غمرة، وتامر بتاع المرح، وتامر بتاع مارجرجس، وتامر بتاع ثكنات المعادي، وتامر بتاع العصير .. وكلهم بيكلموا

ويعيطوا ويصيعوا نفس الصياغة بتاعت تامر الأوريجينال ويلقظوا شبكة من المترو عادي جدًا مفيش مشاكل ،.. و برضه بضغطة ماوس ممكن تخلي العيسوي شهيد و تخلي الشهيد يرجع عيسوي من ثاني (مش عارف ازاى) و تحول عربيات الأمن المركزي لعربيات أثاري و علب الغاز لعلب بولوييف و قناص العيون لقناص الأومليت وأحمد حرارة لأحمد سبايدر، و ممكن (كوبي) ناس كتير من أبناء التحرير وت (بيستهم) في العباسية تحت اسم أبناء مبارك، وحتى مبارك نفسه - بالفوتوشوب فابريكاتور - ممكن تخليه من شهداء ٢٥ يناير وتخلي شهداء ٢٥ يناير يموتوا في أي أحداث ثانية غير يناير ولو حمادة هلال زعل حوّه - بالفابريكاتور - لحمادة بالجزريل .

هذا و تؤكد الشركة الأمريكية إن برنامج (فوتوشوب فابريكاتور ٥) سهل الاستخدام ويقدم اختصارات كيورد بتنجز مع المفبركاتي اللي بتراعي الشركة أنه أكيد وراه ناس كتير مستنيه يتخرب بيوتها على ايده .. البرنامج بسيط جدًا .. مجرد ما بتدخل الصورة و تدوس زرار (انتر) هتلاقي فيه خمس جثث بتنضاف للصورة وش، محتاجش أنك تجيب ناس من بره وتموتها في البرنامج، ومجرد ما تعمل (رايت كليك) على الجثة هتطلعلك (قائمة) تختار فيها الجثة اللي على مزاجك، يعني جثة واحد محروق، واحد محذوف، واحد مبلوع، واحد بيطلع في الروح، واحد دخل في بؤه واحد، وهكذا، وبالموس بقى تبتدي تحرك الجثث براحتك، تخليها عالارض، أو طايه في السما، أو ممكن - على سبيل المثال - تخليها راقده على سرير مستشفى وتلرز المرشح بتاعك قدامها قال يعني بيظمن عليها .. ولو غيرت

رأيك ومعدتش طابق المرشح ده، أو كان كاتب عليك كمبيالات وعازر تخلص منه، أو سالف بوكسرك ومرجععوش، اسحب الجثه بالماوس وحطها في حصنه ودوس (مسافة) هتلاقي طرطشة دم نزلت على ايده وتبقى انت كده خربت بينته ومش هتشوفه ثاني، و الفابريكاتور برضه في نفس ذات الوقت يسهل عليك الدعاية لمرشحي الانتخابات .. كليك واحده بالماوس على خلقة أي مسئول هتلاقي طلع له (لحيه) و (شنب) تجذب بيهم أصوات الغلابة .. كلكتين ماوس هتلاقي اللحية اتشالت وظهر مكانها بشله في الوش وسلسلة في الرقبة لجذب أصوات البلطجية و العيال السييس .. دوس (سييس) هينضاف له شعر صدر تجذب بيه أصوات جمهور تامر حسني والعيال الماسونيين و عبدة الشيطان .. أما ثلاث كليكات مع (سييس) فهتلاقي كل هدمومه اتشالت خالص وبكده تقدر تجذب أسراب الناموس والشواذ جنسياً وفوتوشوب فابريكاتور ٥ بينزل معاه (سديهاين) .. قصدي (سيديهايتين) .. بص همه اتنين .. اتنيسييين سي دي .. أما (السي دي) الأولاني ففيه كل صور المرشحين والمسؤولين والوزراء اللي واخدين وضع الفبركة، و منتظرينك تخرب بيوتهم بكليكاتك الفنية .. مش هتحتاج مع (السي دي) ده أنك تدونلوود أي صور ثانية من بره لأن كل المتفكرين موجودين واحنا معاهم ..توفيق عكاشه وطنطاوي وعمرو مصطفى و حسني مبارك وسوزان مبارك وعلاء مبارك .. كله موجود .. يمكن الوحيد بس اللي مش موجود هو جمال مبارك .. وده لأن حسني كان عامل حساب اليوم ده ومدخله شريك في شركة الفوتوشوب بنسبه ٥١ بالمية و في (السي دي) اللي في ايدك بنسبة

٩٩ في المية .. و فيما عدا ذلك فكله موجود وله أكثر من صورة .. هتلاقي صورة (توفيق عكاشه) اللي بيبوس فيها ايد (صفوت الشريف) .. بضغطة واحده تشيل إيد صفوت وتخط رجله .. أو حتى يؤه .. مييجراش .. أو تشيل صفوت كله وتخط مكانه بطة بلدي وأهو كله تدريب لإيدك ودعم لنفسيتك المبدعة .. وهتلاقي صورة مرتضى منصور في المهندسين وهو يجمع أبناء مبارك المهاجمة ثوار التحرير .. اللعب بقى في أبناء مبارك براحتك، خليم مره أبناءه، بكليك تانيه ييقوا أحفاده، بكليك تالته ييقوا ولاد خالته، وهكذا، بس حاول تبعد عن مرتضى عشان لو مسك الرياسه مش هيرحمك .. وهنا بتظهر أهمية (السي دي) الثاني اللي جي مع (الفابريكاتور) لو مرتضى مسك الرياسه .. وهو أنك تخط عليه كل حاجه تخصك وتقدمها لمرتضى بكل هدوء وأدب بدل ما يعملك هو (سي دي) ثاني على مزاجه ..

خلص الكلام .. ومفيش أي حاجه ثانية أكثر من كده نقدر نوصف بيها فوتوشوب (الفابريكاتور ٥) الرائع المذهل اللي بيودي في سستين داهية .. ومفاضلش دلوقتي غير أنك تتصل لتحصل عليه وعلى (سي دي) مرتضى منصور وباقة (شوهني وافشخ سمعتي) المجانية .. سعر المنتج ثابت وسعر الشحن ثابت أينما كان المرشح اللي هيتخرب بيته .. وتذكر أن البرنامج مجاني .. مش عشان خاطر عيونك .. لأ خالص .. ولكن عشان اللي عملوا الفوتوشوب راعوا انهم يشترؤا صمتك فيقوموش ثاني يوم الصبح يلاقوا نفسهم لا مؤاخذة .. فوتوشوب ..

فلولك مش زي بعضها

لحد قبل معاد التصويت في انتخابات الرئاسة بيومين مكنتش استقرت على مرشح معين !! .. ومكنتش عارف أتنخب مين !! .. وأنا زبي زي غيري لا كان عندي طققان أقرا برامج انتخابية ولا أحضر مؤتمرات دعائية ولا غيره ، وبعتمد اعتماد كلي على بوستات الفيس بوك في تحديد صوتي الذي ينتظره هذا الوطن الغالي لتقرير مصيره، وللأسف الشديد بوستات الفيس سواء مقالات أو فيديوهات عمالة تجيبني شال و يمين و فوق و تحت .. أفتح الفيس الصبح الأقي مقال جامد عن الدكتور عبد المنعم أبو الفتوح وإنه يستعين بخبراء ومستشارين لنهضة البلاد والقضاء على البطالة والمحسوية وتمية الاقتصاد، فأقول الراحل ده جامد و دماغه صح و هيخرج البلد من البكاورت اللي واقعة فيه وعلى هذا الاساس لازم أتنخبه، أتكل على الله وأقوم شایل صورة بروفائلي وحاطط صورة أبو الفتوح وأكتب عالستاتس (نعم لأبو الفتوح) فألاقي ١٠٠ لايك و سبعين كومت بيهنوني بهذا الاختيار العظيم .. شويه و ألاقي واحد صاحبي ثاني - لما يشوفني حاطط صورة أبو الفتوح - يقوم باعت شاتني ومهزاني وسائلني فين حمدين صباحي في الليلة دي كلها يا معض ؟ ، أقوله أصل أنا معرفش حاجه عنه يا معلم ولا شوفت له فيديوهات ولا مقالات ولا أي شيء .. يقوم الواد ابن الدينية (عشان عارف إني موظف حكومة غلبان) باعتلي - من بين كل الفيديوهات الدعائية لمحمدين صباحي - الفيديو اللي بيوعده فيه إنه لو مسك

الرياسة هيخلي الحد الأدنى للأجور ١٢٠٠ جنيه .. يا ابن الكلب يا جزمه !! .. بتلعب على مشاعري الميري يا قدر ؟ .. وفعلاً أُنْفِرْج ع الفيديو بشغف فألاقي عينا لوحدها بتدمع في الدقيقة (٥:٣٠) و اللي فيها حمدين صباحي بيوعد برفع الأجور إلى ١٢٠٠ جنيه فأعمل ستوب للفيديو وأخذ اللقطة دي بالذات كوي بيست وأقوم مكبرها و عاملها خلفية للوندوز، وأقول خلاص يا جدعان هو حمدين اللي هيخليني أدفع كل اقسط الشقة اللي عليا ، و أجيب البوتاجاز والغسالة المنتاشر برنامج ومكنة الكابتشينو اللي بتعمل فوووم ورغاوي من فوق المج دي .. فتحت بروفالي و قمت حاطط صورة حمدين صباحي مكان أبو الفتوح، وقلت في الستاتس (نعمين لحمدين) فلقيت في دقيقتين ٣٠٠ لايك و ٤٠٠ كومت وطبعاً جيت أدور على أنصار أبو الفتوح لقيتهم كلهم عملولي بلوك وديليت على الفور .. قلت مش مهم .. أنا عملت ما يمله عليا قلبي و ضميري وجيبي المشتاق للألف وميتين جنيه .. و الحمد لله على كل حال .. لكن شوية ولسه هعمل (لوج - آوت) من الفيس وبمجرد ما بعمل (اللوج) وقبل (الآوت) لقيت فيديو وحيد، تايه، شارد، اسمه : (لو شاب وعاز راتبك يزيد و تنجوز وتشتغل وتعيش حياة كريمة انتخب خالد علي) .. قلت اللهم يا أخزيك يا شيطان .. ايه لزمته الحيرة ووجع القلب ده ... لقيت الماوس لوحده وبقدرة قادر بيدوس كليك على الفيديو، و لقيت خالد علي من أول دقيقة بيوعد بإعانه للبطالة ورفع الأجور إلى .. كام بقى يا عم ؟؟ ... ١٥٠٠ جنيه .. يا نهار أبيض ؟.. طب ده حمدين كان قايل ١٢٠٠ جنيه .. قمت منفض لبقيت الساعتين بتوع الفيديو و اللي فيهم بقيت برنامج خالد على وقلت خلاص هوو الرجل ده يا بلاش

و قمت فاتح البروفایل و حاطط صورة خالد مكن حمدین و عشان برضه
مظلمش حمدین حطيته ك (كوفر بكنشر) عشان لو رجع في كلامه في أي
لحظة و زود الأجور أرجعه تاني وآهو كله في مصلحة مكنة الكابتشينو اللي
بتعمل فوم و رغايي ..

و لأن برضه ضميري مش مطاوعني إني اعتمد على بوستات الفيسبوك
بس، ولأنه معنديش صبر أقرا كل البرامج الانتخابية بتاعت التلاتاشر
مرشح خاصة إنه فيه بعضها بحجم مناهج تالته ثانوي وأنا أساسًا مبطل أفصح
كتب من رابعه ابتدائي، ولأنه مفيش مرشح لنوذك كده بيسهل الدنيا على
الشباب النايي اللي زيي، و حاطط لنا برنامجي في برشامه فيها المفيد عن
كيفية النهوض بالبلد، والقضاء على الجهل والبطالة والحد من انتشار البانجو
وسايريات البلاي ستیشن والبنات اللي بتلبس ضيق في المهندسين و جامعة
الدول؛ فأنا قررت إني أقعد مع حد فاهم ידיني المعلومة المفيدة بالقطارة
وبالدرشة وجهًا لوجه و عشان لو فيه حاجه مش مستوعبها أسأل فيها ..

وحصل فعلاً وقعدت مع كذا حد .. ولكني حسيت بشعور غريب قوي
إنه فيه ناس كده وهمه بيكلموني عن مرشحهم الانتخابي و يسردوا ليا إنجازاته
وأعماله حسيت من لمحة التأثير في عينيهم وحطة ايديهم على كتفي وإيمانهم
العميق برسالة مرشحهم وكأني واحد من كفار قريش و يتعرض عليه الإسلام
لأول مرة .. آه والله .. أنا قعدت مع واحد صاحبي مشترك في الحملة الدعائية
لحمدین صباحي، وطول القعدة كانت عيني عالة تجيب دموع وهو بيكلمني
عنه وعن إنجازاته وفيدويهااته وإزاي إنه نصير العامل والفلاح و

الغبان والمظلوم وإنه وواحد مننا ويبقى حرام على تيت أي لو منتخبوش
وبعدما شرح لي كل برنامجه الانتخابي ووعوده لنهضة مصر فضل باصص
لي بتأثر و مستني رد فعلي لدرجة اني افكرت نفسي محمود مرسي في فيلم
فجر الإسلام وهو يصرخ في آخر مشهد : لقد آمنت بهذا الدين الجديد و
أشهد أن لا إله إلا الله وأشهد أن محمداً رسول الله ...و فعلاً حصل .. أول
ما قلت أنا مقتنع يا عم بالراجل ده ومآمن بيه لقيت الواد أبو لهب .. قصدي
لقيت الواد صاحبي قام فاتح حنفية عياط و قام واخديني بالحضن واجمض
بالبكاء واغرورقت عيناه بالدموع وقالى : ”يلا بينا نقوم تنوضا ونصلي ركعتين
شكر“ .. شويه شويه كنت حاسس إنه هيقولي تعالى نكسر أصنام مبارك
وسوزان!!!!

وأفكر أنه قبل معاد التصويت بـ ٢٤ ساعة دعيت ربنا إني أوصل لقرار
صائب بخصوص اختياري لمرشح الرئاسة خاصة وإن خلاص مفيش وقت
وكلها كام ساعة وهبقى قدام ورقة الترشيح ..كنت قلقان جداً .. ده غير
الضغط اللي كنت بتعرض له من أي الفلولية و اللي بتدعي في كل صلاة إنه
ربنا يهديني و يرجعني لدين آبائي وأجدادي المباركين و إنه يعز مصر ويعلي
شأنها ويكرمها بأحد الفلولين .. السيد عمرو موسى أو الكيوت أحمد شفيق
.. أو كليهما .. عشان تبقى خربت رسمي ومعرفش أدفع أقساط الشقة ولا
أجيب مكنة الكابوتشينو اللي بتعمل فوم ورغاوي .. ربنا يهديك يا أي، و
الله لولا إنك أي، لكنت رميت عليك يمين الطلاق ..

هاتي بوسه يا بت

لما تدقق في خلقة العشرتلاف واحد اللي بيتحرشوا جسديًا ببنات وسط
البلد هتتحس إنه كلهم من نفس القطعية وكأنهم اخوات و طالعين من
بكاورت واحد، ليهم نفس الشكل ونفس السحنة ونفس طريقة الكلام
الممطوطة، يحطوا نفس نوع الجيل أبو تلاته جنيه و يلبسوا نفس القميص
اللي بـ ترتر و بيحشروا نفسهم في نفس نوع البنطلون اللي لما يستقطوه
بتكتشف انه ملابسهم الداخلية هي أقرب للـ كلوات منها للبوكرات ولونها
وشكلها بيؤكدك إنهم بيشتروها من مكان واحد ده إن مكش بيستلفوها
من بعض، في رقايبهم لازم تلاقي سلسلة أو جمجمة أو جزير و ده طبعًا غير
كمية الحظاظات والانسيالات والخواتم اللي في ايديهم .. عيال بنص علام
أو مش متعلمين خالص، ونظراتهم متعجرفة وإفياهم ابيحه وميشغلش بالهم
غير الاصطباحه والمزز و شتايمهم دايماً بالأب والأم و سب الدين .. الشكل
الخارجي لمجتمهم غريب، مش مدور او ييضوي زي النبي ادميين، لأ،
بتلاقيه يا إما مفلطح و شبه الساطور يا إما عامل حادثه و ماشي عليه قطر
سبع مرات قبل ما يتقلب في المرة الثامنة، باختصار هتلاقيهم صورة مصغرة
من اوكا واوريجا والعيسوي وبعرور والليثي والحسيني وكل العالم الحلوة اللي
خرجت علينا من حيث لا ندري في الخمس سنين الاخير وده بقى اللي
يخليك تتسائل .. هل ظهور هذه الطبقة من العيال السرسجية والمتحرشين

له علاقة بصعود بعور والليثي وسعد الصغير و السجارة البني وحاسس انه
دماغي بتاكلني ؟! ولا لا ؟! .. ممكن نمشي واحدة واحدة
مجتمعنا بطبيعته مترتب عفوياً (بحسب الرقي والذوق والتعليم) كطبقات،
أعلاها هي طبقة المتعلمين بتتوع المدارس والمؤهلات العليا، وأدناها هم بتتوع
الشوارع وقاطني العشوائيات وبعض الأماكن في المناطق الشعبية .. رغم إنه
ترتيب قاسي شوية لكنه هو ده اللي فرضته الحياة وأقره القدر و منقدرش
ننكره ..

وزي ما بتتوع المدارس والمؤهلات ليهم ثقافتهم واهتماماتهم واجتماعياتهم برضه
بتتوع الحواري و العشوائيات ليهم ثقافتهم و اهتمامتهم وأعرافهم، لكن الفرق
إنه بتتوع العشوائيات مخادوش نفس نصيب بتتوع المدارس من الاهتمام، دائماً
بيعانوا من انه ثقافتهم مهمشة، و اهتماماتهم لا تجد من يشاركها، و فتهم آخره
الموالد وحفلات الطهور وده طبعاً غير النظرة الدونية اللي بيعانوها من الآخر
واللي سببت جوا البعض منهم أشرس أنواع الحسد والحقْد ..
في العشر سنين الأخيرة إعلامنا المحترم عمل حركة غريبة جداً .. دب
ايده عبر كل طبقات المجتمع وقام غارف أدني طبقة فيهم وقام شاددها بكل
قوته عالسطح، شد مغنيين الموالد والحواري والأفراح الشعبية بشكلهم
الغريب بألفاظهم بتلميحاتهم وقام فارضهم على كل طبقات المجتمع الأخرى في
الفضائيات والكليبات والأفلام ليل ونهار علشان يبيقوا هم اللي عالسطح
محط الاهتمام والأضواء، و هنا حصلت الكارثة، وهي إنه الإعلام كان فاكر
إنه لما شد الناس دي فهو بيسلط الضوء على فتهم فقط، لكن للأسف مش
ده اللي حصل، ده سلط الضوء على ثقافة كاملة كانت مدفونة تحت

التراب ونشرها علماً، نشر - دون قصد - ثقافة القاع، ثقافة المهمشين خارج نطاق الزمن و المتمردين على الأوضاع، ثقافة اللي دفنوا أوجاعهم في البيرة والحشيش و الاتنين (آي دي) والسجارة البني وحاسس انه دماغني بتاكلني، ثقافة اللي مش قادرين عاجوز فبقت متعتهم (هاقي بوسه يا بت) و (هاقي قطة يا بت) وعشقهم لكل المحرمات والرقص مع الستات العريانه وكل اللي يخليهم ينسوا اللي هم فيه ... و مع الطفو السريع لـ فنائي هذه الطبقة طفت معاهم بالتبعية كل طبقة القاع من السرسجية والمهمشين واللي بقوا مرططين في كل حته.. ومع انتشارهم أثروا على سلوك وطريقة كلام باقي طبقات المجتمع (لاحظ انتشار لهجة آساحي في الفيس بوك)، و بقوا موضه، لدرجة إنه مفيش فرح من أفراح الفايف ستارز يخلو من نمرة أو نمترين لمطرب من الطبقة دي وحوالية عشرين سرسجي بيرقصوا ويغنوا بطريقهم المميزة، والناس بتتفرج عليهم مش للاستمتاع بأصواتهم ولا فنهم بقدر ما هو الفرجة على حركاتهم وكأنهم أراجوزات في سيرك أو كائنات من العالم الآخر .. و لك أن تتخيل : إذا كان فنائي هذه الطبقة (اللي هم أعلى فئة فيها) يمجدوا الحشيش والبيرة والسجارة البني و(هاقي بوسه يا بت) و (هاقي حته يا بت) فبالله عليك عايز باقي الطبقة (العوام) يبتقى شكلهم عامل ازاي ؟! ... ناس كانت لسنين طويلة مدفونة في القاع مطاطية راسها ومرة واحدة قبت عالسطح بثقافتها بقذارتها بقرفها بقله أدبها دوماً اعتراض من مجتمع هزيل متحلل مغيب هم اليوم في رحلة اكتشاف العالم آخر بما يحملوه من بداءات و أمراض نفسية ولذلك هتلاقي معظم المقالات اللي بتحلل نفسية المتحرش القادم من القاع بتغوص أعمق من كونه بيعمل كده لمجرد الاحساس بلذة جنسية، لأنه لو لذه

جنسية فليه يكون من الطبقة دي بالذات ؟ ، وليه من العيال اللي من القطعيه دي بالذات؟! .. هو أعمق من كده بكثير ..
وده اللي يخليني في النهاية اتفق مع الدكتور (أشرف حمدي) في رأي دمه خفيف حول هذا الموضوع واللي أحب اختتم بيه المقال .. يقول ”بحاول اتقمص دور المتحرش عشان أفهم هو بيحس بإيه .. أصل بالعقل كده ولو حسبناها منطقي حنلاقي ان التحرش مش لذة جنسية .أعتقد هو نوع من الانتقام مخلوط بالجنس الشاذ .. (فيتيش تحرش) : يعني الانتقام من الشيء الذي لا تستطيع الحصول عليه بطرق مشروعة .. مش مجرد واحد استثار جنسيا قام مادد ايدته .. الموضوع اعقد من كده ..ده نظام واحد عايش في مقلب زبالة وأول مرة يشوف المترو الجديد فيقول في باله : يا ولاد الكلب ايه ده كله ؟ والأرض نضيقة وتلمع يا تيت يا ولاد التيت .. واياه ده كمان ؟ تكيف ده ولا ايه ؟ أحبيبيه .. طب أهوه .. ختنووف ع الأرض ويطلع موس يكحت بيه الدهان ويخش يكسر الإزاز حاجة ، حاجه شبه كده صدقت دكتور أشرف .. أتفق معاك جملةً وتفصيلاً !!

أنا جايلك علي طول .. بس مسافة الزحلقة



خبر ظريف قوي مع الصورة دي بيقولك ايه بقى :
”أرادت جامعة التقنية في ميونيخ توفير طريقة سريعة لنقل الطلبة من الطابق الرابع إلى الطابق الأرضي ، فكانت الفكرة أنبوب ترحلق عملاق بارتفاع عشرة طوابق ” فكرة مش بطالة .. والأجمل أنه في نهاية الخبر بيقولك أن بعض المسؤولين بالجامعة بينادوا بتحويل أنابيب التوصيل دي لمشروع كبير يتم تعميمه في مدن وجامعات ألمانية و ربما تصديره لجميع دول العالم .. يعني ممكن نلاقه هنا في مصر .. لكن مش عارف ليه تخيلت جدلاً كده أن الفكرة دي

لو اطبقت في مصر - على الرغم من بساطتها - فهي لن تخلو من المفاجآت .. يعني أنت مثلا ممكن يكون عندك مشوار مهم ولا بس بدلتك الشيك و معاك لابتوبك الأنيق وعازر تترحلق بأسرع وقت عشان تلحق معادك ، فبتخش الأنبوه وبتترحلق كافي شاب جنتلمان وخلاص بتقرب وشايف المخرج اللي تحت وتقوم مرة واحده تتفاجيء بواحد فضولي من شعبنا - وهتحصل صدقي - مدخل أم دماغه عشان يشوف مين اللي نازل من فوق فتلاقي نفسك راشق في بؤه عطلول وفاد أناقتك وشياكتك ولا بتوبك اللنوذ .. فلازم نشوف حل للموضوع ده ..

الحاجة الثانية ودي مهمه برضه إنه للأسف الأنبوه الواحدة عشر أدوار .. فطويله قوي قوي قوي .. طب فرضًا و أنا نازل اتزقت في النص وعازر أخش الحمام أنصرف ازاي؟! .. لازم حل للموضوع ده وإلا هتتحصل حاجات مش كويسه وساعتها الأنبوه هتبقى بترحلق فعلاً .. بترحلق قوي .. بترحلق خالص .. الحاجة الثالثة .. أنه فرضًا لأي سبب وقفت في نص الأنبوه .. يعني مثلاً لقيت نفسي غارس في حته خشنة مبتزحلشش أو جالي كرشة نفس من القفلة السودا اللي حواليا ولقيت نفسي مكلبش جواها ومش عارف اتحرك .. الناس هتعمل أيه عشان ينزلوني؟! ، يعني هينفخوا من فوق مثلاً عشان اتزفط أنا من تحت ، ولا يجيبوا واحد عني شويه وعنده صحه يقطرني لحد ما أخرج ، ولا هلاقي ناس بترقتي من ورا وأفضل أنا ادوس بنزين لحد ما ألاقي نفسي بترحلق لوحدي ولا إيه بالظبط؟! ..

ده برضه سؤال محتاج إجابة .. الحاجة الرابعة .. طبعا الأنبوه دي الواحد

بيخش فيها من فوق يلاقي نفسه هوووب نازل من تحت .. بس ده بقى
في بلاد بره .. احنا في بلادنا الناس تموت في انها تمشي عكس .. يعني ممكن
تبقى بتتخلق في أمان الله تلاقي واحد طالع في وشك .. متسألنيش ازاى
عشان احنا شعب بيْفهم في الكفت ويعملها .. فدي برضه حاجة محتاجين
ليها حل .. الحاجة الأخيرة بقى .. أنك ممكن بيتقى وراك معاد وتلاقي نفسك
داخل خناقة مع سبعين واحد كل واحد فيهم يقولك أنا عايز أتزلق الأول ..
فطبعاً ممكن يحصل انحشار وانسداد جوه الأنبيوه لو كله نزل مرة واحدة ولا
تنفّش بقى كلاكسات ولا دياولو .. ولذلك أعتقد أنه لا بد من توفير أناييب
فرعية عشان اللي وراه معاد مهم يخترم منها علطول ويلحق معاده ..
يا ريت مصنعي هذه الأناييب الرفلوطية الأفغانية يجاوبولنا على الأسئلة
السابقة دي في أسرع وقت عشان لو كده نلحق نجيبها .. هتتفع في المصالح
الحكومية وفي الأبنية التعليمية وخاصةً مع مع العيال بتوع المدارس اللي عايزين
يزوغوا، يعني بدل ما الواد يغامر و يتسحب من الفصل، وينزل بسرعة من
عالم، و يعافر عشان ينط السور .. لأ .. يتزلق في الأنبيوه دي فيلاقي
نفسه في سرير بيتهم علطول ..

وعمار يا ميونيخ ..

المغيث في طريق مصر اسكندرية الزراعي



للمسافرين عبر طريق مصر اسكندرية الزراعي .. دي شوية نصايح عشان
تقلل عدد ساعات التوهان والمخاطر في الطريق ده .. وده للي بيسافر أول
مرة .. اللي سافر قبل كده من الطريق ده عارف أنا بقول أيه ..
خد بالك الطريق بقى أنيل من الأول .. عربيتك مش هتمشي زي ما بتمشي
في الطرق العادية .. لأ .. هتلاقيها بتتنطط .. عشان الأسفلت مدغدغ وفيه
نوءات وانبعاجات واختناقات وشقلاظات .. و العلامات اللي كانت

بتحذرك من وجود مطبات بعد ١٠٠ متر بقت مخطوطة بعد المطبات بـ
١٠٠ متر .. يعني تلبس المطب و تبتدي تشوف العلامة بتقول ايه ..
خليك ماشي سلانسيه سلانسيه ..
طول ما أنت ماشي هتلاقي يُفط وعلامات مكتوب عليها (السلامتك
.. اخص سيارتك قبل السفر) .. وتحت العلامة هتلاقي عربية مدغدة
ومدعوكه دك السنين .. بعديا بشوية هتلاقي عربية ثانية متهردة وواحد
يركب نفس اليافاطة فوقها .. الموضوع مش صدفة .. اخص عربيتك .. اخص
يا حبيبي .. اخص يا بابا ..
متطلعش ولا كوبري .. حتى لو صح .. الكباري خطر قاتل .. و بتوديك
محافظات وكفور ونجوع ثانية .. خليك بالأرض أحسن .. حتى لو السكة
مش صح ..

اسمع كلامي في النقطة دي بالذات .. لو وصلت لمفترق طرق - بيتفرع لخمس
اتجاهات مثلاً - اوعى تبص عالاسهم .. هتحتاج يومين عشان تفسرها خد
يمينك عطلول .. ولو تُهت .. ارجع تاني وخذ الشمال .. افكر أنك مش أنت
لوحذك في الطريق .. هتلاقي معاك فسبا وعجل وتكاتيك .. وبقي في وسيلة
مواصلات عجيبة قوي عبارة عن ربع نقل بتلات عجالات بدل أربعة (مش
فاهم ايه الحكمة) .. المهم متشدش مع أي حاجه فيهم لأنهم هيسبقوك حتى
لو انت ماشي على ١٧٠ (برضه مش عارف ازاى) .. لو فيه فتحة عايز تلف
منها و رحت مفوتها لأي سبب .. ارجع بالعربية لورا ولف منها .. لأنك لو
أخذت الفتحة اللي بعدها - مع أنها على نفس الطريق - هتلاقي نفسك في

مكان ثاني خالص .. صدقني .. قوانين الفيزياء والطبيعة بتيجي لحد مصر
اسكندرية الزراعي وتخرف..
لو تتهت انزل واسأل .. والي هيوصفلك الطريق خليه يوصفها لك ثاني ..
لانه غالبا بتلاقي الوصف الثاني غير الاولاني تمامًا .. مع أنه نفس الشخص
..الصنف الوحيد اللي متسألوش على السكة لو تتهت هم السواقين اللي
يركنوا مقطوراتهم ويبيعملوها على جنب .. متسألوش وهو يمارس هذا
النشاط .. لأنه في الغالب ييلف لك بعفوية ويجاوبك .. وساعتها هتندم ندم
السنين ..

لو ماشي بسرعة رهيبة والدنيا كحل ولقيت العربيات اللي قدامك كسرت
شال أو يمين مرة واحدة .. أكسر معاهم من غير ما تفكر .. أكسر وبعدين
يبقى أسأل هم كسروا ليه..
لو لقيت مرة واحدة تريلا في وشك .. يبقى أنت مكسرتش مع العربيات اللي
كسرت زي ما قلتك .. مصر اسكندرية الزراعي مختلف عن كل الطرق
الثانية .. التريلات والمقطورات هي اللي بتاخذ غرز من الملاكي .. مش
العكس .. فامشي على مهلك خالص و متحاولش تسرع إلا لما تلاقي
العربات بتقرب منك وبتشتمك شتايم أبيحة قوي قوي .. (مش أبيحة بس)
لأ لازم تكون أبيحة أوي أوي ..

لو ماشي على ١٤٠ ولقيت مقطورة جايه في وشك متخضش ..
ومتكسرش شمال ولا يمين .. خليك ماشي في طريقك و هو هيعرف يفاديك
ازاي وبعدي منك .. همه متدربين على كده .. لو لقيته لسه بيقترب منك

ارعش له .. لو لقيته برضه بيقرّب منك وخلاص هيفعصك ابتدي اقلق
الطريق مفهوش بلطجية ولا قطاع طرق بيثبتوا العربيات زي ما هو شائع
وده لأن كل اللي ماشيين جنبك همه نفسهم قطاع الطرق والبلطجية
والمدمنين اللي نازلين القاهرة يمارسوا نشاطهم الاعتيادي ويرجعوا تاني ..
فسوق وأنت مطمئن .. ودي كانت نصايح بسيطة للمسافرين عبر طريق مصر
— اسكندرية الزراعي .. وفيما عدا كل اللي فات فالطريق كله أمان يا برنس
.. وتقدر تسافر وأنت مستريح ..

اتبرع ولو بـ رقبة

يا جماعة بجد و من غير تريقة .. هي الناس المتجوزة وعماله تتخن دي
”رقتها“ بتروح فين في وسط التخن ده ؟؟ أصل أنا في أول يوم العيد
كنت بتغدى مع جاعه صحابي بقالي فترة مشوفتهمش ، متجوزين من ٥
سنين أو أكثر ، و أول ما شوفتهم بصيت على رقايلهم ملقتهاش .. راسهم
بقت مأتمه مع صدرهم وبتحكي حواديت لحجايلهم الحاجز .. سألتهم و قتلهم
يا جماعة أنا فآكر إنه كان عندهم ”رقاب“ في يوم من الأيام ولا أنتوا ناس تانيه
ولا إيه حكايتكم بالضبط ؟؟! .. لقيتهم و كأني قلبت عليهم المواجه .. حطوا
المعلقة في أطباقهم وعينهم اتملت دموع و كانوا عايزين يبصوا لي بس افتكروا
خجاة إن دماغهم فقدت حرية الحركة من زمان .. وعشان يتلفتوا شال أو
يمين لازم يتحركوا بكل جسمهم وده كان صعب لأن كرش كل واحد فيهم –
اللهم ما لاحسد – كان هيعمل حادثه مع كرش اللي جنبه وده اللي خلا كل
واحد يرضى بالمساحة اللي ركن فيها كرشه قدامه من غير تعدى على المساحة
المخصصة للكرش المجاور ويحاول إنه يتكلم من غير ما يبص لي .. حكوا لي
قصص وحكايات كتير عن الراحة والأكل والأنخه اللي تسببت في التخن ده
والتخن اللي بدوره تسبب في تمدد الجسم وخاصة منطقتي الصدر والبطن ..
ونتيجة التمدد ده الرقبة بتختفي وهي مش بتختفي بمعنى الاختفاء التام .. لأ
دي بتتكبس

ما بين الراس والصدر .. يعني موجودة برضه في مكان ما .. وعشان تتأكد ممكن تخلي واحد يثبتك من كتفك وواحد تاني يشدك من راسك هتلاقي هووووب الرقبة اتمطت معاك علطول زي السوستة وممكن ساعتها تبص عليها بصره سريعة وتبوسها وتتصور معاها كمان وتشوفها لو عايزة حاجه قبل ما ترجع راسك تاني مكانها .. ولما تيجي ترجع راسك متسيبهاش مرة واحده عشان متفلتش منك و تخرق البطن وتنزل في رجلك وتبقى أنت ماشي من غير لا رقبه ولا راس .. رجعها بالراحه و بشويش لحد ما تستقر فوق الصدر تمامًا ولفها لفه بسيطه لحد ما تسمع صوت الـ ”تك“ .. أول تسمع ”التكة“ دي تعرف إنه الراس ركبتي في الصدر مضبوط ومش هتتخلع !!

وبعدين (ده لسه صحابي التخان اللي من غير رقبة بيحكوا) كويس أنها جت على اختفاء الرقبه بس، ده فيه ناس بعد ست أو سبع سنين جواز بتلاقي صدرها كمان بيختفي وتبقى الراس مش لاقية رقبه ولا صدر فبتلرز في البطن علطول .. يعني الراجل بيتحول إلى رأس وبطن فقط .. اللي هو تبص عليه من بعيد تلاقي بالونه ماشيه وطالع منها زتونه .. والمشكلة إن كرش أي راجل في أي بلد في الدنيا بيتمدد لقدام .. لكن الراجل المصري عشان معروف بجبروته وتغلبه على قوانين الطبيعة كرشه بيتمدد في كل الاتجاهات قدام .. وفوق .. وتحت .. وبالورب .. وفي كل ناحية .. كأنه قنبلة ذرية موشكة على الانفجار في أي لحظة .. لدرجة إنه فيه واحد - صحابي بيحكوا - كرشه كان بيكبر كل يوم بطريقة موهلة خلته مش عارف يحضن عياله من ساعة ما اتولدوا .. ولما راح لدكتور اداله دوا جامد قوي خلا كرشه يتوقف عن النمو تمامًا .. وفعلاً الكرش بطل يكبر .. لكن بعد يومين حصلت المفاجأة

وهي إنه الكرش بدأ يقب من ثاني .. بس لفوق المرة دي عشان قدام مقفول
والد قببان لفوق ده خلا الكرش يدمر كل ما يقابله من حجاب حاجز ومعه
ورئه وصدر وبلعوم لحد ما التحم بالراس زي التحام مركبة ماهر بغرانديزر ..
فبقى الراجل عباره عن كتلة هلامية خريتينية متحركة ليست لها أي ملامح
.. وده اللي خلا مراته بعد يومين تطلب الطلاق بعد ما حسست بفراغ
عاطفي رهيب .. والفراغ ده مش نتيجة شكل الراجل الوحش وعدم اهتمامه
بمظهره .. ولكن نتيجة إن الكرش وهو ييقب لفوق فعض القلب فبقى الراجل
معندوش قلب وحلوف ومش قادر يدي مراته جرعات اللامور اللي اعتاد
انه يديهالها في مرحلة - ما قبل الكرش ..

للأسف الكلام عن التخن، والكروش اللي بتقب، والرقاب اللي بتختفي
مش هيخلص .. وزتونة الموضوع - زي صحايي الي من غير رقاب بيحكوا -
انك تخليك محافظ على جسمك ورشافتك ولو حسيت إنه رقبته بتتضاءل
قلل الأكل ولو لقيتها بتتاكل قلل الشرب ولو لقيتها اختفت تمامًا بلغ البوليس
صحايي قالوا لي النصيحة دي مع اخر معلقة في طباقهم اللي مسحوها مسح
ومسابوش تنتوفه ولما سألتهم ما شاء الله عن سرعتهم في الأكل ضحكوا ..
و قالولي ان دي هي الميزة الوحيدة في تخنهم .. الأكل والهضم بسرعه .. وده
بسبب ان الراس لازقه في البطن عطلول .. فاللقمه بتخش البوء تتزفط
عالمعه وش .. مفيش بقى بلعوم ولا مريء ولا أجزاء الجهاز الهضمي اللي
أخذناها في ابتدائي دي كلها تختفي مع اختفاء الرقبه والصدر .. ودي حالة
نادرة لا يتم تدريسها في تعليمنا المجاني ..

الحمد لله على نعمة العقل .. وعلى نعمة الرقبة .. وعلى نعمة الزوجة التي لا تأكل - ولا تساعد على تأكل - رقبة جوزها وصدره وبطنه وبلعومه فلا يشعر بالنقص ولا يشعر بحسد الآخرين على رقايلهم فيضطر في النهاية إلى الجلوس وحيداً أو الاشتراك في الجمعيات الخيرية التي تحمل شعار - اتبرع ولو برقبة

القول التام في حق الست إلهام

” يا زانيه، يا فاجرة، يا قدرة، يا زبالة، يا داعرة، يا معفنة، يا سافلة، يا واطية، يا عريانة، يا للي بتباسي وبتتخصني و بيعتليكي الرجال باسم الفن .. توبي إلى الله بقي ...“

كان هذا هو (#عبد الله بدر _ ستايل) في دعوة إلهام شاهين إلى الله .. وهو الستايل الذي تكون من مقطوعة واحدة طويلة بنظام السولو احتوت على هذا الكم الهائل من الألفاظ والشتائم و التي أهداها كلها برمتها إلى الفنانة إلهام شاهين ومخلاش أي حاجه حتى لسنادية الجندي أو لبلبة .. و لا أعلم كيف استقبلت إلهام رصاص وقذائف عبد الله وخرابطشه وما وقع كلماته على نفسيته .. أن تستيقظ الست صباحًا لا بيها ولا عليها، وهي بتضرب النسكافيه وتفتح التلفزيون فتلاقي واحد عمرها ما قابلته ولا قابلهما يقولها قدام الملايين ”يا اللي بيعتليكي الرجال باسم الفن“ لهو قاسٍ أشد القسوة .. اعتقد إن إلهام اضايقت ده إن مكشش طبعًا النسكافيه وقع على جنتها وسلخها سلخ .. ”مش كده ؟؟“

قلتها لصديقي - و الذي كان مؤيدًا للدكتور عبد الله وراح يدشن صفحه يدعمه فيها ضد الهام شاهين - فتوقفت كوابية الشاي وهو في طريقها إلى فمه ونظر لي مستنكرًا: ” بتقول اضايقت ؟؟؟ ؟؟ ... همه اللي زي إلهام دول بيعسوا ولا عندهم دم ؟؟ .. يا شيخ قول كلام غير ده ”

قلت : بس يا أخي حتى لو إلهام سافلة ومنحطة وعريانة و بيعتليها الرجال باسم الفن لازم طريقة النصح تكون أفضل من كده ؟ .. فين الساحة والرقعة والهدوء و العذوبة في الخطاب الديني و التي تجعل قلب إلهام يرق و يعود إلى الله ..

أزاح صديقي كوباية الشاي بعنف بعد ما اتسدت نفسه وقال :
” ساحة ورقه وعذوبة وقلب الهام يرق إلى الله ؟ ؟ ؟ .. يا قلب أملك يا نايتي .. فهو احنا مش مضيعنا غير سلبية الشباب الكوكو واوا اللي زيك ..
قلب إلهام شاهين ده رقد عليه وحضنه فنانين بعدد شعر راسك .. اتفحص و اندفن .. ده فيه أحضان من قوتها كانت بتوصل لمستوى الرضاعة الطبيعية .. فن ده ولا أمومة ساخنة حضرتك .. و بعد كل ده تقولي قلب إلهام ..
قلب ايه اللي انت جي تقول عليه ؟ انت مش عارف الست ديه عملت فينا ايه ؟ ”

أنشدها بطريقة كلثومية ثم حبس دمعته بعد أن تذكر كيف أفقدته لظلاله إلهام شاهين ودلعه برائته أيام الثانوي، وكيف أذابت عقله بقبلايتها في (لحم رخيص)، وكيف ارتج كيانه مع كل هزة من وسطها في فيلم (دانتيل)، وكيف كانت هي ونادية الجندي ولبلة وسبعناشر ممثلة أخرى رفقاء دربه أيام المراهقه والثانوي قبل أن يهديه الله إلى سواء السبيل و يكتفي بمشاهدة عفاف شعيب في مسلسل العار بعد ما اتحجبت.. جذب صديقي إليه كوب الشاي من جديد بعد أن لمح في عيني الغدر بما تبقى من كوبايته وتابع قائلاً :
” أنت فاكرك يا صاحبي إنه إلهام شاهين دي و من هم على شاكلتها

من الفنانات التخينات عاريات الصدور و مكتنزي المؤخرات عندهم قلب
و يحسوا باللي بيعملوه في الشباب اللي زينا ؟ .. دول قلوبهم انتزعت من
جوفهم من زمان و اتحجرت لحد ما بقت أنشف من حجر المعسل .. همهم
الشهرة والأضواء والدور يتربط تمام وملعون أبو اي حاجه تانيه .. وبعدين
ما احنا حسنا اتنج معاهم من كتر الرقة والعذوبه والساحه .. عيب يا الهام
ميصحش يا لبلبة .. هدي اللعب شويه يا نادية .. كفاية عجن يا يسرا عندنا
شباب مش مجوزة و بنات عذارى يا سهير ... لحد ما زهقنا .. يا أخي
ده من ساعة ما اخترعوا التلفزيون وهمه موراهاومش غير البوس .. وكأن
التلفزيون ده كباريه شغال بالكهربا .. إلهام شاهين دي من ساعة ما أنا
وعيت عالديا والكل نازل فيها هري .. ستين سنة بتبوس بنت الرضي مش
عايزة تتهد .. المراهقين تعبوا يا صاحبي .. والشباب اللي النهاردة بيتفرج .. عايزة
بكرة يجرب “ ” الشاب اللي النهاردة بيتفرج .. عايز بكرة يجرب“ ؟!

عجبتني الجملة الأخيرة دي .. إن صحت فهي ممكن لوحدها تفسر كم الحيوانية
اللي بنشوفه كل يوم في صورة انحلال أخلاقي وسعار الجنسي وحوادث
تحرش واغتصاب .. الحاجات دي مجتش من فراغ .. لازم لها شرارة ..
ومفيش أسرع من شرارة المشاهد الساخنة المخزنة في العقول والتي تنشط
بمجرد رؤية الشريك الآخر في المشهد .. الأنثى .. قال أحدهم يوما : لا
يخدعنك الجميع بقوله “ده لخدمة الدراما و في سياق الفيلم” .. ملعون أبو
الدراما على الفيلم كله، فجرة الجنس في أفلام هؤلاء أكبر من قدرة أعصاب
الشباب الغلبان على الاحتمال والذي يريد تفريغ طاقته في الفعل .. إنه الفعل
الذي قد يبدأ بنظرة ويتطور للمسه ثم ينتهي بالوقوع في الحرام .. إذن

فلتذهبك درامتك وفيلمك - مع مؤخرتك بالطبع - إلى الجحيم ..
تابع صديقي قائلاً وهو لا يزال يبحث عن صورة أمورة لعبد الله بدر
ليضعها بروفايل بكتشر بالبيدج :
”وبعدين يا صاحبي متخلّش إلهام شاهين وأمثالها يصعبوا عليك .. أنت
عايز يعني تفهمني إنها أول مرة تسمع الكلام ده .. تبقى عبيط .. واحده
بتتباس وبتتخصن ثلاثين سنه عمرها مثلاً ما قرت في جرايد ولا سمعت في
إذاعه ولا حد قالها يا هانم اللي بتعمله ده عيب وحرام ؟ .. ده تلاقي بس
اللي مزعلها إنها في الوقت اللي شتمها فيه عبد الله بدر كانت بتعمل مشهد
ساخن ولما اخدت بريك و فتحت التلفزيون لفته بيوصف المشهد بالضبط
فحرق لها الفيلم واللقطه .. متخلّش دموع التماسيح وبكاء البطاريق يخدعك
.. إلهام مش زعلانه .. هي بس مخضوضة .. مخضوضة لأن الإسلاميين
في الفترة الأخيرة شموا نفسهم وأخذتهم الجرائد و بدءوا ينهشوا في أعراض
الفنانين والفنانات .. أيام مبارك مكنش ده يحصل كده عيني عينك .. كان
بتليفون صغير من أي فنانة لوزير الثقافه أو وزير الإعلام كفيل بإغلاق
برامج وتسريح مزيين .. الفنانين كانوا حبايب مبارك قوي لأنه عارف تأثيرهم
عالناس واستخدمهم ٣٠ سنه لتغييب العقول وجعل الشعب يهتم بغرائزة
وحيوانيته أكثر مما يهتم بعقله .. وهو العقل الذي كان يخشاه مبارك .. عشان
كده متلاقش حبايب مبارك مثقفين ولا مفكرين .. لأنهم كاشفينه وعارفين
بلاويه .. المثقفين والمفكرين كانوا دائماً في المعارضة .. أما العلماء ف دول من
قلة القيمة في بلدهم كانوا يهاجروا بره .. هات لي فنان واحد من المشاهير
القدامى مش متعاطف مع مبارك أو ضد الثورة .. دلوقتي إلهام وأمثالها ريشه

في هوا .. والكل يبلطش فيهم .. وخضتها دي نتيجة إنه عبد الله بدر هو بداية لسلسلة من الإهانات والاضطهاد اللي مش هتقف أبداً خاصة مع تنامي التيار الإسلامي ” ..

استمعت بحيرة لكلام صديقي غير أني لم استطع في النهاية تكوين رأي يجعلني مؤيداً لعبد الله بدر (موضوعاً وليس أسلوباً) أو أن أكون مدافعاً عن إلهام شاهين .. كنت أريد أن استمع لـ ردود إلهام على ما قاله بدر لتكتمل الصورة ..

دخلت على اليوتيوب وكنت اسم الفنانة في البحث .. وهنا أظهر لي الموقع - ما شاء الله ولا قوة إلا بالله - مليون ونص مقطع فيديو لإلهام شاهين .. وبالرغم من ظهور النتائج في خمس ثواني إلا أنني كنت محتاج خمس أيام للبحث عن فيديوهات الرد من بين ألوف المقاطع التي تحمل أسماء على غرار (شاهد المشهد الساخن بين إلهام ومحمود عبد العزيز) و (شاهد البوسة الجامدة بين إلهام وكريم عبد العزيز) و (شاهد الضمة الدافئة بين إلهام وشارع عبد العزيز كله) .. ساعتين من البحث والتعب حتى وصلت للفيديوهات اللي كان ترتيبها المليون وميتين ألف بعد مئات المقاطع التي تختبر جراتك للإلقاء نظرة على أرداف إلهام وصدرها ومؤخرتها وكرشها وما إلى ذلك وهي المقاطع التي حققت نسبة مشاهدة أعلى من خطاب مبارك للتنجي ..

وعلى مدى ساعتين أو أكثر استمعت لدفاع إلهام شاهين عن نفسها في البرامج والفضائيات ومداخلات مؤيديها والمتعاطفين معها.. في الواقع لم أقتنع بجدلية الحوار والنقاش ... الجميع يعترض على أسلوب عبد الله بدر ولهجته و

طريقته في إلقاء الاتهامات دون الاهتمام بمحتوى كلامه وتنفيده .. أما أولئك القليلون الذين اهتموا بالمحتوى جاء كلامهم غير منطقي بالمرة .. فعندما اتهم بدر إلهام شاهين بنشر العري والفحش بلقطاتها الساخنة في أفلامها ردت بأن هذا (فن) وأن هذه الأفلام أخذت جوايز في مهرجانات متعددة !!!! وكأن هذه الجوائز تجعلها ربة الصون والعفاف ؟؟ .. وعندما اتهمها بالزنا لاحتضانها وتقبيلها لرجال لا يحلوا لها ردت بأن ما يقوله هو (قذف محصنات) في الإسلام إذن فأخبرينا يا حابه بم تسمى أفعالك في الإسلام ؟؟؟؟! .. وهكذا ذاب الحوار و انسحقت جدليته بين مطرقة التعاطف وسندان عدم الموضوعية ..

ولكنني هنا اكتشفت إجابة السؤال الأبدي .. لماذا لا يوجد حل في هذا الجدل القديم بين الإسلاميين والفنانين ؟ .. لماذا لا يزال ينظر بعض الشيوخ للفنانين كداعرين وزناة وينظر الفنانون للشيوخ كأهل تزمت وكبت .. ولماذا لا يصلان كليهما لحل بشأن اللقطات الساخنة والمشاهد الحميمة في الأعمال الفنية .. الإجابة تكمن في الحوار السابق بين إلهام وعبد الله .. وهو الحوار الذي يتكرر بين كل شيخ وكل فنان ... حوار غير منطقي وليس له حل .. وسببه بسيط .. وهو اختلاف المعايير في الحكم على الأشياء ... الشيوخ معيارهم هو (الحلال والحرام) .. كل أمور الدنيا - ومن بينها الفن - تخضع لهذا المعيار .. أما بالنسبة للفنانين فمعيارهم (حرية الإبداع من عدمها) و(الفن الراقي والهابط) و (الدراما عايزة كده ولا لا) .. ولذلك تلاقي دائما الشيخ بيتكلم في حابه والفنان بيرد عليه بحاجه تانيه خالص .. الشيخ يقول البوس والأحضان حرام .. فيرد الفنان (بس ده اسمه فن) .. الشيخ يقول المشاهد

الحمية حرام .. فريد الفنان بأنه طالما في سياق الدارما يبقى مفيش مشاكل .. الشيخ يقول لا يحل الاختلاط بين الولد والبنت .. فيردوا عليه إن ده (اسمه تمثيل) .. وهكذا لا يحدث اتفاق لأن كل واحد له معيار مختلف في الحكم على الأشياء .. وعندما تختلف المعايير لا تتفق النتائج .. على أن ما يشغلني أكثر من النقاش بين بدر وإلهام هو أن هذا النموذج سيتكرر في الأيام القادمة كثيراً .. نموذج الشيخ المشحون والفنانة المغلوبة على أمرها .. الداعية الهجومي والممثلة اللي بتعمل شغلها و بتخدم الدراما .. مزيد من الكراهية لن يجد ما يدعمه سوى صفحات الفيس بوك وتويتر والزباطين في الزبطة وتعليقات المؤيدين والمعارضين لتتعمق الفجوة بين الجماعات والأفراد في صورة سخيفة لنشر المقت والكره نحن في غنى عنها .. تابعت صديقي الذي أنهى كوابية الشاي وتهياً بكل حماس لوضع أول بوست على صفحته على الفيس .. البوست هو وعد بنشر فيديو مدته ساعتين يضم جميع اللقطات الساخنة لإلهام شاهين تحت اسم .. (الأعمال الكاملة للست إلهام واحكموا بنفسكوا) .. البوست قوبل بالاستياء من مؤيدي عبد الله بدر و مؤيدي الهام شاهين في نفس الوقت لأنه إساءة للفنانة و تصليح غلط بغلط وكل من يشاهده يأخذ ذنباً .. أعجبني الرد .. وحمدت الله على أن الفتنتين - مؤيدي الهام ومؤيدي عبد الله - اتفقوا بأن ما تفعله إلهام وإن كان عليه خلاف فهو في الأول والآخر ... ذنوب ..

أيها المسلم دعني اهمس في اذنك :

ادعق انت واللي جابوك بجاز

نحن المسلمون المذبوحون بسواطير البوذ في بورما، والمقتولون بأيدي الهندوس في الهند، والمدفونون بالحيا تحت جرافات اليهود في اسرائيل، والمُبادون بأيدي الملاحده الروس في الشيشان، و المشردون والمغتصبون والمنكل بهم بأيدي الأمريكان في جميع بقاع الأرض لا يجد أعقل عقلائنا سوى ذلك الحل الأزلي لحفظ دمائنا وما تبقى من كرامتنا ..

”يا جماعة العالم فاهمنا غلط لازم نحسن صورتنا قدامه وصورة الإسلام عند الآخر ..“

فاهمنا غلط!!! .. و (نحسن) ؟؟؟ .. يقولك (نحسن صورتنا) !!! ..

وكأننا نحن المجرمين والقنلة والداعرين والزناة والملزمين طوال الوقت بتقديم ما يثبت حسن نوايانا للآخر .. الجندي الأمريكي في العراق يولع في بيتي ويعري مراقي ويدبح عيالي وأقول معذور مش فاهمني، أنا هبعثله القرآن الكريم مترجم لسبعتناشر لغة يمكن يعرفني أكثر .. الهولندي والدانماركي والسويدي والنرويجي وكل جنسيات الأرض كلما وجدت من وقت فراغها متسعا سخرت من رسولي ومقدساتي بدعوى الحرية و التعبير عن الرأي فأقول معذورين ميعرفوش إنه نبي الرحمة المهداة و المبعوث للعالمين، لما أبعت حد يفهمهم .. وطيار حلف الأطلنطي يقصف عشرات المنازل في أفغانستان

ويمحو قرىً بأكلها من الوجود فأقول معلش ، مسكين ، ده بيخلط ما بين الإسلام والإرهاب ، لازم باعتله ناس تفهمه الفرق وتأخذ بإيده واحدة واحدة ولا يفجني سوى تلك القصة المضحكة المبكية التي يتناقلون بها دومًا عن ذلك المواطن الأمريكي (أو الانجليزي أو الأسباني أو أي جنسية تحبها) والذي كان يقف في متجرٍ ما فسمع مسلمًا يقرأ قرآنًا ففزع الأمريكي وظن أن المسلم هيفجر نفسه فهرب من المكان، وفي رواية أخرى نط من الشباك ودهسته تريلًا، فما تلبث تلك القصة أن تصل إلينا حتى تنهمر دموعنا انهمارًا وتقشعر أبداننا اقشعرارًا ويصرخ الناس في بلادنا حزنًا على ذلك الأمريكي اللي كان فاهم اسلامنا غلط لترتفع الأصوات قائلة ” يا جماعة ازاي كده ؟ .. ازاي يستخبي ؟ .. الناس دي لسه فاهمانا غلط ...

ده احنا مطلوب مننا نوصلهم و نفهمهم انه ديننا دين السباحه ومش دين ارهاب“ .. وفي أيامٍ معدوده تطبع طبعات راقية من القرآن المترجم، وأضعافها من السيرة النبوية، ليحملها شباب كاجوال بلحيٍّ مشدبه ووجوه لامعه و لكنة نيويوركيه لا تخطأها الأذن فيحاولوا بكل ما أوتوا من أدبٍ جم ورقةٍ حاشية أن يقنعوا الغرب أننا كائنات نباتيه لا تقتل البشر، وثدييات سمحة تعيش و تتعايش مع الآخر وليصير هذا هو الحل الجاهز الذي نملكه دومًا في تعاملنا مع الآخر ولا نملك غيره .. وهو أن تتحرك أمتنا عشان تطبطب على الأمريكي الخايف، ولكنها تغض الطرف عندما تقتل حكومة ذلك الأمريكي شعوبًا وتبيد قرىً وتبارك التشريد والقتل في شتى بقاع الأرض ..

نُدبح كالخراف، و نُشرد كالكلاب، و نُهان كالبغال، و نُساق كالنعاج، و نُقتل كحيوان الغاب .. نعم إنه نحن مسلمو هذا الزمان يا عزيزي .. فلا نجد من تبريرات عدائهم نحونا سوى ”احنا مفهومين غلط“، ولا نجد ما ندافع به عن أنفسنا سوى ”خلينا نصصح مفاهيمهم عننا“، لنصل إلى اليوم الذي أضحى فيه عدد قتلى المسلمين حول العالم في العشر سنوات الأخيرة عشرين مليوناً .. عشرين مليون مسلم دُبحوا بأيدي كل الأعراق والجنسيات بخلاف من تم تهجيرهم وتعذيبهم وقصف منازلهم وليصدق هنا قول رسول الله صلى الله عليه وسلم (توشك أن تداعى عليكم الأمم كما تداعى الأكلة إلى قصعتها) وليجعلني هذا أسأل : ماذا تبقى لنا من آدميتنا و إنسانيتنا كي نستثار لأجله و متى نغضب غضبةً يرتج لها العالم !؟

و متى نجد حلاً عملياً نحقن به دماء مسلم ينتظر الموت في بقعة ما من بقاع الأرض .. لماذا نصر على توجيه كلامنا للشعوب بينما مشكلتنا الكبرى مع حكومات هذه الشعوب .. لماذا نقطع كل ولايات أمريكا زحفاً لعمل محاضرات تعريف بالاسلام بينما مشكلتنا في ولاية واحدة .. واشنطن .. لماذا نلهث وراء الأمريكي الذي أفرعه قرآنا عشان نطبطب عليه بينما حكومته تركض ورائنا لتقتلنا وتمثل بجثثنا .. أولو كان المذبوحون في بورما يهوداً أسيست العالم !!؟، هل لو كان المنكل بهم في الهند أو أفغانستان أمريكان أو بريطانيين هل كان ستغمض لأساطيل الناتو جفن قبل ملاحقة القتلة، و ذبحهم قبل حتى تقديمهم للعدالة .. يزيدون هم في طغيانهم فتزيد نحن في اعتدائنا، يرفعون سلاحهم فنطأطأ لهم رؤوسنا .. وهذا يدفعني أن أسأل :

بعد كل ما تمارسه أمريكا من قتل وتشريد واستهزاء بالمقدسات هل سمعت يوماً عن مصطلح (تحسين صورة أمريكا في الشرق)، هل وجدت وفوداً أوروبية أو أمريكية تنهال عليك لتبرر استهزائها بك و قتلها لك .. كلا .. نحن فقط الذين نعيش بعقدة الذنب المفتعلة و المطالبون بالتبرير والاعتذار واطهار حسن النوايا .. أمريكا لن تجهد نفسها يوماً يا عزيزي لتجميل صورتها للآخر، لأنها من الأصل لا تعترف بالآخر .. فهذا الغول الرأسمالي يطبق أشنع مبادئ العلمانية في تعامله مع الآخر .. وهو فصل الأخلاقيات عن المصالح .. ومسخ القيمة من المادة .. يعني مش مهم انت شايفه ازاي طالما هو بياخد مصلحته منك ويحقق أهدافه .. وهو ينظر للعالم ككيانات تحوي بداخلها مصالحه وعليه استخراجها بشتى الطرق المشروع - والغير مشروعه - غير عابىء بصورته أمامك لأنه من الأصل يختصر في ماديتك غير عابىء بانسانيتك .. كم بلد فرضت عليها أمريكا عقوبات بدعوى تهديد الأمن ؟ وكم بلد دخلتها أمريكا بدعوى الدفاع عن الحريات ؟ وكم بريئ قتلته أمريكا بدعوى الإرهاب ؟ .. وكم بلد استنزفت أمريكا ثرواته بدعوى أخرى مصطنعة .. بلد بهذه السياسة القذرة لن ينتظر رأيك عنه ولن يجهد نفسه في تحسين صورته لك (اللهم إلا اعتذرات خاوية كاعتذارهم الواهن عن قتل الملايين بالعراق) .. بمعنى آخر .. هذا البلد يمس في أذنك قائلاً : ادعق انت والي جابوك بجاز ..

إن إيقاف نزيف دماء المسلمين وقمع هذه (الأكلة التي تتداعى علينا) لن يأتي بطريقتنا الساذجة الواهنة في تحسين صورتنا وتجميلها عند الآخر اللي

هو أصلاً مش طايقنا .. العالم قاسٍ وأشدَّ عنفًا من عاطفتنا الحيّاشة ..أمريكا إن دخلت بلدًا عربيًا اليوم لن يوقفها بشر لأنها ستجد المسمى الذي تدخل به (حماية رعاياها ومصالحها، ملاحقة المجرمين، محاربة الإرهاب .. وإلى آخره)، ولو أنها دخلت أي مكان في العالم - حتى من غير مسمى - لن تجد من يُسألها ... وهنا تأتي إشكالية البحث عن حل نحوي به أعراضنا من الانتهاك ونقوي به شوكتنا كعرب ومسلمين و نمنع التمدد السرطاني لأمريكا وحلفائها على جثتنا .. في الواقع إنه الحل الذي توصلت إليه ايران وجعلها كيانًا يخشاه العالم وليس أمريكا فقط إنه الحل الذي مكّنها من صنع الآله التي تنتج، و السلاح الذي يحمي، و المصانع التي تحقق اكتفاءها الذاتي رغم العقوبات المفروضة عليها وهو الحل الذي جعلها تتحدى فتستقطب علماء الذرة من روسيا و توفد طلابها إلى شرق آسيا لتصنع القنابل التي يكفي أصغرها ليحيل المنطقة حجيماً و أعظمها لبييد الأرض عدة مرات متتالية .. إنه (العلم) .. والعلم فقط ..

العلم هو من سيجعلنا نفكر بمنطق القوة وليس بمنطق الـ (تحسين وتجميل) العلم ما سيجعلنا ننشر دعوتنا مرفوعي الرأس وليس مطأطيها .. العلم ما سيجعلنا نناول الناس مصاحفنا بكل ثقة بدلاً من الابتسامة الحجولة ونظرة اللي عامل عملة .. العلم هو اللي ما سيجعلنا نبني المصانع التي تنتج، و الاقتصاد الذي يغنينا عن ذل المعونات ، و السلاح الذي سيجبر غيرنا على التفكير ألف مرة قبل ما يدوس لنا على طرف .. العلم هو ما سيصنع لنا الهيبة وسط دول العالم .. العلم هو الذي سيحفظ أعراضنا من الانتهاك

ومقدساتنا من الاستهزاء و ارواحنا من القتل .. العلم هو الذي سيجعلنا
نكف عن الركض ورا اللي يسوا واللي ميسواش كي نحاول إقناعه بشتي
الطرق انه ميقتلناش وميموتناش عشان احنا في الواقع حلوين وجُبال .. في
الواقع العلم هو اللي هيخلي الغير يعلمنا ألف حساب وهو فعلاً هيدعتهم
بجاز ..

لِم فتافيتك يا وطن

امبارح كانت أولى جلسات المحاكم بين عبد الله بدر و مؤيديه من حركة (لا للعرّي باسم الفن) ضد إلهام شاهين ومؤيديها من حركة (قشطة للعرّي طالما ييخدم الفن) ... و أول امبارح كانت الملمحة الكبرى ما بين النائب العام ومؤيديه من (استقلال النيابة و القضاء) و ما بين مرسي ومؤيديه من : (ده راجل و سبخ و بتاع النظام القديم) .. و أول أول امبارح كانت المعركة ما بين مصطفى يونس و مؤيديه من (عايزين الدوري يرجع عشان مش قادرين نعيش من غيره) و بين علاء صادق ومؤيديه من (حق الشهدا يبجي الاول يا ولاد الكلب يا خونة) .. وده طبعا غير وجبة المصادمات اليومية ما بين العلمانيين والإسلاميين، وأنصار الدولة الدينية والمدنية، والمسيحيين والمسلمين ، وكارهي خالد عبد الله ومحبيه، وكارهي صفوت حجازي و محبيه، وكارهي مرتضى منصور وكارهيه برضه، وإلى آخره ..

كمية الخناقات والمشادات في البلد بقت غير طبيعية، أطنان من المقت والكراهية بتنعجن كل يوم في حلة الوطن و بتتقلب بـ مغرفة الإعلام المُغرض، وتنسخن حتى الغليان بالصحافه الصفرا و معارضة خالتي الندابة، ولما تغلي على آخرها تنزل تفور يوم الجمعة في مليونيات بتدلق أنهار من الدم على نافوخ الشعب الغليان .. ٨٥ مليون مصري احتفلوا ككيان واحد يوم ١١ فبراير بسقوط المخلوع و صحبوا ثاني يوم (متفهمش ازاي) لقوا نفسهم

منقسمين لـ إسلاميين، علمانيين، ليبراليين، اشتراكيين، ثوريين، أنصار الدول الدينية، أنصار الدولة المدنية، أنصار اللي عايزنها ميعة وملهية، أتباع حمدين اتباع أبو الفتوح، اتباع البرادعي، أتباع شفيق، محبي البوب وكارهي شفيق محبي شفيق وكارهي البوب، كان فين ابو اسماعيل قبل الثورة، راح فين اسماعيل بعد الثورة، اللي يلاقي اسماعيل يرن عليا علطول .. أما الباقيين اللي ملهمش تصنيف زي حالاتي فحاطين ايديهم على خدهم ويتابعوا في تلذذ مستتر جديد المصائب عشان يونسوا وحدتهم و يفرغوا ضياعهم الإنساني في ضياع البلد نفسها أحسن ما يموتوا من الاكتئاب ...

برامج التوك شو - لا تُشعل - ولكنها تساعد على اشتعال فتن الوطن اللي بتنفور وتدلّق على نفوخ الشعب الغلبان، المذيعين عندهم حماس واجتهاد غير طبيعي في توصيل جعجعة كل فصيل سياسي إلى كل الفصائل الأخرى وذلك ليس بحثًا عن الحقيقة بقدر ما هو التربص بالضيف وانتظار أن يتفوه بـ (كلمة)، ربما (جملة)، أو هو (تصرّح) يتأخذ و يتمط ويتحط عليه توابل إعلامية عشان يبقى مادة طازجة لحلقات أخرى ساخنة ترعاها إعلانات ملهلبة، ومداخلات مشعله من الناس اللي اتشمتت في الحلقة اللي فاتت وجايين ياخدوا حقهم النهاردة ..

ولذلك أقولها بكل صراحة أن وطننا العزيز يعيش في هذه الأيام أسمى مراحل التبول السياسي .. وهي المرحلة التي تمارس فيها النخبة المثقفة - تحت مسمى الديمقراطية - ضخ خرائها الفكري في وجه بعضها البعض أمام الملايين عن طريق برامج التوك شو والصحف والفضائيات واضعةً على هذا الخراء تيكيت (الرأي والرأي الآخر)، أما باقي أفراد الشعب ممن لم

يسعفهم قبح أنوفهم على الظهور في هذه البرامج فهم يجدون في كومتات
الفيسبوك و تغريدات تويتر ملاذًا لما تيسر من فضلات ألسنتهم و فوائض
نفوسهم و قلة أدبهم بحيث لن تجد موقعًا بالإنترنت أو بوست عالميس بوك
ينقل لك حدثًا من أحداث الساعة إلا وستجد في تعليقاته مئات من اللعنات
والشتائم و السباب، وهو سبائب أقذره يتعلق بالخوض في عرضك وعرض
أمك وأبيك وكل اللي جابوك، وأكثره نبلاً هو مجرد رأي لطيف من نوعية
(البرادعي عميل، حمدين متلون، الاخوان انتهازيين، السلفيين رجعيين، أبو
الفتوح سلمي، حازم مضلل، شفيق ابن @###\$) .. دعك طبعًا من لفظة
(يا ولادة المرة) و (أحـ **) التي أصبحت - على بذاتها - هي أكثر الكلمات
قبلاً في ستاتسات الفيس بوك - حتى من المثقفين أنفسهم .. وهو ما يؤكد
لي يومًا بعد يوم إنه شعبنا عنده استعداد للانحراف والحمد لله لقا اللي
يوجهه !!

وفي النهاية أقول : إنه للأسف بعد ما كانت البلد عبارة عن شريحتين
متلاحمتين (مسلمين و مسيحيين) تم تقسيم - هؤلاء المسيحيين والمسلمين
- بسكين (الوطنية المزعومة) إلى عدة شرائح سياسية صغيرة، ثم تقسيم
هذه الشرائح السياسية إلى شرائح فكرية أصغر، ثم تقسيم هذه الشرائح
الدينية / الفكرية / السياسية إلى شرائح مهلبية أخرى أقل، فأقل، فأقل،
حتى أصبح أبناء الوطن الواحد عبارة عن حثث وفناتيت صغيرة قوي و كل
فتفوتة تختار لها فتفوتة ثانية تنزل معاها يوم الجمعة عشان تطالب بمطالبها،
تربص الحثث والفتافيت ببعضها البعض لن يجعلها تفكر في شيء سوى حماية
نفسها وفرض معتقداتها على الآخر، قد تلتحم ببعضها حينًا ولكنها تتفرق

أحياناً، و لكن المؤكد أنه لن يأتي إبداع أو أفكار من أي حنة في هذا المناخ الموتور، وإن جاءت فستعمل على إجماضها كل الفتافيت اللي حوالها بمليون تهمة ومسمى (إن وجدت عملاً طيباً من حمدين سيشكك فيه اتباع البرادعي، والفكرة الطيبة من البرادعي سيشكك فيها اتباع مرسي، والفكرة الجيدة من مرسي سيشكك فيها الجميع). ولذلك أقول : احنا لسه خارجين من حادثة، خلونا نشوف النقط المشتركة اللي ما بينا عشان نقف على رجلينا ونبني من جديد، دعونا ننبد الخلافات والشكليات وننتهج الموضوعية عشان العربية تمشي شويه، لأنه عمرها ما هتطلع لقدام طول ما احنا بنتخانق في الكنبه اللي ورا .. والسواق نفسه بيحسس عالسكه ..

عن الآي باد .. والآي بولغة



بيقولك أيه بقى في الخبر الجامد ده :
”يفتح رئيس الوزراء التركي رجب طيب أردوغان في هذه الأيام مشروعه العلمي ”الفتاح“ وهو المشروع الذي سيستمر لعدة سنوات ويهدف لنقل التعليم في تركيا إلى ”العالم الرقمي“ وفي الصورة يحتفل رئيس الوزراء بتوزيع ١٥ مليون جهاز (آي - باد) – أي والنعمة (آي باد) - على طلبة المدارس حيث تشتمل تلك الأجهزة على كل المناهج الدراسية لكل مرحلة تعليمية ”

يا سلاااااام يا ناس .. مش هقول شوفوا المسؤولين اللي بيعبوا شعوبهم
بيفكروا ازاي ؟ .. ولا هقول شوفوا التفكير نفسه في إدخال التكنولوجيا
على التعليم وصل لحد فين ؟ .. هقولكم بس اتفرجوا عالفصل .. شوفوا
الوشوش فيها نضارة ازاي .. وشوفوا الورود والقلوب المرسومة على الحيطان
.. تحس كده يا أخي إنه فيه هدوء بال، وصفاء نفس، و رضا - أي والله
يا شيخ رضا - طب ده أنا أقسم بالله العظيم وهذا قسم أحاسب عليه
(واللي كان في مدارس حكومة هياكد كلامي ده) إن فصلي أيام الثانوي كان
فيه ٦٥ بني آدم، وكانت فيه عيال بيغن عليها من الكتمة والروايج المعفنه
اللي بتطلع نتيجة السندوتشات الغريبة اللي العيال كانت بتطفحها، والفصل
نفسه كان فيه عيال متفهمش يا جدع جاين من انهو مصيبة .. مش بتوع
علام خالص.. عيال بتيجي بالشبابش والفانلات و بتوزع حشيش جوه
المدرسة .. وشوشهم شكلها غلط و فيها أعضاء محطوطة مكان أعضاء ...
آه والمصحف .. و تخش الفصل متلاقيش بقى القلوب والورود زي اللي
في الصورة كده .. لأ .. تلاقي عالحيطان جاجم و كلام بذيء ورسايل قهر
وحب و صور سترات عريانة وحاجة تحسسك إنك داخل بكابورت مش
فصل فيه ناس بتتعلم .. و اليوم اللي وزير التعليم قرر فيه إدخال ”وسائل
التكنولوجيا الحديثة“ إلى مدارس الثانوي مكذبتش الإدارة التعليمية بالمنطقة
خبر .. و بعثتلنا على الفور، و تنفيذًا لحطة معالي الوزير، عدد واحد جهاز
كمبيوتر ”صخر“ بمشتملاته .. أي والنعمه جهاز واحد .. جهاز لمدرسه فيها
٥٠٠٠ طالب ثانوي .. يعني لو كل طالب مسك الماوس خمس دقائق بس
على آخر اليوم هتلاقي الماوس اتنحل ومعادش فيه غير زرار الرايت كليك

وعشان كده الجهاز الصخر جه زي الباشا و اتخط في كيس زي البرنس
واتقفل عليه في أوضه لوحده مكتوب عليها معمل الكمبيوتر وجنبها مجتمتين
ممنوع الاقتراب أو التصوير ..

وطبعًا لو عشت عمر فوق عمري مستحيل أتخيل إن مسئول في يوم من
الأيام ممكن يوزع علينا آياد أو غيره .. لأنه ساعتها أقصى حاجه كانت بتتوزع
علينا - و يسقط فيها شهداء كتير - هي الوجبة المدرسية .. وكانت مكونة
من سميطه مدورة، وحته جنبه مثلثات وبار حلاوة الرشيدى الميزان وكان
الواد اللي بيخش يوزع الوجبة عالفصل بيكتب وصيته قبل ما يدخل، لأنه
لما بيدخل مبطللعش، بيتقتل ويتسرق ويتمثل بجثته، ده غير العيال اللي
كانوا يسقطوا كشهداء في صراعهم على السميط أبو سمس لأنه كان نادر
جدًا حيث كان السائد وقتها هو السميط الساده وفي بعض الأحيان لما تبقى
القشية معدن مع الوزارة يبقى السميط أبو عجوة ...

حسبي الله ونعم الوكيل فيكو وفي اللي عملتوه في شبابنا ...أنا بدعي ربنا
إنه يكون في مصر حد بس جواه حب أردوغان لشعبه وضميره الصاحي ..
الحب والضمير والله هو اللي بيخلي البني ادم يراعي ربنا ويبقى في حالة ندم
إنه مقدمش كل اللي عنده.. مبروك لشباب تركيا العالم الرقيي ..و مبروك
لشبابنا العالم الآخر .. الفاتحة

فهرس المقالات

- أحفادنا الذين سيأتون بعد 150 عامًا .. انبوكس بليز ————— ٥
- في بلاد الحضر والبوس ————— ١١
- أنت عيل ثمانينات ————— ١٩
- مسلم ومسيحي ايد واحده .. بتدي باللكمية ————— ٢٣
- بيقولك معنديش برنامج انتخابي .. وهو عنده جووووووه ————— ٢٩
- عمي .. ممكن أعض ايد بنتك ————— ٣٥
- الفلول الذي بداخلي ————— ٣٩
- الأيادي الخفية التي تعبث بينطلوناتنا ————— ٤٣
- الفرق بين بروفایل الشاب الخاطب والمتحور ————— ٤٩
- أشوف لايكاتك أصدقك أشوف كومنتاتك استعجب ————— ٥٩
- مطلوب عدد 1 رئيس جمهورية ————— ٦٣
- فيها — لا مؤاخذه — حاجه حلوة ————— ٦٩
- 175 قرش ————— ٧٥
- يا عزيزي كلنا مرشحون ————— ٧٩
- عجلة وليد ————— ٨٥
- الفابريكاتور ه ————— ٨٩

- فلولك مش زي بعضها _____ ٨٩
- هاقي بوسه يا بت _____ ٩٧
- أنا جايلك علطول .. بس مسافة الزحلقة _____ ١٠١
- المغيث في طريق مصر اسكندرية الزراعي _____ ١٠٥
- اتبرع ولو ب رقبة _____ ١٠٩
- القول التمام في حق الست الهام _____ ١١٣
- أيها المسلم دعني اهمس في أذنك _____ ١٢١
- لم فتافيتك يا وطن _____ ١٢٧
- عن الآي باد والآي بولعة _____ ١٣١

للتواصل مع المؤلف

خالد بيومي فهمي

البريد الإلكتروني :

ben_jousef@hotmail.com

صفحة الفيس بوك للمقالات :

<http://www.facebook.com/fanila.dakhelia>

الأعمال المنشورة:

- كتاب : فائلة داخلية تتسع لعدة أشخاص ، أدب ساخر
أغسطس 2011 عن دار ليلي (كيان كورب) للنشر والتوزيع .

رقم الايداع / 2013 / 1758 ط 11

ترقيم دولي / 1 - 22 - 5311 - 977 - 978

